

## Naqqiut

Siunnersuummut nassuiaatit ulloq 14. august 2019-imeersut taarserpai  
(*Teknikikkut aaqqiinerit inatsisilioriaatsimut tunngasut pisimapput. Aaqqiinerit §§ 22-mut  
aamma 23-mut nassuiaatinut immikkut ittunut pisimapput. Tamatuma saniatigut aaqqiinerit  
torersuunissaanut tunngasut pisimallutik.*)

Siunnersuummut nassuiaatit

## Nassuiaatit nalinginnaasut

### 1. Aallarniut

2018-imi ukiakkut Inatsisartut ataatsimiinneranni, UKA 2018/226, Naalakkersuisut suliffeqarfittut innuttaasunik tapersersortarialinnik suliffissaqartitsisunik nalunaarsorsimasut pillugit inatsisissatut siunnersuummik Inatsisartut 2019-mi ukiakkut ataatsimiinneranni aalajangiiffigisassatut siunnersuummik Inatsisartut akuersissuteqarput. Aalajangiiffigisassatut siunnersuummut tunuliaqutaasoq ilaatigut tassaavoq suliffeqarfimmik ingerlatsisoqarneratigut inooqataanermi inuiaqatigiinnullu iluaqutaasunik immikkut siunertarisanik siuarsaanissaq. Aalajangiiffigisassatut siunnersuut naapertorlugu ilaatigut suliffeqarnermik peqataatitsinerusumik pisariaqartitsisoqarpoq, tassani inuit imaluunniit inuit innarluutillit atugarliortut inuiaqatigiini allat assigalugit, kiisalu pissutsini atugarisassanilu immikkut pisariaqartitanut inissaqartitsisumik atugaqartillugit sulisinnaallutik. Aalajangiiffigisassatut siunnersuut naapertorlugu suliffeqarfiit innuttaasunik tapersersortarialinnik suliffissaqartitsisut atorfinitsitsinermikkut inersimasut atugarliortut tapersersorniarlugit sinneqartoorutimik ilai annertuut tamatumunnga atornerisigut ilaatigut tapersersuisinnaapput.

Suliffeqarfik innuttaasunik tapersersortarialinnik suliffissaqartitsisoq aalajangiiffigisassatut siunnersuut naapertorlugu aamma piorsarsimanerup iluani suliniuteqarnermik, avatangiisitigut immikkut suliniuteqartutut imaluunniit pisortaqarfiit suliniutit suliasaqarfigigaluarlugit naammassiuminaatsitaannik siunertaqarlutik suliffeqarfiusinnaapput.

Aalajangiiffigisassatut siunnersuummi pingaarnertut siunertaq taamaalilluni tassaavoq suliffeqarfiit innuttaasunik tapersersortarialinnik suliffissaqartitsisut nalunaarsugaanerat pillugu Inatsisartut inatsisissaannik piareersaanissaq akuersinissarlu. Inatsisartut inatsisaat ataatsimut isigalugu Danmarkimi suliffeqarfinnik innuttaasunik tapersersortarialinnik suliffissaqartitsisunik nalunaarsuisarneq pillugu inatsimmut naapertuutissaaq, kisianni Kalaallit Nunaanni pissutsinut immikkut ittunut aamma inatsit malillugu aaqqissuussinermut

Kalaallit Nunaannik immikkut kissaatigineqartunut naleqqussagaassalluni.

Inatsisartut inatsisissaatut siunnersuut manna aalajangiiffigisassatut siunnersuut tunngavigalugu piareersarneqarpoq. Siunnersuummi Danmarkimi suliffeqarfiit innuttaasunik tapersersortarialinnik suliffissaqartitsisut nalunaarsorsimasut pillugu inatsit, 1. januar 2015-imi atuutsitaalersoq ataatsimut isigalugu aallaavigineqarpoq, (takuuk inatsit nr. 711, 25. juni 2014-imeersoq). Taamaattoq siunnersuut Kalaallit Nunaannut aamma pissutsinut Kalaallit Nunaanni atuuttunut immikkut ittunut naleqqussagaavoq.

Suliffeqarfinnik innuttaasunik tapersersortarialinnik suliffissaqartitsinermik ingerlatsinerup siuarsarneqarnissaa siunnersuummi siunertaavoq. Suliffittut taaguutiminni ussasaaruteqarnerminnilu taaguut suliffeqarfiit innuttaasunik tapersersortarialinnik suliffissaqartitsisut nalunaarsorsimasut atornissaannut suliffeqarfiit nalunaarsorsimasut kisermaassisinnaatitaaffeqarnissaannik inatsisissatut siunnersuut qularnaarivoq. Paarlattuanik suliffeqarfiit pisuni arlalinni suliarisamik inuiaqatigiinnut iluaqutaasussatut qularnaarisut atugassarisat suliffeqarfiit malittarissavaat. Suliffeqarfinnut innuttaasunik tapersersortarialinnik suliffissaqartitsisunut iluaqutissanik tunisinissamik kissaateqarlutik pisortani namminersortutullu suliallit siunnersuutip akuersissutiginerata kingornatigut innuttaasunik tapersersortarialinnik suliffeqarfinnut nalunaarsuisarfimmik aallaaveqarsinnaapput, taamaalillutillu nalorninissaq pinngitsoorsinnaallugu, aammalu suliffeqarfiup innuttaasunik ikiortarialinnik minnerpaatut piumasaqaatinik suliffiup aalajangersimasup naapertuutsitsineranik pinaveersinnaallugu.

Inuiaqatigiinni unamminartut amerlanerit Kalaallit Nunaanni innuttaasunut aamma Kalaallit Nunaanni inuiaqatigiinnut iluaqutaasunik suliffeqarfinnit innuttaasunik tapersersortarialinnik suliffissaqartitsinikkut sapinngisamik aaqqiiffigineqartarnissaat imaluunniit annikillisarneqarnissaat, taamaalilluni siunnersuummi tunngavigineqarpoq. Tassunga atatillugu aamma nalinginnaanerusumik siunnersuummut siunertaavoq, suliffeqarfiit innuttaasunik tapersersortarialinnik ingerlataqarnissaannik siuarsaanissaq aamma suliffeqarfinni innuttaasunik tapersersortarialinnik suliffissaqartitsinermik siunertaqartuni innuttaasunik tapersersortarialinnik suliffissaqartitsinermut siunertarineqartut naammassineqarnissaat.

Suliffeqarfiit innuttaasunik tapersersortarialinnik suliffissaqartitsisut tassaapput suliffeqarfiit inuussutissarsiummik ingerlataqartut, sulinermikkut isertitaqarnermikkullu immikkut isumaginninnikkut siunertatigut siuarsaanermik siunertaqartut. Suliffeqarfik innuttaasunik tapersersortarialinnik suliffissaqartitsisoq immikkut ingerlatsitseqatigiiffittut iluseqanngilaq. Suliffeqarfik innuttaasunik tapersersortarialinnik suliffissaqartitsisoq assersuutigalugu tassaasinnaavoq aktiaatileqatigiiffik (A/S), ingerlatseqatigiiffik piginneqatigiiffiusoq (ApS), soqutigisaqaqatigiit ingerlatseqatigiiffiat (I/S), peqatigiiffik, aningaasaateqarfik allaluunniit

sullissivik imminut pigisoq. Taamaalilluni suliffeqarfinnut innuttaasunik tapersersortarialinnik suliffissaqartitsisunut immikkut ingerlatseqatigiiffeqanngilaq imaluunniit suliffeqarfinnut innuttaasunik tapersersortarialinnik suliffissaqartitsisunut nalinginnaasumik nassuiaasumik imaluunniit maleruagassiisumik, Kalaallit Nunaannut immikkut inatsiseqanngilaq.

Taamaattumik siunnersuut suliffeqarfinnut innuttaasunik tapersersortarialinnik suliffissaqartitsisunut nalunaarsuisarnermut aaqqissuussinermik eqquassinissamik siunertaqarpoq, takuuk siunnersuummi kapitali 2. Nalunaarsuinermik aaqqissuussineq suliffeqarfiit innuttaasunik tapersersortarialinnik suliffissaqartitsisut nalunaarsorsimasut pillugit ataatsimoorussamik kikkuunerinut tunngavissiiinnaavoq. Nalunaarsuinermik aaqqissuussinikkut, suliffeqarfiit siunnersuummi §§ 6-8 malillugit tamatumunnga atatillugu suliffeqarfiup ingerlatsineranut ammasumillu pissuseqarneranut piunasaqaatit aalajangersimasut naammassisimagunikku, suliffeqarfittut innuttaasunik tapersersortarialinnik suliffissaqartitsisutut nalunaarsorneqarsinnaalissapput. Suliffeqarfiit nalunaarsorsimasut suliffeqarfimmi ingerlatsineranut aamma paasiuminartumik (ammasumik) pissuseqarnermut siunnersuummi piunasaqaatinik naammassisaraqarnerminnik pisortani oqartussanut, sullitaminnut, aningaasaliisunut, tunissuteqartartunut, allanullu ikiuisartunut allanullu suleqataasunut uppersaasannaassapput. Atiminni nittarsaassinermilu suliffeqarfittut innuttaasunik tapersersortarialinnik suliffissaqartitsisutut nalunaarsorsimasutut taaguutip atorpeqarnissaanut kisermaassisussaataitanermik malitsigisaanik, takuuk siunnersuummi § 11, imm. 1, suliffeqarfiit nalunaarsorsimasut ilaatigut taamaaliorinnaapput.

Siunnersuummi nalunaarsuinermut aaqqissuussineq taamaalilluni suliffeqarfiit innuttaasunik tapersersortarialinnik suliffissaqartitsisutut nalunaarsorsimasut nassuiaassutaannut, inatsisitut akuerisaanermut maleruagassiinermullu iluaqutaassaaq. Siunnersuummi §§ 6-8 malillugit suliffeqarfiup ingerlatsineranut paasiuminartumillu pissuseqarneranut piunasaqaatit aalajangersimasut suliffeqarfiit naammassisimappasigit, siunnersuummi kapitali 4 naapertorlugu suliffeqarfiit innuttaasunik tapersersortarialinnik suliffissaqartitsisut inissisimalersinnaasut aammalu suliffeqarfinnut innuttaasunik tapersersortarialinnik suliffissaqartitsisutut nalunaarsuiffimmi nalunaarsorneqarsinnaasut, kinaassusersinissaannut siunnersuut periarfissiivoq. Suliffeqarfiup innuttaasunik tapersersortarialinnik suliffissaqartitsisutut nalunaarsugaasimasup taamaalilluni taaguut "suliffeqarfik innuttaasunik tapersersortarialinnik suliffissaqartitsisoq" suliffeqarfiup siunnersuut malillugu suliffeqarfiit innuttaasunik tapersersortarialinnik suliffissaqartitsisunut immikkut piunasaqaatinik suliffeqarfiup naammassininneranik immikkut allagartatut imaluunniit uppersaasatitut atimi nittarsaanerminilu atorsinnaavaa.

Nalunaarsuisarnermut aaqqissuussinermi siunertaq tassaavoq, suliffeqarfiit innuttaasunik tapersersortarialinnik suliffissaqartitsisutut nalunaarsorsimasut, sulinerminni suliffeqarfittut

inunnik tapersersortarialinnik suliffissaqartitsinermit siunertanik isumaginnittutut aamma inunnik tapersersortarialinnik suliffissaqartitsinermik ingerlataqartutut tunngaveqartut, kikkuunerisa ersarissunngortinneqarnissaat.

Siunnersuut ingerlatseqatigiiffiit ilusaannut ilaalu ilanngullugit maleruagassiinissaq pillugu siunnersuutaanngilaq, kisiannili suliffeqarfinnik innuttaasunik tapersersortarialinnik immikkut suliffissaqartitsinermit siunertanik isumaginnittunik aamma immikkut inuttaasunik tapersersortarialinnik suliffissaqartitsinermik, aammalu taakkununga atasunut tunngasunik ingerlataqartunik, nalunaarsuisarnissamut siunnersuutaalluni.

Tamatuma saniatigut siunnersuummi innuttaasunik tapersersortarialinnik suliffissaqartitsinermi suliassaqarfik tamaat imaluunniit suliffeqarfiit isumaginninnikkut suliniuteqartut tamaasa, ilaatinnessaat aamma siunertarinqanngilaq. Siunnersuut taamaalilluni nalinginnaasumik taaguutip "innuttaasunik tapersersortarialinnik suliffissaqartitsisut" atorneqarnissaanut kisermaassisussaatitaanermik malitseqassanngilaq.

Kalaallit Nunaanni inuussutissarsiorneq pillugu inatsisip nutarterneqarneranut atatillugu siunnersuut suliarineqarpoq. Naalakkersuisut ukiuni kingullerni Danmarkimi oqartussat suleqatigalugit Kalaallit Nunaanni inuussutissarsiorneq pillugu inatsisip nutarternissaat suliaaraat.

Nunat allat aamma suliffeqarfiit innuttaasunik tapersersortarialinnik suliffissaqartitsisut pillugit maleruagassaqartitsipput. Ilaatigut Danmarkimi, Sverigemi, Finlandimi, Frankrigimi, Belgiami, Tuluit Nunaanni aamma USA-mi maleruagassiisoqarsimavoq. Maleruagassiinermi nalinginnaasumik suliffeqarfiit innuttaasunik tapersersortarialinnut suliffissaqartitsisut pillugit immikkut ingerlatseqatigiiffittut imaluunniit suliffeqarfinnut pineqartunut nalunaarsuisarnermik aqqissuussinertut ilusiliisoqarpoq.

Siunnersuut Kalaallit Nunaanni suliffeqarfiit innuttaasunik tapersersortarialinnut suliffissaqartitsisut pillugit nalunaarsuinermik aqqissuussinermut tunngasuvoq aammalu immikkut ingerlatseqatigiiffittut ilusiliinermit tunngasuunani. Taamaattumik suliffeqarfiit ingerlatseqatigiiffittut ilusaat allanngortinnagu siunnersuummi suliffeqarfiit innuttaasunik tapersersortarialinnut suliffissaqartitsisut pioreersut amerlanersaat pineqartunut ilaatinneqarsinnaassasut pingaartumik tunngaviuvoq. Tamanna iluaqtissartaavoq suliffeqarfiit innuttaasunik tapersersortarialinnik suliffissaqartitsisut ullumikkut ingerlatseqatigiiffiit pillugit inatsisini assigiinngitsorujussuarni aqqissugaammata. Ilaatigut Danmarkimi taamaattoqarpoq. Piginnittuunermi pissutsit suliffeqarfiullu ingerlanneqarnissaanut kissaatigisanut tulluarnepaasunik ingerlatseqatigiiffiit ilusissaannik nalinginnaasumik suliffeqarfiit innuttaasunik tapersersortarialinnik suliffissaqartitsisut killilersorneqarnatik toqqaanissamut nalunaarsuinermik aqqissuussineq periarfissiivoq.

Tassunga ilanngutissaaq suliffeqarfiit siunnersuummit takuneqarsinnaasunit allaanerusunik allanik tunngaveqarlutik innuttaasunik tapersersortarialinnik suliffissaqartitsinermik ingerlataqarusuttut suli nalinginnaasumik nittarsaassinerminni aamma ingerlataminnut atatillugu taaguutip suliffeqarfik innuttaasunik tapersersortarialinnik suliffissaqartitsisut atorsinnaassallugu. Kisianni suliffeqarfiit innuttaasunik tapersersortarialinnik suliffissaqartitsisut taamatut ittut suliffeqarfittut innuttaasunik tapersersortarialinnik suliffissaqartitsisutut nalunaarsugaasumut taaguut atorsinnaassangilaat imaluunniit siunnersuummi pineqartunut ilaasinnaanatik.

Siunnersuut malillugu nalunaarsuinermit aqqissuussineq kajumissuseq naapertorlugu toqqagassaavoq. Suliffeqarfik innuttaasunik tapersersortarialinnik suliffissaqartitsisoq, siunnersuummi §§ 6-8-mi piumasaqaatinik naammassinnittoq, suliffeqarfiup tamanna kissaatigippagu, taamaalilluni suliffeqarfittut innuttaasunik tapersersortarialinnik suliffissaqartitsisutut suliffeqarfiup nalunaarsugaaneraniq nalunaarfigineqarnissamik qinnuteqarsinnaavoq. Suliffeqarfimmik suliffeqarfittut innuttaasunik tapersersortarialinnik suliffissaqartitsisutut nalunaarsugaanissaminik akuerineqarnissamik qinnuteqarlunilu akuerineqarsimasumik nalunaarsugaqarnissaq Atuisartoqarnermut Unammilleqatigiinnermullu Aqutsisoqarfiup isumagisavaa. Kingullertut taaneqartoq siunnersuummi § 9, imm. 2 malillugu pisussaavoq.

Naalakkersuisut sinnerlugit oqartussat suliffeqarfiulluunniit nalunaarsuiffimmik pilersitsinissaa ingerlatsinissaalu pillugu Kalaallit Nunaanni imaluunniit Danmarkimi pisortani oqartussanik imaluunniit pisortat suliffeqarfiutaannik Naalakkersuisut isumaqatigiissuteqarnissaannut siunnersuut periarfissiivoq. Tamatuma saniatigut siunnersuut malillugu suliffeqarfiit innuttaasunik tapersersortarialinnik suliffissaqartitsisutut suliffeqarfiit nalunaarsugaaneranni atugassamik oqartussat imaluunniit suliffeqarfiup nalunaarsuiffianik pioreersumik atuinissaq pillugu Kalaallit Nunaanni imaluunniit Danmarkimi pisortani oqartussanik imaluunniit pisortat suliffeqarfiutaannik Naalakkersuisut isumaqatigiissuteqarnissaannut siunnersuut periarfissiivoq. Allanneqartut Kalaallit Nunaata aamma Danmarkip akornanni piginnaatitaanerit agguagaanerannik allanngortitsinngillat. Takukkit nalinginnaasumik nassuiaatini immikkoortoq 2.5 aamma siunnersuummi § 17-imut immikkut nassuiaatit.

## **2. Siunnersuummi immikkoortut pingaernerit**

### *2.1 Suliffeqarfiup innuttaasunik tapersersortarialinnik suliffissaqartitsisutut nalunaarsugaanissaa pillugu akuersisarnermik aqqissuussineq*

Siunnersuummi suliffeqarfiup innuttaasunik tapersersortarialinnik suliffissaqartitsisutut nalunaarsugaanissaa pillugu akuersisarnermik aqqissuussineq atuutsinneqalerpoq.

Suliffeqarfik innuttaasunik tapersersortarialinnik suliffissaqartitsisoq, siunnersuummi §§ 6-8-mi piumasaqaatinik naammassinnittoq, siunnersuut malillugu suliffeqarfiup innuttaasunik tapersersortarialinnik suliffissaqartitsisutut nalunaarsugaanissaa pillugu akuersisarnermik Atuisartoqarnermut Unammilleqatigiinnermullu Aqutsisoqarfimmit nalunaarfigineqarnissaaq pillugu qinnuteqarsinnaavoq, takuuk siunnersuummi § 1-imi, imm. 1.

Suliffeqarfik §§ 6-8-mi piumasaqaatinik naammassinnippat, takuuk § 4, suliffeqarfittut innuttaasunik tapersersortarialinnik suliffissaqartitsisutut suliffeqarfiup nalunaarsugaaneranik akuerineqarnissaanik nalunaarfigineqarnissaa pillugu Atuisartoqarnermut Unammilleqatigiinnermullu Aqutsisoqarfik aalajangiissaaq. Atugassarititaasut aalajangersimasut tunngavigalugit akuersineq nalunaarutigineqarsinnaavoq, ilanngullugu siunnersuummi §§ 6-8-mi piumasaqaatinik suliffeqarfiup naammassinninnera pillugu aamma akuersinermut piumasaqaatit attuumassuteqartut allat aamma akuersissutip atorunnaarsinnera utertinneralu pillugu, takuuk siunnersuummi § 4, imm. 2. Siunnersuummi §§ 6-8-mi piumasaqaatinik suliffeqarfik naammassinninngippat suliffeqarfittut innuttaasunik tapersersortarialinnik suliffissaqartitsisutut suliffeqarfiup nalunaarsugaaneranik akuerineqarnissaaq pillugu suliffeqarfiup qinnuteqaataa Atuisartoqarnermut Unammilleqatigiinnermullu Aqutsisoqarfiup itigartissinnaavaa.

Suliffeqarfiup innuttaasunik tapersersortarialinnik suliffissaqartitsisutut nalunaarsorneqarnissaanut suliffeqarfiup akuerineqarsimasup §§ 6-8-mi piumasaqaatinik naammassinninngippat tamanna ingerlaannartumik suliffeqarfiup Atuisartoqarnermut Unammilleqatigiinnermullu Aqutsisoqarfimmut nalunaarutigissavaa.

Suliffeqarfiup §§ 6-8-mi piumasaqaatit naammassisimanngippagit, suliffeqarfittut innuttaasunik tapersersortarialinnik suliffissaqartitsisutut suliffeqarfiup nalunaarsugaanissaata akuerineqarsimanerata utertinneqarnissaa pillugu Atuisartoqarnermut Unammilleqatigiinnermullu Aqutsisoqarfik aalajangiissaaq. Akuersissutip nalunaarutigineqarsimasup utertinneqarnissaa pillugu Atuisartoqarnermut Unammilleqatigiinnermullu Aqutsisoqarfiup aalajangiinissaa sioqqullugu, suliffeqarfik tamanna pillugu qinnuiginnippat aamma piffissap naammaginartup iluani suliffeqarfik iluarsiinnaassasoq Atuisartoqarnermut Unammilleqatigiinnermullu Aqutsisoqarfik naliliippat, §§ 6-8-mi piumasaqaatinik naammassinninnissamut amigaataasut iluarsineqarnissaanut suliffeqarfimmut nalunaarsugaasimasumut piffissami naammaginartumik Atuisartoqarnermut Unammilleqatigiinnermullu Aqutsisoqarfik aalajangersaassaaq. Piffissaliussatut aalajangersarneqartup iluani §§ 6-8-mi piumasaqaatinik naammassinninnissamik amigaataasunik suliffeqarfik iluarsiinngippat, akuersinerup utertinneqarnissaa pillugu Atuisartoqarnermut Unammilleqatigiinnermullu Aqutsisoqarfik aalajangiissaaq. Tamanna siunnersuummi § 5, imm. 2 malillugu pisussaavoq.

## *2.2 Suliffeqarfiup innuttaasunik tapersortarialinnik suliffissaqartitsisutut nalunaarsugaanissaanut piumasaqaatit*

Siunnersuut malillugu suliffeqarfittut innuttaasunik tapersortarialinnik suliffissaqartitsisutut nalunaarsorneqarnissamut, suliffeqarfik innuttaasunik tapersortarialinnik suliffissaqartitsisooq Kalaallit Nunaanni suliffeqarfiit nalunaarsuiffianni nalunaarsorsimasutut normoqassaaq (CVR-normu) aamma Kalaallit Nunaanni najugaqassalluni, takuuk siunnersuummi § 6, imm. 1. Kisiannili suliffeqarfittut innuttaasunik tapersortarialinnik suliffissaqartitsisutut nalunaarsorneqarnissamut suliffeqarfik immikkut ingerlatseqatigiiffiunissaa pillugu piumasaqaateqarnani. Suliffeqarfik innuttaasunik tapersortarialinnik suliffissaqartitsisutut nalunaarsorsimasooq taamaalilluni assersuutigalugu aktiaatileqatigiiffiusinnaavoq (A/S), piginneqatigiilluni ingerlatseqatigiiffiusinnaavoq (ApS), soqutigisaqatigiinnikkut ingerlatseqatigiiffiusinnaavoq (I/S), peqatigiiffiusinnaavoq, aningaasaateqarfiusinnaavoq imaluunniit tassaasinnaalluni sullissivik alla imminut pigisoq. Siunnersuummi § 6, imm. 2 malillugu suliffeqarfik inummik ataatsimit pigineqartoq aamma suliffeqarfik piginneqatigiinnikkut pilersinneqarsimasooq, siunnersuut malillugu suliffeqarfittut inunnik tapersortarialinnik suliffissaqartitsisutut nalunaarsugaasinnaanngilaq.

Suliffeqarfiit qanorluunniit iluseqartut tamarmik, suliffeqarfiit inummik ataatsimit pigineqartut aamma suliffeqarfiit piginneqatigiinnikkut pilersinneqarsimasut eqqaassanngikkaanni, suliffeqarfiit aamma piumasaqaatit tulliuttut uku tamaasa naammassisimappatigit, taamaalillutik suliffeqarfittut innuttaasunik tapersortarialinnik suliffissaqartitsisutut nalunaarsugaasimasinnaapput, takuuk siunnersuummi §§ 7-9:

- 1) Suliffeqarfik innuttaasunut ikiortarialinnut siunertaqassaaq, aamma suliffeqarfiup innuttaasunut ikiortarialinnut siunertaqarnera suliffeqarfiup malittarisassaani imaluunniit malittarisassaqaanngippat pilersinneqarnerani uppersaasammi takuneqarsinnaassaaq.
- 2) Suliffeqarfik inuussutissarsiornermik ingerlataqassaaq.
- 3) Suliffeqarfik pisortanut attuumassuteqassanngilaq.
- 4) Suliffeqarfik sulinermini akuutitsisuussaaq akisussaasuullunilu.
- 5) Suliffeqarfik sinneqartoorutiminik innuttaasunut ikiortarialinnut isumaginnissaaq.
- 6) Suliffeqarfittut innuttaasunut ikiortarialinnut suliffissaqartitsisutut suliffeqarfiup nalunaarsorneqarnissaa akuerineqarsimassaaq, takuuk § 4.
- 7) Akuersineq piffissaq akuersissutip atuuffissaa aalajangersimasooq pillugu atugassarititaasunik imaqarpat, suliffeqarfiup suliffeqarfittut innuttaasunik tapersortarialinnik suliffissaqartitsisutut nalunaarsorneqarnissaanut akuersissuteqarneq atorunnaarsimassanngilaq, aamma Atuisartoqarnermut Unammilleqatigiinnermullu Aqutsisoqarfimmit utertinneqarsimassanani, takuuk § 5.

Immikkoortoq 5-imi sinneqartoorutininik isumaginninnikkut passussinermut tunngatillugu,

siunnersuut malillugu paasineqassaaq akileraaruteqareermermi ingerlatamut ataatsimut arlalinnulluunniit makkununga angusani suliffeqarfiup atussagai:

- 1) Nammineq suliffeqarfimmini aningaasaleeqqineq.
- 2) Suliffeqarfittut innuttaasunik tapersersortarialinnik suliffissaqartitsisunut nalunaarsugaasimasunut allani aningaasaliineq imaluunniit tunissuteqarneq.
- 3) Nalinginnaasumik iluaqutaasussanik imaluunniit nalinginnaasumik ajunngitsuliornermik siunertaqartunut suleqatigiiffinnut tunissuteqarneq.
- 4) Suliffeqarfimmi piginnittunut iluanaarutinik allatigulluunniit agguagarsiassanik killeqartumik tunniussineq.

Iluanaarutinik allatigulluunniit agguagassarsianik killeqartumik tunniussineq siunnersuut malillugu paasineqassaaq, aallaqqaasiilluni aningaasaatit piffissami piginnittuuffiusimasumi ukiumut ernialiussanik naammaginartunik tapeqartillugit. Takukkit siunnersuummi § 8 tassungalu nassuiaatit.

Suliffeqarfik suliffeqarfittut innuttaasunik tapersersortarialinnik suliffissaqartitsisutut nalunaarsorneqarnissamut akuerineqartoq suliffeqarfik nalunaarfigineqarpat, takuuk § 4, aamma siunnersuummi §§ 6-8-mi nalunaarsugaanissaq pillugu piumasaqaatit naammassineqarsimappata, siunnersuut malillugu suliffeqarfik suliffeqarfittut innuttaasunik tapersersortarialinnik suliffissaqartitsisutut nalunaarsugaalersinnaavoq nalunaarsuiffimmiilerlunilu, takuuk § 9, imm. 1. Suliffeqarfik suliffeqarfittut innuttaasunik tapersersortarialinnik suliffissaqartitsisutut nalunaarsorneqarnissaa akuerineqartoq nalunaarfigineqarsimanngippat, takuuk § 4, imaluunniit §§ 6-8-mi nalunaarsorneqarnissamut piumasaqaatinik naammassinninngippat, siunnersuut malillugu suliffeqarfittut innuttaasunik tapersersortarialinnik suliffissaqartitsisutut nalunaarsugaasinnaangilaq, takuuk § 9, imm. 1.

Suliffeqarfik suliffeqarfittut innuttaasunik tapersersortarialinnik suliffissaqartitsisutut nalunaarsorneqarnissaanik akuersissummik nalunaarfigineqarsimasoq, takuuk § 4, suliffeqarfiit innuttaasunik tapersersortarialinnik suliffissaqartitsisunut nalunaarsuiffianni suliffeqarfittut innuttaasunik tapersersortarialinnik suliffissaqartitsisutut nalunaarsorneqassaaq, takuuk kapitali 6. Tamanna § 9, imm. 2 malillugu pisussaavoq.

Suliffeqarfittut innuttaasunik tapersersortarialinnik suliffissaqartitsisutut nalunaarsorneqarnissamut akuersissuteqarneq, piffissaq atuuffiusussaq aalajangersimasoq pillugu atugassarititaasumik imaqarsinnaavoq. Taamaattoqarsimappat piffissaq akuersiffiusoq naappat akuersissuteqarneq atorunnaassaaq.

Suliffeqarfittut innuttaasunik tapersersortarialinnik suliffissaqartitsisutut nalunaarsorneqarnissamut akuersissuteqarneq atorunnaarpat imaluunniit § 5 malillugu



Atuisartoqarnermut Unammilleqatigiinnermullu Aqutsisoqarfimmit utertinneqarpat, suliffeqarfiup tamatuma kingorna sapinngisamik piaarnerpaamik suliffeqarfinnut innuttaasunik tapersersortarialinnik suliffissaqartitsisunut nalunaarsuiffimmi nalunaarsorsimanini allanngortissavaa, takuuk siunnersuummi kapitali 4, taamaalilluni suliffeqarfik tamatuma kingorna suliffeqarfittut innuttaasunik tapersersortarialinnik suliffissaqartitsisutut nalunaarsugaajunnaassaaq, takuuk § 10. Suliffeqarfittut innuttaasunik tapersersortarialinnik suliffissaqartitsisutut nalunaarsorsimasoq §§ 6-9-imi nalunaarsorneqarnissamut piumasaqaatinik tamanik naammassinnikkunnaarpat, suliffeqarfiup tamatuma kingorna sapinngisamik piaarnerpaamik suliffeqarfinnut innuttaasunik tapersersortarialinnik suliffissaqartitsisunut nalunaarsuiffimmi nalunaarsorsimanini allanngortissavaa, taamaalilluni suliffeqarfik tamatuma kingorna suliffeqarfittut innuttaasunik tapersersortarialinnik suliffissaqartitsisutut nalunaarsugaajunnaassalluni. Taamaattoq § 10, imm. 1 aamma 2 malillugit Atuisartoqarnermut Unammilleqatigiinnermullu Aqutsisoqarfimmit aalajangersarneqartup naammaginantumik piffissaliussap iluani § 6-9-imi nalunaarsugaanermut piumasaqaatinik naammassinninnginneq suliffeqarfimmit iluarsineqarsinnaappat, suliffeqarfik taamatut nalunaarsorsimajunnaarnini isumagissanngilaa. Tamanna siunnersuummi § 10, imm. 1 malillugu pisussaavoq.

### *2.3. Suliffeqarfittut innuttaasunik tapersersortarialinnik suliffissaqartitsisutut nalunaarsorsimasutut taaguutip atorineqarnissaanut kisermaassisussaatitaaneq*

Siunnersuummi tamanna pillugu aalajangersakkanut naapertuuttumik suliffeqarfittut innuttaasunik tapersersortarialinnik suliffissaqartitsisunut nalunaarsuiffimmi suliffeqarfiit nalunaarsorsimasut taaguut "suliffeqarfik innuttaasunik tapersersortarialinnik suliffissaqartitsisutut nalunaarsorsimasoq" atimi nittarsaanerminilu atornissaanut kisermaassisussaatitaapput, takuuk siunnersuummi § 11.

Suliffeqarfittut innuttaasunik tapersersortarialinnik suliffissaqartitsisutut suliffeqarfiup nalunaarsorsimanerata akuerineqarnera atorunnaarpat imaluunniit § 5 malillugu Atuisartoqarnermut Unammilleqatigiinnermullu Aqutsisoqarfimmit utertinneqarpat, suliffeqarfiup suliffeqarfittut innuttaasunik tapersersortarialinnik suliffissaqartitsisutut nalunaarsorsimasutut taaguummik atuisinnaatitaanera atorunnaassaaq.

Suliffeqarfiup innuttaasunik tapersersortarialinnik suliffissaqartitsisutut nalunaarsugaasimasup taamaalilluni taaguut "suliffeqarfik innuttaasunik tapersersortarialinnik suliffissaqartitsisoq" suliffeqarfiup siunnersuut malillugu suliffeqarfiit innuttaasunik tapersersortarialinnik suliffissaqartitsisunut immikkut piumasaqaatinik suliffeqarfiup naammassinninneranik immikkut allagartatut imaluunniit uppernarsaatitut atimi nittarsaanerminilu atorsinnaavaa.

#### *2.4. Suliffeqarfiit innuttaasunik tapersersortarialinnik suliffissaqartitsisut nalunaarsorsimasut pisussaaffii*

Siunnersuummi § 12, imm. 1 malillugu paasissutissanik eqqortunik naammattunillu suliffeqarfiup tunniussinissaanut suliffeqarfimmi qitiusumik aqutsinermi oqartussat akisussaasuupput.

Pissutsit allanngornerisa kingunerisaannik paasissutissat siusinnerusukkut tunniunneqarsimasut maannakkut eqqortuujunnaarpata naammakkunnaarpataluunniit, imaluunniit paasissutissat nutaat tunniunneqartariaqarpata paasissutissanik nutaanik pisariaqartunik suliffeqarfik sapinngisamik piaarnerpaamik tunniussissaaq. Pissutsit allanngornerisa kingunerisaannik paasissutissat siusinnerusukkut tunniunneqarsimasut maannakkut eqqortuujunnaarpata naammakkunnaarpataluunniit, tamatuma kingorna sapinngisamik piaarnerpaamik nalunaarsuinernik nutaanik pisariaqartunik suliffeqarfik isumaginnissaaq.

Suliffeqarfiup nalunaarsugaasimasup qitiusumik aqutsinermi oqartussaasui aamma § 12, imm. 2 malillugu suliffeqarfimmut innuttaasunik tapersersortarialinnik suliffissaqartitsisunut nalunaarsuiffimmi suliffeqarfiup nalunaarsugaajunnaarnissaanut akisussaasuupput.

Suliffeqarfittut innuttaasunik tapersersortarialinnik suliffissaqartitsisutut nalunaarsorsimasoq ukiumut naatsorsuutit pillugit inatsisit Kalaallit Nunaannut atortuulersinneri pillugu peqqussut kingusinnerusukkut allannguuteqarsimasut naapertorlugu ukiumut nalunaarusiamik tunniussissaaq minnerpaamillu naatsorsuuserinermi B pillugu malittarisassanik malinnissalluni. Tamanna atuuppoq apeqqutaatinnagu ukiumut naatsorsuutit pillugit inatsisit Kalaallit Nunaannut atortuulersinneri pillugu peqqussut malillugu suliffeqarfik ukiumut nalunaarusiamik tunniussinissamik pisussaaffeqarnersoq.

Ukiumut naatsorsuutit pillugit inatsisit Kalaallit Nunaannut atortuulersinneri pillugu peqqussut malillugu ukiumut nalunaarusiamut piumasaqaatit saniatigut suliffeqarfittut innuttaasunik tapersersortarialinnik suliffissaqartitsisutut nalunaarsorsimasoq ukiut tamaasa aamma pissutsit arlallit allat pillugit nalunaaruteqartassaaq, siunnersuummi kapitali 2 malillugu, tassunga ilanngullugu pingaartumik siunnersuummi §§ 6-8, suliffeqarfiup ingerlanneqarneranut aamma paasiuminartumik (ammasumik) pissuseqarnissaanut piumasaqaatinik aalajangersimasunik suliffeqarfiup naammassinninneranik nakkutilliinerup qulakkeerneqarnissaanut iluaqutaasussat. Takukkit siunnersuummi § 13 aamma § 19, imm. 3-6, taakkunungalugu nassuiaatit.

Suliffeqarfiup nalunaarsugaasimasup ukiumut nalunaarutaa pissutsillu allat taaneqartut pillugit allat nalunaarusiat siunnersuummi kapitali 4 malillugu suliffeqarfimmut innuttaasunik tapersersortarialinnik suliffissaqartitsisunut nalunaarsuiffimmi nalunaarsorneqassapput.

Takukkit siunnersuummi § 14 tassungalu nassuiaatit.

## *2.5 Suliffeqarfinnut innuttaasunik tapersersortarialinnik suliffissaqartitsisunut nalunaarsuineranut nalunaarsuiffik*

Suliffeqarfinniit qinnuteqarnek malillugu aamma Atuisartoqarnermut Unammilleqatigiinnermullu Aqutsisoqarfimmit akuerineqarnermi suliffeqarfinnut innuttaasunik tapersersortarialinnik suliffissaqartitsisunut nalunaarsuineq pillugu pisortat aaqquissuussinerannut siunnersuummi aalajangersaasoqarpoq. Suliffeqarfinnik nalunaarsuineranut atugassamik imaluunniit nalunaarsuineranut atugassamik Kalaallit Nunaanni Danmarkimiluunniit nalunaarsuiffimmik pioreersumik atuinissaq, ilanngullugu ingerlatsineq aserfallatsaaliinerlu, IT atorlugu nalunaarsuiffimmik pilersitsinissaq, ingerlatsinissaq aserfallatsaaliuinissarlu siunnersuutip pisariaqartilerpaa.

Siunnersuut malillugu suliffeqarfiit innuttaasunik tapersersortarialinnik suliffissaqartitsisutut nalunaarsorneqarnerannut atugassamik nalunaarsuiffimmik Naalackersuisut pilersitsillutillu ingerlatsissapput, takuuk § 17, imm. 1.

Oqartussap imaluunniit suliffeqarfiup Naalackersuisut sinnerlugit nalunaarsuiffimmik pilersitsinissaa ingerlatsinissaalu pillugu Kalaallit Nunaanni imaluunniit Danmarkimi pisortani oqartussanut imaluunniit pisortat suliffeqarfiutaannut siunnersuummi § 17, imm. 2 malillugu Naalackersuisut isumaqatigiissuteqarsinnaapput.

Naalackersuisut assersuutigalugu Atuisartoqarnermut Unammilleqatigiinnermullu Aqutsisoqarfik nalunaarsuiffimmik pilersitsinissaq ingerlatsinissarlu pillugu imaluunniit nalunaarsuiffimmik taamaattumik Naalackersuisunit pilersinneqarsimasumik Atuisartoqarnermut Unammilleqatigiinnermullu Aqutsisoqarfik ingerlatsinissaq, Kalaallit Nunaanni Atuisartoqarnermut Unammilleqatigiinnermullu Aqutsisoqarfimmut isumaqatigiissuteqarsinnaapput.

Siunnersuummi § 17, imm. 3 malillugu oqartussat suliffeqarfiulluunniit nalunaarsuiffiat suliffeqarfinnik innuttaasunik tapersersortarialinnik suliffissaqartitsisunik nalunaarsuinerami atugassatut Naalackersuisunit atorneqassasoq pillugu Kalaallit Nunaanni Danmarkimiluunniit pisortani oqartussanik imaluunniit pisortat suliffeqarfiutaannik Naalackersuisut isumaqatigiissuteqarsinnaapput.

Siunnersuut malillugu, tamanna Naalackersuisut kissaatigippassuk, suliffeqarfinnik innuttaasunik tapersersortarialinnik suliffissaqartitsisunik nalunaarsuiffittut Erhvervsstyrelsen suliffeqarfiit pillugit nalunaarsuiffianik (CVR-mi nalunaarsuiffik) atuinissaq pillugu Danmarkimi Erhvervsstyrelsimik assersuutigalugu Naalackersuisut isumaqatigiissuteqarsinnaapput.

Nalunaarsuiffimmik pilersitsineq ingerlatsinerlu tassungalu atatillugu pissutsit attuumassuteqartut allat tamaasa pillugit aalajangersakkanik erseqqinnerusunik Naalakkersuisut aalajangersaassapput, takuuk siunnersuummi § 18.

## *2.6 Siunnersuut malillugu nakkutilliineq, suliaassanik suliarinninneq allatigullu pisortatut suliarinninneq*

Suliffeqarfinnik innuttaasunik tapersersortarialinnik suliffissaqartitsisunik nalunaarsuineq tassungalu atasut pissutsit inuussutissarsiornermut suliaasaqarfimmut, Naalakkersuisuni inuussutissarsiornermut naalakkersuisoqarfimmit isumagineqartunut nalinginnaasumik ilaasarput. Siunnersuut malillugu nalinginnaasumik allaffissornikkut oqartussaq tassaavoq Atuisartoqarnermut Unammilleqatigiinnermullu Aqutsisoqarfik. Taanna inuussutissarsiornermut suliaasaqarfimmut, Naalakkersuisuni inuussutissarsiornermut naalakkersuisoqarfimmit isumagineqartumut, ilaavoq. Atuisartoqarnermut Unammilleqatigiinnermullu Aqutsisoqarfik taamaalilluni siunnersuummut allaffissornikkut aqutsinissamut atortitsinissamullu piginnaatitaavoq, ilanngullugit siunnersuut malillugu nakkutilliineq, aalajangiinerit peqqusissutinillu nalunaaruteqarnerit.

Siunnersuummi § 19 malillugu suliffeqarfinnik innuttaasunik tapersersortarialinnik suliffissaqartitsisunik nalunaarsorsimasunik aamma inunnik allanik suliffeqarfinnillu siunnersuummi pineqartunut ilaasunik siunnersuummullu ilaasunik taakku ingerlataannik pissutsinillu Atuisartoqarnermut Unammilleqatigiinnermullu Aqutsisoqarfik nakkutilliisuvoq. Atuisartoqarnermut Unammilleqatigiinnermullu Aqutsisoqarfik siunnersuutip peqqusummik, siunnersuut malillugu aalajangersarneqartut aalajangersakkanik akuersinermilu piumasaqaatinik eqqortinneqarnissaa pillugu nalunaaruteqarsinnaavoq. Atuisartoqarnermut Unammilleqatigiinnermullu Aqutsisoqarfik aamma suliffeqarfinnik innuttaasunik tapersersortarialinnik suliffissaqartitsisutut nalunaarsorsimasut aamma siunnersuummut ilaasut inuit allat suliffeqarfillu Atuisartoqarnermut Unammilleqatigiinnermullu Aqutsisoqarfimmit pisariaqartutut isigineqartunik paasissutissanik tunniusseqqusinnaavai, tamannalu Atuisartoqarnermut Unammilleqatigiinnermullu Aqutsisoqarfiup pisariaqartut isigisaatut pissuseqartillugu iluseqartillugulu tunniutissallugu.

Atuisartoqarnermut Unammilleqatigiinnermullu Aqutsisoqarfik pissutsit Atuisartoqarnermut Unammilleqatigiinnermullu Aqutsisoqarfiup nakkutilliiffisai, tassungalu atasunik pissutsit pillugit aalajangiisinnaavoq. Tamanna tassaasinnaavoq suliffeqarfiup suliffeqarfittut innuttaasunik tapersersortarialinnik suliffissaqartitsisutut akuerineqarneranik nalunaaruteqarnermut imaluunniit nalunaaruteqannginnermut aamma suliffeqarfittut innuttaasunik tapersersortarialinnik suliffissaqartitsisutut suliffeqarfiup nalunaarsorsimanerata

akuerineqarnerata utertinneqarneranut tunngasut pissutsit pillugit aalajangiinerit.

Siunnersuummi § 19, imm. 3-6 malillugu siunnersuummut ilaasut suliffeqarfiit inuillu siunnersuummut ilaasut pissutsit ingerlatallu pillugit nalunaarusianik, taakku akuerineqarnerinik, ukiumut nalunaarusianik allanillu nalunaarusianik Atuisartoqarnermut Unammilleqatigiinnermullu Aqutsisoqarfimmu nassiussissapput. Atuisartoqarnermut Unammilleqatigiinnermullu Aqutsisoqarfik siunnersuut malillugu akuersissutini aalajangiinerinilu nalunaaruteqarnerit pillugit piumasaqaatinik aalajangersaasinnaavoq. Nalunaaruteqarneq pillugu Naalackersuisut erseqqinnerusumik aalajangersaasinnaapput.

Siunnersuummi § 21 malillugu Atuisartoqarnermut Unammilleqatigiinnermullu Aqutsisoqarfik ukiumoortumik Atuisartoqarnermut Unammilleqatigiinnermullu Aqutsisoqarfiup nakkutilliinera aalajangiisimanerilu pillugit ukiumut nalunaarusiamik Naalackersuisunut nassiussissaaq. Ukiumut nalunaarusiaq ilaatigut Atuisartoqarnermut Unammilleqatigiinnermullu Aqutsisoqarfiup nakkutilliineranik aalajangiineranillu taakkunungalut atasunik pissutsinik annertuunik tunngaviusunillu eqikkaasumik eqqartuinerinik imaqassaaq. Ukiumut nalunaarusiaq aamma suliffeqarfiit innuttaasunik tapersersortarialinnik suliffissaqartitsisut nalunaarsorsimasut taakkulu ingerlataat siunnersuummut ilaasut pillugit paasissutissanik imaqassaaq. Siunnersuummi suliassaqarfiup iluani ineriartornermik malinnaanissamut aamma suliffeqarfiit innuttaasunik tapersersortarialinnik suliffissaqartitsisut taakkulu Kalaallit Nunaanni ingerlataannik siuarsaasunik ingerlatanik ingerlatsisoqartariaqarneranik naliliinerimut nalunaarusiaq Naalackersuisunit atorneqarsinnaavoq.

Naalackersuisut aamma tamanna Naalackersuisunit pisariaqartinneqarpat nalunaarusiat paasissutissallu allat pillugit Atuisartoqarnermut Unammilleqatigiinnermullu Aqutsisoqarfimmu qinnutigisinnaavaat.

Atuisartoqarnermut Unammilleqatigiinnermullu Aqutsisoqarfiup Naalackersuisunut nalunaarusiortarnera pillugu aalajangersakkanik erseqqinnerusunik Naalackersuisut aalajangersaasinnaapput.

### **3. Aningaasaqarnikkut allaffissornikkullu pisortanut sunniutaasussat**

Siunnersuummi pineqarpoq suliffeqarfinit qinnuteqarneq malillugu Naalackersuisullu tamatuminnga akuersissuteqarnerisigut, suliffeqarfiit innuttaasunik tapersersortarialinnik suliffissaqartitsisut nalunaarsorneqartarnerannut pisortat aaqquissuussinerat. Siunnersuummi taamaalilluni suliffeqarfinit nalunaarsuinerimut atugassamik IT atorlugu nalunaarsuiffimmik pilersitsinissaq, ingerlatsinissaq aserfallatsaaliuinissarlu imaluunniit nalunaarsuinerimut atugassamik Kalaallit Nunaanni Danmarkimiluunniit nalunaarsuiffioreersumik atuinissaq, tassunga ilanngullugu ingerlatsineq aserfallatsaaliinerlu, pisariaqartinneqalerpoq. Takukkit

siunnersuummi kapitali 4 tassungalu nassuiaatit. Tassunga aningaasartuutit ukiumut 200.000 kr.-inik annertussuseqarnissaat naatsorsuutigineqarpoq. Aningaasartuutit Atuisartoqarnermut Unammilleqatigiinnermullu Aqutsisoqarfimmud tamatumunnga aningaasaliissuteqarnikkut aningaasalersorneqassapput.

Siunnersuutip atuutilernerani suliffeqarfiit suliffeqarfittut innuttaasunik tapersersortarialinnik suliffissaqartitsisutut nalunaarsorneqarnissaannut akuersissuteqartarnermut aaqqissuussinermik pilersitsisoqarpoq. Siunnersuut malillugu sulianik suliarinninnermi allatigullu pisortatut suliarinninnermi ilaatigut uku pineqarput: Suliffeqarfiit suliffeqarfittut innuttaasunik tapersersortarialinnik suliffissaqartitsisutut nalunaarsorneqarnissaasa akuerineqarnissaat pillugu qinnuteqaatinik suliarinninneq. Siunnersuut malillugu suliffeqarfiit nalunaarusiaannik paasissutissanillu nalunaarutigineqartunik allanik misissuineq, ilaatigut siunnersuummi kapitali 2 malillugu suliffeqarfiit innuttaasunik tapersersortarialinnik suliffissaqartitsisutut nalunaarsorneqarnissamut suliffeqarfiit piumasaaqatinik naammassinninersut pillugit misissuinissaq siunertaralugu. Akuersissutinik nalunaarutigineqarsimasunik utertitsisoqarsinnaaneranut tunngatillugu sulianik suliarinninneq. Siunnersuummut ilaasunik inunnik suliffeqarfinnillu nakkutilliineq. Naatsorsuutigineqarpoq siunnersuut malillugu sulianik suliarinninneq allatigullu oqartussatut suliarinninneq allaffissornikkut sulisumut 1-imut ukiumut ataatsimut sulisussamut taamaalillunilu ukiumut 600.000 kr.-inik annertussuseqartunik Atuisartoqarnermut Unammilleqatigiinnermullu Aqutsisoqarfimmud aningaasartuutit qaffaaneriniq kinguneqassasoq.

#### **4. Aningaasaqarnikkut allaffissornikkullu inuussutissarsiortunut sunniutaasussat**

Nalunaarsuinissamut aaqqissuussineq siunnersuut malillugu kajumissuseq naapertorlugu toqqagassaavoq. Taamaattumik tassunga atatillugu inuussutissarsiortut aningaasartuutaasa pisussaaffiisaluunniit qaffannissaannik pisussaaffiliisoqanngilaq. Taamaattumik naatsorsuutigineqarpoq siunnersuut inuussutissarsiortunut aningaasaqarnikkut allaffissornikkullu sunniuteqassanngitsoq.

#### **5. Avatangiisinut, pinngortitamut inuillu peqqissusaannut sunniutaasussat**

Siunnersuut avatangiisinut, pinngortitamut inuillu peqqissusaannut sunniuteqarnerlussasoq naatsorsuutigineqanngilaq.

Danmarkimi nunanilu allani misilittakkat takutippaat suliffeqarfiit innuttaasunik tapersersortarialinnik suliffissaqartitsisut inuiaqatigiinni unamminartut ilaannik aaqqiinissamut nalinginnaasumik iluaqutaasartut, tassunga ilanngullugu ilaatigut suliffissaqarneq, inuit atugarliortut, peqqissuseq, atugarissaarneq avatangiisitigullu pissutsit eqqarsaatigalugit. Tamanna assersuutigalugu suliffeqarfiit innuttaasunik tapersersortarialinnik suliffissaqartitsinerisigut toqqaannartumik pisinnaavoq, kisianni aamma pisortani oqartussat,

pisortat suliffeqarfiutaat namminersortullu suliffeqarfiutaat inooqataanermut tunngasutigut allannguisinnaanerannik suliassa qarfiillu taaneqartut suliassa qarfiillu allat iluini anguniakkanik nutaanik qaffasinner sunillu anguniagaqarnissaannut kaammattornerisigut.

Siunnersuut avatangiisinut, pinngortitamut inuillu peqqissusiannut nalinginnaasumik pitsaasumik sunniuteqassasoq naatsorsuutigineqarpoq, ilaatigut Kalaallit Nunaanni innuttaasunut aamma Kalaallit Nunaanni inuiaqatigiinnut pitsaasunik sunniuteqartumik suliffeqarfiit innuttaasunik tapersersortarialinnik annertunerusumik suliffissaqartitsinerinut iluaqutaanissaa siunnersuummi siunertarineqarmat.

#### **6. Innuttaasunut sunniutaasussat**

Siunnersuut malillugu nalunaarsuisarnermik aqqissuussineq tassaavoq suliffeqarfinnut aqqissuussineq taamaattumillu innuttaasut pineqartunut ilaanatik. Taamaattoq siunnersuut nalinginnaasumik innuttaasunut pitsaasumik kinguneqassasoq naatsorsuutigineqarpoq, tassunga ilanngullugit ilaatigut innuttaasunut ikiortarialinnut pitsaasumik kinguneqartitsineq aamma avatangiisinut, pinngortitamut inuillu peqqissusiannut kinguneqartitsilluni. Immikkoortoq 5 qulaani takuuk.

#### **7. Sunniutaasussat annertuut allat**

Siunnersuut annertuunik allanik sunniuteqassasoq naatsorsuutigineqanngilaq.

#### **8. Oqartussaasunut, kattuffinnut il.il. tusarniaaneq**

Siunnersuut piffissami ulloq 22. maj 2019-imit ulloq 17. juni 2019-imut Namminersorlutik Oqartussat tusarniaanermi nittartagaanni [www.naalakkersuisut.gl](http://www.naalakkersuisut.gl)-imi tamanut saqqumitinneqarpoq.

Siunnersuut piffissami tassani oqartussani kattuffinnilu ilaalu ilanngullugit ukunani tusarniaassutigineqarpoq:

SIK, Sulisitsisut, NUSUKA, CSR Greenland, Transparency International Greenland, Nunatsinni Advokati, Kommuneqarfik Sermersooq, Qeqqata Kommunia, Kommune Kujalleq, Avannaata Kommunia, Qeqertalik Kommunia, Meeqqat Illersuisuat, Imigassaq Ikiaroorartorlu pillugit Siunnersuisoqatigiit.

Inuussutissarsiornermut Nukissiuuteqarnermullu Naalakkersuisoqarfiup oqartussanit kattuffinnillu il.il. makkunanga tusarniaanermi akissuteqaatit tiguai:.

Kommune Kujalleq, Transparency International Greenland, Sulisitsisut aamma Qeqqata Kommunia

Avataniit tusarniaanerp nalaani tiguneqartut tusarniaanermut akissuteqaatit tulliuuttuni sammineqarput. Oqaatigineqassaaq tusarniaanermut akissuteqaatit uingasumik allanneqarmata, tusarniaanermilu akissutit pingaaruteqarneranik nalilersuineq tunngavigalugu pingaarnertiguinnaq issuarneqarlutik. Tusarniaanermut akissuteqaat, siunnersuummi allanngortitsinerup malitsigisaanik, attuumassuteqarunnaarsimappat, matuma kingulianiittuni taakkua sammineqanngillat.

Sulisitsisunit tusarniaanermut akissuteqaat.

*GE-p inatsisiliorluni suliniut, "suliffeqarfimmi ingerlatsinikkut siunertanik inooqatigiinnermi inuiaqatigiinnilu iluaqutaasunik siuarsaanissamut." periarfissiisoq, taperserpaa.*

*GE aallappoq, inatsimmi matumani suliffeqarfiup atugassarititaasut naligiinngitsut tunngavigalugit unammillertup, atugassarititaasut annertuumik iluaqusisussat tunngavigalugit tunngavilerneqannginnissaa imaluunniit ingerlatiinnarneqannginnissaa, pingaaruteqarluinnartoq.*

Suliffeqarfiit taamaattut nalunaarsuisarnermik aaqqissuussineq atorlugu taaguutip »suliffeqarfik innuttaasunik tapersersortarialinnik suliffissaqartitsisutut nalunaarsorsimasoq, atornissaanut pisinnaatitaalersimasut, ataatsimoorussamik kinaassuseqalersinnissaannut peqataanissaq, Inatsisartut inatsisaanni taamaallaat siunertaavoq. Tunngavissaatinneqarpoq suliffeqarfik innuttaasunik tapersersortarialinnik suliffissaqartitsisutut nalunaarsorsimasoq inuussutissarsiorluni suliaqarnertut allatuulli aningaasaqarnikkut piujuarsinnaassasoq. Tamanna ilaatigut isumaqarpoq suliffeqarfik pisortanit tapiiffigineqarani ingerlanneqartuussasoq. Atugassarititaasut immikkut ittumik unammilleqatigiinnermik equtitsisut tunngavigalugit suliffeqarfimmik ingerlatsisinnaanissamut siunnersuut tunngavissiinngilaq.

*GE allappoq, § 8, imm. 2-imi aalajangersakkami naleqquttumik erniaqartitsinissamut killissaliussamik sooq nassuiaasoqarsimanersoq, nassuiaatini tunngavilersorneqanngitsoq:*

Danskit inatsisaanni, aamma Tului Nunaannit isumassarsiorfeqarnermik tunngaveqartumi, § 5, imm. 2-imi tunngavissarititaasunut naapertuuttumik naleqquttumik erniaqartitsinissamut tunngavissarititaasooq siunnersuutigineqartoq, naapertuuppoq. Kommune Kujallermit siunnersuut malillugu aalajangersakkamut nassuiaatini tamanna ilanngunneqarpoq.

Suliffeqarfimmi Inatsisartut inatsisaat manna naapertorlugu nalunaarsorsimasuni aningaasaatinik piginnittut imaluunniit piginnittuusut, piffissami suliffeqarfimmi piginnittuuffimmini, aningaasat akiliutigeqqaakkamik ukiumut erniaat naleqquttut ilanngullugit aningaasanut akiliutigeqqaakkaminnut naapertuuttumik, ataatsimoortunik



agguagarsiassanik tigusaqarnissamut taamaallaat pisinnaatitaapput. Erniatut naleqquttutut suut naatsorsuutigineqarsinnaanersut, ataasiakkaatigut naliliineq tunngavigineqassaaq. Kisiannili ukiumut erniat, pisortani diskonto sukkulluunniit aalajangersagaasoq 15 %-imik ilallugu, sinnersimappasigit, imaluunniit pissarsiani akileraaruteqareernermi suliffeqarfiup angusaasa 35%-iinit annertunerusumik tunniussisoqarpat, erniat naleqquttutut isigineqassanngillat.

*Soqutigisaqaqatigiiffiit aamma piginneqatigiinnerit, siunnersuummi pineqartunut ilaanngitsut, akornanni nassuiaatini killissalersuinerpiaat GE-p ujarorpai.*

Killilersuinerit § 6, imm. 2-mut immikkut ittutut nassuiaatini erseqqissaavigineqarput.

Kommune Kujallermit tusarniaanermut akissuteqaat

*Kommune Kujalliup suliffeqarfittut innuttaasunik tapersortarialinnik suliffissaqartitsisutut nalunaarsorsimanissamut, suliffeqarfiup pisortani oqartussanut IBA-mik isumaqatigiissuteqartup imaluunniit CSR-imut politikki pillugu oqartussanut isumaqatigiissuteqartup imaluunniit pisortani oqartussamut assigusunik isumaqatigiissuteqartup, periarfissamut mattunneqannginnissaa pingaartippaa. Taamaalilluni isumaqatigiissutit taamaattut pingaaruteqarnerat ataasiakkaatigut aammalu isumaqatigiissutit taakkua siunertaat erseqqinnerusunilla nalilersorneqartassasut, kommunip naatsorsuutigaa.*

*Ingerlatseqatigiiffinnut inatsimmi § 7-imi pisortat aalajangiisuusumik sunniuteqarnerisa nassuiaassutaa pingaartinneqassasoq, inatsisissatut siunnersuummut nassuiaatini allassimammat kommunip eqqumaffigeqquaa, tassani ilaatigut allassimalluni ilaatigut pisuni makkunani aalajangiisuusumik sunniuteqarneq atuuttartoq:*

*”Malittarisassat imaluunniit isumaqatigiissut naapertorlugu suliffeqarfimmi aningaasatigut ingerlatsinikkullu pissutsinik aqutsinissamut pisortat pisinnaatitaappata.”*

Suliffeqarfik innuttaasunik tapersortarialinnik suliffissaqartitsisoq pisortat annertuumik sunniuteqartinnagit aqunneqarnersoq ingerlanneqarnerorlu, tamaalillunilu pisortanut attuumassuteqartuunnginnersoq, pisuni ataasiakkaani pissutsit attuumassuteqartut tamarmik ataasiakkaatigut nalilersorneqarnerat malillugu aalajangerneqassaaq. Nalilersuinermi suliffeqarfimmut aktiaatileqatigiiffiit aamma piginneqatigiilluni ingerlatseqatigiiffiit pillugit inatsisip Kalaallit Nunaannut atuutsinneqalernera pillugu peqqussummi (ingerlatseqatigiiffinnut inatsit) § 7-imi nassuiarneqartumut, pisortat annertuumik sunniuteqarnerannut nassuiaassut tassani ilaatinneqassaaq.

*Kommune Kujalleq allappoq, Kalaallit Nunaanni aaqqissuussinerup, danskit aaqqissuussineranni nalunaarsuisarnertut ittumit allaanerusumik, nalunaarsuinerup*

*akuerineqartartussaanerani, iluaqutissartaasut takujuminaatsut. Kommuni taamaalilluni isumaqarpoq, aamma danskit aaqqissuussinerat malillugu suliffeqarfiup innuttaasunik suliffissaqartitsisutut nalunaarsorneqarsinnaanermut piunasaqaatit naammassisimanerai misissuisoqartartoq.*

Kalaallit Nunaanni akuersissuteqartarnermut aaqqissuussineq immikkut ittoq pisariaqarpoq, pissutigalugu isumaginninnermut tunngassuteqartunut suliassaqaarfik Namminersorlutik Oqartussat susassaqaarfigimmassuk aammalu Inuussutissarsiummik Ingerlataqartunik Nalunaarsuiffik pillugu Inatsisartut inatsisissaat nr. 10, 29. oktober 1999-imeersoq aqputigalugu suliassaqaarfimmi inatsisiliortoqareernerata kingorna, Kalaallit Nunaata CVR pillugu inatsimmi pineqartunut ilaannginnera pissutigalugu. Tamatuma kingorna Qitiusumik Suliffeqarfinnik Nalunaarsuiffimmi nalunaarsuisarneq pillugu Inatsisartut inatsisaat nr. 33, 28. november 2016-imeersumi Kalaallit Nunaanni suliffeqarfiit CVR-imut nalunaarsuiffimmi nalunaarsorneqartarnissaannut inatsimmi tunngavissiisoqarpoq, peqatigisaanillu Inuussutissarsiummik Ingerlataqartunik Nalunaarsuiffik matuneqarpoq.

Qeqqata Kommunanit tusarniaanermut akissuteqaat

*Qeqqata Kommunia isumaqarpoq siunnersuut oqaatsit innuttaasunut nalinginnaasunut paasiuminaatsumik allassimasut.*

Siunnersuut inuussutissarsiortunut tunngatinneqarpoq aammalu innuttaasunut toqqaannartumik attuumassuteqarani imaluunniit innuttaasunut tunngassuteqartunik maleruagassiisoqarani.

Transparency Greenland-imit tusarniaanermut akissuteqaat

*Transparency Greenland-ip siunnersuut taperserpa aammalu pisortatigoortumik ersarissumik nalunaarsuisarnermik aaqqissuussineq tikilluaqqullugu.*

## **Inatsisissatut siunnersuummi aalajangersakkanut ataasiakkaanut nassuiaatit**

### *§ 1-imut*

#### **Imm. 1-imut**

Suliffeqarfik siunnersuummi §§ 6-8-mi piumasaqaatinik naammassinnittoq, siunnersuummi § 4 malillugu suliffeqarfiup innuttaasunik tapersortarialinnik suliffissaqartitsisutut nalunaarsugaanissaata akuerineqarnissaa pillugu Atuisartoqarnermut Unammilleqatigiinnermullu Aqutsisoqarfimmut qinnuteqarsinnaavoq.

Nalunaarsuisarnermut aaqquissuussinerup nammineq kajumissuseq malillugu atornerqarsinnaanera oqaasertaliussap “nassatarisinnaavaa”. Suliffeqarfik innuttaasunik tapersortarialinnik suliffissaqartitsisoq, siunnersuummi §§ 6-8-mi piumasaqaatinik naammassinnittoq, taamaalilluni suliffeqarfiup tamanna kissaatigippagu, suliffeqarfittut innuttaasunik tapersortarialinnik suliffissaqartitsisutut suliffeqarfiup nalunaarsorneqarnissaanik qinnuteqarsinnaavoq. Suliffeqarfik, suliffeqarfittut innuttaasunik tapersortarialinnik suliffissaqartitsisutut nalunaarsugaanissamik qinnuteqarsimangippat akuerisaasutullu nalunaarfigineqarsimangippat, siunnersuut malillugu nalunaarsorneqarnissamut pisussaaffeqanngilaq. Kingullertut taaneqartumi siunnersuummi § 9 malinneqassaaq.

#### **Imm. 2-mut**

§ 1, imm. 2-mi aalajangersagaq malillugu suliffeqarfiup suliffeqarfittut innuttaasunik tapersortarialinnik suliffissaqartitsisutut nalunaarsorneqarnissamik qinnuteqarnerani, suliffeqarfiup siunnersuummi §§ 6-8-mi piumasaqaatit naammassisimagai uppersaat nassiunneqassaaq.

Siunnersuummi § 1, imm. 2, nr. 1-6-imi allassimasut uppersaatit qinnuteqarnermi suliffeqarfimmit nassiunneqassapput.

#### **Nr. 1-imut**

Siunnersuut malillugu suliffeqarfittut innuttaasunik tapersortarialinnik suliffissaqartitsisutut nalunaarsorneqarnissamut piumasaqaataavoq Kalaallit Nunaanni suliffeqarfinnut nalunaarsuiffimmi suliffeqarfiup namminerisaminik nalunaarsugaanermi normoqarnissaa (CVR-normu), Kalaallit Nunaanni najugaqartuunissaa aamma inummit ataatsimit pigineqarluni suliffeqarfiunnginnissaa imaluunniit piginneqatigiinnikkut suliffeqarfiup pilersinneqarsimanginnissaa, takuuk siunnersuummi § 6. CVR-imi nalunaarsuisarfimmit, suliffiup CVR-normuata, ingerlatseqatigiiffittut ilusaata aamma suliffeqarfiup nalunaarsugaasuap najugaata takuneqarsinnaaffigisaani suliffeqarfiup

nalunaarsugaanermut uppersarsaataata assilineranik nassiusaqarnermigut qinnuteqaammi pissutsit tamakku suliffeqarfiup uppersarsaateqarfigisinnaagajuttarpai.

Namminerisamik CVR-normoqarnissamik piumasaqaatip kingunerisaanik suliffeqarfimmi anginerusumi tunisassiorfik imaluunniit immikkoortortaq namminerisamik P-normulik suliffeqarfittut innuttaasunik tapersersortarialinnik namminersuutigisamisut suliffissaqartitsisutut nalunaarsugaasinnaangilaq. Taamaattoq suliffeqarfiit namminerisamik suliffissuaqarfimmi CVR-normoqartut suliffeqarfittut innuttaasunik tapersersortarialinnik suliffissaqartitsisutut nalunaarsugaasinnaapput. Suliffeqarfiup Kalaallit Nunaanni najugaqartuunissaata kingunerisaanik suliffeqarfik Kalaallit Nunaanni najugaqartutut nalunaarsugaasimassaaq.

Nr. 2-mut

Siunnersuut malillugu suliffeqarfittut innuttaasunik tapersersortarialinnik suliffissaqartitsisutut nalunaarsugaasimanissaanut piumasaqaat alla tassaavoq suliffeqarfiup innuttaasunik ikiuiniarnermik siunertaqarnissaa, takuuk siunnersuummi § 7, imm. 1, nr. 1. Taamaattumik suliffeqarfiup suliffeqarfittut innuttaasunik tapersersortarialinnik suliffissaqartitsisutut nalunaarsorneqarnissaanik qinnuteqarnerani, suliffeqarfiup innuttaasunut ikiuiniarnermik siunertaqarnera suliffeqarfiup malittarisassaani imaluunniit malittarisassaqaanngippat pilersinneqarnerani uppersarsaammit takuneqarsinnaasoq, uppersarsassavaa. Suliffeqarfik soqutigisaqaqatigiiffittut ingerlatseqatigiiffiuppat (I/S) malittarisassaqaarnissamut pisussaaffeqanngilaq. Suliffeqarfiup innuttaasunik ikiuiniarnermik siunertaqarnera taamaalilluni suliffeqarfiup pilersinneqarneranut uppersarsaataanit takuneqarsinnaassaaq.

Nr. 3-mut

Siunnersuut malillugu suliffeqarfittut innuttaasunik tapersersortarialinnik suliffissaqartitsisutut nalunaarsorsimanissamut piumasaqaatit pingajuat tassaavoq, suliffeqarfik inuussutissarsiummik ingerlataqartuussasoq, takuuk siunnersuummi § 7, imm. 1, nr. 2. Tamanna isumaqarpoq suliffeqarfiup ingerlatai annertuut nioqqtissanik kiffartuussinernilluunniit tuniniaanermut tunngasuussasut. Tamanna pillugu erseqqinnerusut siunnersuummi § 7, imm. 1, nr. 2-mut nassuiaatiniittut takukkit. Suliffeqarfiup tamanna qinnuteqarnermini uppersarsassavaa. Suliffeqarfiup ukiumut nalunaarusiaata kingulliup assilinerata nassinneqarneratigut ilaatigut suliffeqarfiup tamanna uppersarsarsinnaavaa. Suliffeqarfik ukiumut nalunaarusiaqaanngippat suliffeqarfiup ingerlataanik suliffeqarfik allaaserisaqarsinnaavoq tassungalugu ilanngullugu nioqqtissanik kiffartuussinernilluunniit tunisanut tunngasut suliffeqarfiup kaaviiartitai qanoq annertutiginersut allallugu.

Suliffeqarfik aallarterlaajuppat suliffeqarfiup nioqqtissanik kiffartuussinernilluunniit sunik tunisaqarnissamik naatsorsuutigisani aamma tunisinerup kaaviiartitanut naleqqiullugu qanoq

annertutiginissaanik suliffeqarfiup naatsorsuutigisaa allappagit naammassaaq.

Suliffeqarfik suliffeqarfittut innuttaasunik tapersersortarialinnik suliffissaqartitsisutut nalunaarsorneqarnissamik akuerineqarluni nalunaarfigineqarpat, siunnersuummi § 13-imi aalajangersakkat malillugit suliffeqarfik tamatuma kingorna ukiukkaartumik ukiumut nalunaarusiamik piareersaallunilu nassiussisassaaq.

Nr. 4-mut

Siunnersuut malillugu suliffeqarfittut innuttaasunik tapersersortarialinnik suliffissaqartitsisutut nalunaarsorsimanissamut piumasaqaatit sisamaat tassaavoq suliffeqarfiup pisortanut attuumassuteqannginnissaa, takuuk siunnersuummi § 7, imm. 1, nr. 3. Tamanna isumaqarpoq suliffeqarfik suliffeqarfiup aqunneqarnerani ingerlanneqarneranilu annertuumik pisortanit sunnerneqarnani ingerlanneqassasoq. Tamanna pillugu erseqqinnerusut siunnersuummi § 7, imm. 1, nr. 3-mut nassuiaatini takukkit. Suliffeqarfiup tamanna qinnuteqarnermini uppersassavaa. Suliffeqarfiup ilaatigut suliffeqarfiup malittarisassaata imaluunniit taassuma pilersinneqarneranik uppersaatit assilineqarnerisa nassiunneqarnerisigut tamanna uppersassavaa, taakkunani takuneqarsinnaassalluni suliffeqarfimmi qitiusumik aqutsisutut oqartussat qanoq katitigaanersut, tassunga ilanngullugu qanoq siulersuisunik toqqaasoqartarnersoq.

Suliffeqarfiup qitiusumik aqutsinermi oqartussaasuinut taaguut, aktianik piginneqatigiinnikkullu ingerlatseqatigiiffiit pillugit inatsisip (ingerlatseqatigiiffinnut inatsit) Kalaallit Nunaannut atortuulersinnera pillugu peqqussummi § 5, imm. 1, nr. 4-mut naapertuuttumik nalinginnaasumik paasineqassaaq. Suliffeqarfimmi pisortaaneqarfeqartuni siulersuisoqartunilu qitiusumik aqutsinermi oqartussat tassaapput siulersuisut. Suliffeqarfiit taamaallaat ataasiinnarmik pisortaaneqarfillit tassaapput qitiusumik aqutsisoqarfimminnik aqunneqartut. Suliffeqarfimmi pisortaaneqarfeqartuni nakkutilliisutullu siunnersuisoqatigeeqartuni qitiusumik aqutsinermi oqartussat tassaapput pisortaaneqarfik.

Suliffeqarfik aamma pisortat suliffeqarfiup ingerlanneqarneranut ulluinnarnilu aqutsineranut qanoq annertutigisumik sunniuteqarneri pillugit paasissutissiissaaq. Suliffeqarfiup ingerlanneqarneranut imaluunniit ulluinnarni aqunneqarneranut pisortat sunniuteqanngitsut suliffeqarfik isumaqarpat, tamanna suliffeqarfiup allassavaa. Pisortat suliffeqarfiup ingerlanneqarneranut imaluunniit ulluinnarni aqunneqarneranut sunniuteqartut suliffeqarfik isumaqarpat, tamanna suliffeqarfiup allassavaa aamma tamatuma qanoq annertutiginera paasissutissiissutigalugu.

Suliffeqarfiup pisortanit isumalluuteqannginnera pillugu allaaserinninneq siunnersuummi § 13, imm. 3, nr. 4 malillugu ukiukkaartumik nalunaarusiornermut atatillugu nutarterneqartassaaq naammattumillu annertussuseqartumik allanngortinneqartassalluni.

Nr. 5-imut

Siunnersuut malillugu suliffeqarfittut innuttaasunik tapersersortarialinnik suliffissaqartitsisutut nalunaarsorsimanissamut piumasagaatit tallimaat tassaavoq suliffeqarfiup sulinermini akuutitsisuunissaa akisussaaffeqarnissaalu, takuuk siunnersuummi § 7, imm. 1, nr. 4. Suliffeqarfiup qinnuteqarnermini tamanna uppersassavaa.

Siunertamut tassunga suliarisamini suliffeqarfiup qanoq akuutitsisuutigalunilu akisussaaffeqartuuneranik nassuiaammik suliffeqarfik suliaqarlunilu nassiusaqaarsinnaavoq. Suliffeqarfiup siunnerfigisani, suleqatigisani allallu soqutigisaqartut ilanngutsinnerannut suliffeqarfiup periusaa ilaatigut suliffeqarfiup allaaserissavaa.

Suliffeqarfik pilersinneqaqqammerpat allaaserinninneq suliffeqarfiup suliarisamini siunissami akuutitsisuunissamik akisussaaffeqarnissamillu qanoq ililluni qularnaarinissaanut pilersaarutaasinnaasarpoq. Sulinermini akuutitsinermi akisussaaffeqarnermilu siunnersuut malillugu nalinginnaasumik paasineqassaaq suliffeqarfiup niuernikkut periusissiaani aamma niuernikkut ingerlataa innuttaasunik ikiuiniarnermi siunertanut naleqqiullugu suliffeqarfimmi atorfeqartut, sullitat, suleqatigisat soqutigisaqatigiillu suliffeqarfiup aqutsisuunit ilanngutinniarneqarneri. Tamanna pillugu erseqqinnerusut siunnersuummi § 7, imm. 1, nr. 4-mut nassuiaatini takukkit. Suliffeqarfimmi qitiusumik aqutsinermi oqartussaat taakkuupput suliffeqarfiup pingaarnertigut periusissatigullu aqunneqarneranik isumaginnittut aamma suliffeqarfiup illersorneqarsinnaasumik aqqissugaaneranik qulakkeerisussat. Allaaserinninneq siunnersuummi § 13, imm. 3, nr. 4 malillugu ukiukkaartumik nalunaarusiornermut atatillugu nutarterneqartassaaq naammattumillu annertussuseqartumik allanngortinneqartassalluni.

Nr. 6-imut

Siunnersuut malillugu suliffeqarfittut innuttaasunik tapersersortarialinnik suliffissaqartitsisutut nalunaarsorsimanissamut piumasagaatit arfernat tassaavoq suliffeqarfik sinneqartoorutiminik innuttaasunik tapersersortarialinnik isumaginnissasoq, takuuk siunnersuummi § 7, imm. 1, nr. 5.

Suliffeqarfiup akileraaruteqareernermini sinneqartoorutiminik siunnersuummi § 7, imm. 1, nr. 5, litra a-d naapertorlugit atuisartoq, suliffeqarfik qinnuteqaammi uppersassavaa. Suliffeqarfiup tamanna suliffeqarfiup kingullermik ukiumut nalunaarusiami assilinerata nassiunneratigut, uppersassavaa. Suliffeqarfik ukiumut nalunaarusiamik nassiussinnaangippat taarsiullugu akileraaruteqareernermi suliffeqarfiup sinneqartoorutai suliffeqarfik qanoq atuinersoq aamma siunissami qanoq atuinissamik pilersaaruteqarnersoq suliffeqarfik allaaserinnissinnaavoq.

Suliffeqarfik suliffeqarfittut innuttaasunik tapersersortarialinnik suliffissaqartitsisutut

nalunaarsorneqarnissamik akuerineqartoq suliffeqarfik nalunaarfigineqarpat, suliffeqarfiup iluanaarutininik akiliinerini imaluunniit piginnittut akornanni sinneqartoortutininik allatigut agguaassisooqarnerini tamani suliffeqarfik Atuisartoqarnermut Unammilleqatigiinnermullu Aqutsisoqarfimmut nalunaaruteqassaaq, takuuk siunnersuummi § 13, imm. 4.

### *§ 2-mut*

Aalajangersagaq malillugu suliffeqarfittut innuttaasunik tapersersortarialinnik suliffissaqartitsisutut nalunaarsorneqarnissaaq pillugu suliffeqarfiup qinnuteqaataa Atuisartoqarnermut Unammilleqatigiinnermullu Aqutsisoqarfimmit piareersarneqartumik tamanullu saqqummiunneqarsimasumik qinnuteqarnermi immersugassamik atuilluni nassiunnissaa, aamma qinnuteqaatip emailip allatigulluunniit digitalikkut atassuteqaatit atorlugit nassiunneqarnissaa pillugu aalajangersakkanik Naalakkersuisut aalajangersaasinnaapput.

Naalakkersuisut aamma emailit allatigulluunniit digitalikkut attaveqaatit atornerisigut qinnuteqaatip nassiunneqarnissaa pillugu aalajangersakkanik aalajangersaasinnaapput. Taamatut aalajangersakkat ilaatigut tamanna pillugu nalunaarummi aalajangersarneqarsinnaapput.

### *§ 3-mut*

#### *Imm. 1-imut*

Aalajangersakkap kingunerisaanik suliffeqarfik suliffeqarfittut innuttaasunik tapersersortarialinnik suliffissaqartitsisutut nalunaarsorneqarnissaaq pillugu qinnuteqartoq qinnuteqaatip suliarineqarneranut suliamilu aalajangiinissamut pisariaqartunik paasissutissanik tamanik uppersaatinillu tamanik nalinginnaasumik nassiussinissamik pisussaaffeqarpoq. Qinnuteqaatip tamakkiisuunissaa aamma qinnuteqaammi paasissutissat eqqortuunissaat qinnuteqartup taamaalilluni nammineq akisussaaffigai. Siunnersuummi §§ 6-8-mi piunnaasaqartit qinnuteqartup naammassinninnera, tamatumalu qinnuteqaammit takuneqarsinnaanerata qulakkeerneqarnissaa taamaalilluni qinnuteqartup nammineq akisussaaffigaa.

#### *Imm. 2-mut*

Imm. 2-mi aalajangersagaq suliffeqarfik suliffeqarfittut innuttaasunik tapersersortarialinnik suliffissaqartitsisutut nalunaarsorsimasutut akuerineqarnissamik qinnuteqartoq, paasissutissanik uppersaatinillu qinnuteqaatip suliarineqarnerani suliamilu aalajangiinnermi pisariaqartutut Atuisartoqarnermut Unammilleqatigiinnermullu Aqutsisoqarfimmit isigineqartunik suliffeqarfiup nassiussinissaanut peqqusinissamut Atuisartoqarnermut Unammilleqatigiinnermullu Aqutsisoqarfimmut tunngavissiiivoq. Aalajangersagaq malillugu

suliffeqarfik paasissutissanik uppersaatinillu Atuisartoqarnermut Unammilleqatigiinnermullu Aqutsisoqarfimmit pissuseqarnissaanik iluseqarnissaanillu pisariaqartutut isigineqartunik nassiusseqqullugu, Atuisartoqarnermut Unammilleqatigiinnermullu Aqutsisoqarfiup peqqusinnaallugu. Qinnuteqarnermi suliap suliarinerani aalajangiiffigineranilu atugassanik qanoq iluseqartunik paasissutissanik nassiussinissaq uppersaatinillu nassiussinissaq pisariaqarnersoq pillugu Atuisartoqarnermut Unammilleqatigiinnermullu Aqutsisoqarfik aalajangiisussaavoq.

Pisuni ataasiakkaani pissutsinik attuumassutilinnik tamanik piviusumik nalilersuinerup kingornatigut paasissutissanik pissarsiniarnissamik aamma allagaatinik nassitseqqusinissamik Atuisartoqarnermut Unammilleqatigiinnermullu Aqutsisoqarfik aalajangiisussaavoq.

Atuisartoqarnermut Unammilleqatigiinnermullu Aqutsisoqarfik assersuutigalugu paasissutissanik nalunaaruteqarneq imaluunniit uppersaatinik nassiussineq pappiliangorlugit imaluunniit elektroniskimi, tassunga ilanngullugu USB-imi pissasoq suliffeqarfimmut peqqusinnaavoq. Elektroniskimik uppersaaitit immikkut angissuseqartillugit pissarsiarineqarsinnaassasut Atuisartoqarnermut Unammilleqatigiinnermullu Aqutsisoqarfiup assersuutigalugu aamma piumasarisinnaavaa, ilanngullugu Microsoft Wordimi imaluunniit PDF-inngorlugit.

Suliffeqarfittut innuttaasunik tapersortarialinnik suliffissaqartitsisusut suliffeqarfiup nalunaarsugaanissaata akuerineqarnissaa pillugu qinnuteqaat pillugu suliamik suliarinninnermut aalajangiiniarnermullu atatillugu aqutsisoqarfiup atugassanik paasissutissanik uppersaatinillu tamanik Atuisartoqarnermut Unammilleqatigiinnermullu Aqutsisoqarfiup noqqaasinnaanerata qulakkeerneqarnissaanut aalajangersagaq nalinginnaasumik siunertaqarpoq.

Qinnuteqaat pillugu suliamik suliarinninnermut aalajangiiniarnermullu atatillugu qinnuteqartumiit paasissutissat uppersaaitilluunniit amigaataasinnaasut pillugit noqqaanissamat Atuisartoqarnermut Unammilleqatigiinnermullu Aqutsisoqarfimmut pisussaaffeqarnermik aalajangersagaq kinguneqartitsinngilaq. Taamaattorli tamanna pillugu qinnuteqarnissamat pisussaaffigisaq aqutseriaatsimi inatsisaasunik misissuinissamik tunngavigisamit malitsigisaasinnaavoq.

#### *§ 4-mut*

Imm. 1-imut

Aalajangersagaq malillugu suliffeqarfik §§ 6-8-mi piumasaqaatinik naammassinnissimappat, suliffeqarfittut innuttaasunik tapersortarialinnik suliffissaqartitsisutut nalunaarsorneqarnissaa akuerineqassasoq, Atuisartoqarnermut Unammilleqatigiinnermullu



Aqutsisoqarfik aalajangiisinaavoq.

Taamaalilluni siunnersuut malillugu Atuisartoqarnermut Unammilleqatigiinnermullu Aqutsisoqarfik allaffissornikkut oqartussaasuvoq, aamma malittarisassianik aqutsisuusut aamma siunnersuut malillugu suliffeqarfittut innuttaasunik tapersersortarialinnik suliffissaqartitsisutut nalunaarsorsimasutut akuerineqarnera pillugu aalajangiinissamut piginnaatitaalluni.

Suliffeqarfik siunnersuummi §§ 6-8-mi piumasaqaatinik qinnuteqartoq naammassinnippat, aamma suliffeqarfittut innuttaasunik tapersersortarialinnik suliffissaqartitsisutut nalunaarsorneqarnissaq pillugu qinnuteqaammik naammattumik eqqortumillu tunniussisimappat, suliffeqarfik suliffeqarfittut innuttaasunik tapersersortarialinnik suliffissaqartitsisutut nalunaarsorneqarnissamut akuerineqarnissamik pisinnaatitaaffeqarpoq.

Suliffeqarfik siunnersuummi §§ 6-8-mi piumasaqaatinik naammassinninngippat imaluunniit tamanna naammattumik uppenarsarsimangippagu, suliffeqarfittut innuttaasunik tapersersortarialinnik suliffissaqartitsisutut nalunaarsorsimasutut akuerineqarnissaq pillugu suliffeqarfiup qinnuteqaataa itigartinneqassasoq Atuisartoqarnermut Unammilleqatigiinnermullu Aqutsisoqarfik aalajangiisaaq.

Imm. 2-mut

Imm. 2-mi aalajangersagaq malillugu siunnersuut malillugu akuersissuteqarneq atugassarititaasut aalajangersimasut tunngavigalugit nalunaarutigineqarsinnaavoq, ilanngullugit §§ 6-8-mi piumasaqaatinik suliffeqarfiup naammassinninnissaa pillugu aamma akuersissuteqarnermut atugassarititaasut attuumassuteqartut allat aamma akuersissuteqarnerup atorunnaarsinneqarnissaa utertinneqarnissaalu pillugit.

Aalajangersagaq taamaalilluni suliffeqarfittut innuttaasunik tapersersortarialinnik suliffissaqartitsisutut nalunaarsorsimasutut akuerineqarnissami pissutsit attuumassuteqartut tamaasa pillugit atugassarititaasunik aalajangersaanissamut Atuisartoqarnermut Unammilleqatigiinnermullu Aqutsisoqarfik nalinginnaasumik inatsimmi tunngavissamik imaqarpoq. Pisuni ataasiakkaani pissutsinik attuumassutilinnik tamanik aalajangersimasumik nalilersuineq naapertorlugu akuersissuummi piumasaqaatinik Atuisartoqarnermut Unammilleqatigiinnermullu Aqutsisoqarfik aalajangersaasarpoq.

Siunnersuummi §§ 6-8-mi piumasaqaatinik suliffeqarfiup naammassinninnera pillugu piumasaqaatinik aamma akuersissuteqarnermut atugassarititaasunik allanik attuumassuteqartunik aamma akuersissuteqarnerup atorunnaarnera utertinneqarneralu pillugit ilaatigut Atuisartoqarnermut Unammilleqatigiinnermullu Aqutsisoqarfik aalajangersaasinaavoq. Suliffeqarfiup suliffeqarfittut innuttaasunik tapersersortarialinnik

suliffissaqartitsisut nalunaarsugaanera immikkut nalunaarsuiffimmi nalunaarsorneqarnissaa tassungalu atasunik pissutsit, kiisalu nalunaarsugaajunnaarnissamut pisussaaffik pillugu piunasaqaatinik ilaatigut Atuisartoqarnermut Unammilleqatigiinnermullu Aqutsisoqarfik aamma aalajangersaasinnaavoq. Pissutsit taaneqartut akuersissuteqarnermi atugassarititaasinnaasutut naleqqussinnaasunut taamaallaat assersuutaapput. Akuersinermi pissutsinit taaneqartunit allaanerusunik pissutsit allat pillugit atugassarititaasunik taamaalilluni aamma Atuisartoqarnermut Unammilleqatigiinnermullu Aqutsisoqarfik aalajangersaasinnaavoq.

### *§ 5-imut*

#### *Imm. 1-imut*

Aalajangersakkami pineqarpoq suliffeqarfiit innuttaasunik tapersersortarialinnik suliffissaqartitsisutut nalunaarsorsimasut nalunaaruteqarnissamut pisussaaffeqarnerat. Suliffeqarfik suliffeqarfittut innuttaasunik tapersersortarialinnik suliffissaqartitsisutut suliffeqarfiup nalunaarsorneqarnissaanik akuerineqarsimasoq siunnersuummi §§ 6-8-mi piunasaqaammik ataatsimik arlalinnilluunniit naammassinninngippat suliffeqarfiup ingerlaannartumik tamanna Atuisartoqarnermut Unammilleqatigiinnermullu Aqutsisoqarfimmut nalunaarutigissavaa.

Suliffeqarfik siunnersuummi §§ 6-8-mi piunasaqaatinik tamaginnik naammassinngitsoq suliffeqarfimmi qitiusumik aqutsinermi oqartussani ilaasortamit ataatsimit ilisimaneqalernerata imaluunniit ilisimaneqartariaqalernerata kingorna ingerlaannaq nalunaaruteqarnissamut pisussaaffik atuutilissaaq.

Nalunaaruteqartussaannermut suliffeqarfimmi qitiusumik aqutsisutut ilaasortat kikkulluunniit pineqartunut ilaapput. Taaguut suliffeqarfiup qitiusumik aqutsinermi oqartussai aktianik piginneqatigiinnikkullu ingerlatseqatigiiffiit pillugit inatsisip Kalaallit Nunaannut atortuulersinnera pillugu peqqussummi (ingerlatseqatigiiffinnut inatsit) § 5, imm. 1, nr. 4-mut naapertuuttumik nalinginnaasumik paasineqassaaq. Suliffeqarfinni pisortaaneqarfeqartuni siulersuisoqartunilu qitiusumik aqutsinermi oqartussat tassaapput siulersuisut. Suliffeqarfiit ataasiinnarmik pisortaaneqarfillit aamma siulersuisullit tassaapput siulersuisunit qitiusumik aqutsisoqarfillit. Suliffeqarfinni pisortaaneqarfeqartuni nakkutilliisutullu siunnersuisoqatigeeqartuni qitiusumik aqutsinermi oqartussat tassaapput pisortaaneqarfik.

Pissutsit iluarsineqarsimanngippata, imaluunniit piffissaliussap Atuisartoqarnermut Unammilleqatigiinnermullu Aqutsisoqarfimmit aalajangersarneqartup iluani suliffeqarfik pissutsinik iluarsisimanngippat, siunnersuummi § 5, imm. 2 malillugu akuersissuteqarnerup utertinneqarnissaa pillugu Atuisartoqarnermut Unammilleqatigiinnermullu Aqutsisoqarfik aalajangiissaaq. Siunnersuummi § 10, imm. 1 malillugu suliffeqarfinnut innuttaasunik

tapersersortarialinnik suliffissaqartitsisunut nalunaarsuiffimmi nalunaarsorsimanini suliffeqarfiup sapinngisami piaarnerpaamik allannngortissavaa, takuuk kapitali 4, taamaalilluni tamatuma kingorna suliffeqarfik suliffeqarfittut innuttaasunik tapersersortarialinnik suliffissaqartitsisutut nalunaarsorsimajunnaarluni.

Imm. 2-mut

Siunnersuummi §§ 6-8-mi piunasaqaatinik suliffeqarfik naammassinninngippat, suliffeqarfiup suliffeqarfittut innuttaasunik tapersersortarialinnik suliffissaqartitsisutut nalunaarsorneqarnissaanut akuersissuteqarnerup utertinneqarnissaa pillugu, aalajangersagaq malillugu Atuisartoqarnermut Unammilleqatigiinnermullu Aqutsisoqarfik aalajangiissaaq.

Akuersissutip nalunaarutigisimasap utertinneqarnissaa pillugu Atuisartoqarnermut Unammilleqatigiinnermullu Aqutsisoqarfiup aalajangiinissaa sioqqullugu siunnersuummi §§ 6-8-mi piunasaqaatinik naapertuutsitsinnginnerit iliuuseqarfiginissaanut suliffeqarfimmut nalunaarsugaasumut naammaginartumik killissaq Atuisartoqarnermut Unammilleqatigiinnermullu Aqutsisoqarfiup aalajangiutissavaa. Piffissaliussatut aalajangersarneqartup iluani §§ 6-8-mi piunasaqaatinik naammassinninnissamik amigaataasunik suliffeqarfik iluarsiinngippat akuersissuteqarnerup utertinneqarnissaa pillugu Atuisartoqarnermut Unammilleqatigiinnermullu Aqutsisoqarfik aalajangiissaaq.

Pisoqarsinnaavoq, siunnersuummi §§ 6-8-mi piunasaqaammik ataatsimik arlalinnilluunniit naammassinnginneq annertuumik pingaaruteqarluni imaluunniit annertuujulluni, suliffeqarfik taamatut piffissalernerneqarnissamik qinnuiginnissimagaluartoq, pissutsit iluarsineqarnissaanut suliffeqarfimmut piffissaliussamik aalajangersaanissaq tulluanngitsoq Atuisartoqarnermut Unammilleqatigiinnermullu Aqutsisoqarfik naliliisinnaalluni.

Aamma imaassinnaavoq utertitsinissaa pillugu aalajangiinissaaq sioqqullugu Atuisartoqarnermut Unammilleqatigiinnermullu Aqutsisoqarfik siunnersuummi § 19, imm. 1 malillugu pissutsinik iluarseeqqusilluni peqqusummik suliffeqarfimmut nalunaaruteqarsimasooq, peqqusummilu pissutsit iluarsineqarnissaanut suliffeqarfimmut piffissaaq naammaginartooq aalajangersarneqarsimalluni. Tamatuma saniatigut aamma imaassinnaavoq utertitsinissaaq pillugu aalajangiinissaaq sioqqullugu Atuisartoqarnermut Unammilleqatigiinnermullu Aqutsisoqarfik siunnersuummi § 10, imm. 2 malillugu siunnersuummi §§ 6-8-mi piunasaqaatinik naammassinninnginnerup iluarsineqarnissaanut piffissamik naammaginartumik suliffeqarfik nalunaarfigineqarsimasooq. Pisuni taamaattuni akuersinerup utertinneqarnissaa pillugu aalajangiinnermut atatillugu nutaamik iluarsiinissamat piffissaliussamik aalajangersaanissaq taamaaqataanik tulluassanngilaq. Iluarsiinissamat piffissamat killiliussamik aalajangersaasoqassasoq suliffeqarfik qinnuiginnissappat pisuni ataasiakkaani pissutsinik attuumassuteqartunik tamaginnik aalajangiisoqassaaq, ilanngullugit pissutsip imaluunniit pissutsit annertussusaat qanoq

ittuunerallu ilaalu ilanngullugit.

Siunnersuutip allaffissornikkut aqunneqarneranut atuutitsinermullu ilaatillugu siunnersuummi §§ 6-8-mi piunasaqaammik ataatsimik arlalinnilluunniit naammassinninnginneq aamma Atuisartoqarnermut Unammilleqatigiinnermullu Aqutsisoqarfiup ilisimalersinnaavaa, ilanngullugu suliffeqarfiit nalunaarsorsimasut innuttaasunik tapersersortarialinnik suliffissaqartitsisutut nalunaarsorsimanissamut piunasaqaatinik eqqortitsinersut pillugu nakkutilliinermi misissugassanik tigusiilluni misissuineramik suliaqarnermi.

Siunnersuut malillugu akuersissuteqarnerup utertitsinneqarnissaa pillugu Atuisartoqarnermut Unammilleqatigiinnermullu Aqutsisoqarfik aalajangiippat, tamatuma kingorna suliffeqarfik suliffeqarfittut innuttaasunik tapersersortarialinnik suliffissaqartitsisutut nalunaarsorsimasinnaanngilaq imaluunniit suliffeqarfittut innuttaasunik tapersersortarialinnik suliffissaqartitsisutut taaguut atimini nittarsaassinermi atorsinnaanagu, takuuk siunnersuummi § 9 aamma § 11. Taamaattoq suliffeqarfik siunnersuummi § 1, imm. 1 malillugu suliffeqarfittut innuttaasunik tapersersortarialinnik suliffissaqartitsisutut nalunaarsorneqarnissamut nutaamik akuerineqarnissamik Atuisartoqarnermut Unammilleqatigiinnermullu Aqutsisoqarfimmut qinnuteqarsinnaavoq.

Suliffeqarfiup siunnersuummi § 5, imm. 2 malillugu suliffeqarfittut innuttaasunik tapersersortarialinnik suliffissaqartitsisutut nalunaarsorneqarnissaanut akuersissuteqarneq utertinneqassasoq Atuisartoqarnermut Unammilleqatigiinnermullu Aqutsisoqarfik aalajangiisimappat, utertitsinissaq pillugu aalajangiinerup nalunaarutigineqarnerata suliffeqarfimmut anngunnerata kingorna sapinngisamik piaartumik, suliffeqarfimmi qitiusumik aqutsinermi oqartussat nammineerlutik suliffeqarfik nalunaarsorsimajunnaasissavaat. Aalajangiisuusaaq piffissaq nalunaarutip suliffeqarfimmut annguffia, ilanngullugu allakkerisarfikkoortumik allakkatigut imaluunniit e-mail-ikkut allakkat isertarfiatigut imaluunniit allatut elektroniskimik nalunaaruteqartarfimmi suliffeqarfiup tigusiisarfia.

#### *§ 6-imut*

##### *Imm. 1-imut*

Suliffeqarfiit suut siunnersuut malillugit suliffeqarfittut innuttaasunik tapersersortarialinnik suliffissaqartitsisutut nalunaarsorneqarsinnaanersut, siunnersuummi § 6, imm. 2-mut peqatigitillugu aalajangersakkami ilaatigut allanneqarpoq.

Aalajangersagaq malillugu suliffeqarfik sunaluunnit Kalaallit Nunaanni suliffeqarfimmut nalunaarsuiffimmi nalunaarsorsimalluni nammineq normoqartoq (CVR-normu), aamma Kalaallit Nunaanni najugaqartoq, siunnersuut malillugu suliffeqarfittut innuttaasunik

tapersersortarialinnik suliffissaqartitsisutut nalunaarsorneqarsinnaavoq. Siunnersuummi § 6, imm. 2-mi aalajangersagaq malillugu suliffeqarfiit inummit ataatsimit pigineqartut aamma suliffeqarfiit piginneqatigiinnikkut pilersinneqarsimasut siunnersuut malillugu suliffeqarfittut innuttaasunik tapersersortarialinnik suliffissaqartitsisutut nalunaarsorneqarsinnaanngillat.

Siunnersuummi taamaalilluni suliffeqarfittut innuttaasunik tapersersortarialinnik suliffissaqartitsisutut nalunaarsorsimasut immikkut suliffeqarfittut iluseqarnissaannik piunasaqaateqanngilaq. Suliffeqarfik innuttaasunik tapersersortarialinnik suliffissaqartitsisutut nalunaarsorsimasoq assersuutigalugu tassaasinnaavoq aktiaatileqatigiiffik (A/S), piginneqatigiilluni ingerlatseqatigiiffik (ApS), soqutigisaqaqatigiiffik (I/S), peqatigiiffik, aningaasaateqarfik imaluunniit sullissivik alla imminut pigisoq.

Namminerisamik CVR-normoqarnissamik piunasaqaateqarnerup malitsigisaanik suliffeqarfiup aaqqissuussaanerani anginerusumi tunisassiorneq imaluunniit immikkoortortaq namminerisamik P-normulik suliffeqarfittut innuttaasunik tapersersortarialinnik suliffissaqartitsisutut nalunaarsorneqarsinnaanngilaq. Taamaattoq suliffeqarfiit namminerisamik suliffissuaqarfimmi CVR-normoqartut suliffeqarfittut innuttaasunik tapersersortarialinnik suliffissaqartitsisutut nalunaarsorneqarsinnaapput.

Suliffeqarfik innuttaasunik tapersersortarialinnik suliffissaqartitsisutut nalunaarsorsimasoq Kalaallit Nunaanni nunaqavissuussasoq, aalajangersakkami allanneqarpoq. Nunaqavisoq nalinginnaasumik paasineqassaaq, suliffeqarfik Kalaallit Nunaanni najugaqartutut nalunaarsorsimasoq.

Tamatuma saniatigut siunnersuut malillugu suliffeqarfittut innuttaasunik tapersersortarialinnik suliffissaqartitsisutut nalunaarsorneqarnissamut siunnersuummi §§ 6-8-mi piunasaqaatit tamarmik naammassineqarsimassapput. Aalajangersagaq taamaalilluni aamma siunnersuummi § 9-mut peqatigitillugu nassuiarneqarlunilu atorpeqassaaq. Suliffeqarfik siunnersuummi §§ 6-8-mi piunasaqaatinik naammassinnippat suliffeqarfik suliffeqarfittut innuttaasunik tapersersortarialinnik suliffissaqartitsisutut nalunaarsorneqarsinnaavoq. Siunnersuummi erseqqissumik allamik allassimasoqanngippat, piffissami nalunaarsorsimaffiusumi piunasaqaatit tamarmi naammassineqarsimassapput.

Imm. 2-mut

Suliffeqarfiit ilusaat ataasiakkaat siunnersuut malillugu suliffeqarfittut innuttaasunik tapersersortarialinnik suliffissaqartitsisutut nalunaarsorsimasuusinnaanngitsut, aalajangersakkami allanneqarput.

Siunnersuut malillugu suliffeqarfiit inummit ataatsimit pigineqartut aamma suliffeqarfiit

piginneqatigiinnikkut pilersinneqarsimasut siunnersuut malillugu suliffeqarfittut innuttaasunik tapersersortarialinnik suliffissaqartitsisutut nalunaarsorsimasinnaanngillat.

Suliffeqarfik piginneqatigiinnikkut pilersinneqarsimasooq nalinginnaasumik paasineqassaaq tassaasoq suliffeqarfik, inuk ataaseq arlallilluunnit peqatigiillutik suliffeqarfimmi pigisanik nalilinnik ataasiakkaanik pigisaqartuullutik. Pigisaqatigiilluni pilersitatut suliffeqarfiit pineqarpata suliffimmi naleqartuutunik ataasiakkaanik tamakkuninnga inuk ataaseq imaluunniit amerlanerit pigisaqatigiiffialugit suliffeqarfiit pineqartarput. Tamakku tassaapput suliffeqarfiit ilusaanni nalunaarsugaasinnaanngitsuni kisiartaasut. Tamatumunnga patsisaasoq tassaavoq suliffeqarfiit ilusaanni taakkunani piginnittup aamma suliffeqarfiup pisuussutaasa akornanni immikkoortitsoqannginneq. Soqutigisaqatigiittut ingerlatseqatigiiffik nalunaarsugaasinnaavoq. Pigisaqatigiilluni pilersitatut suliffeqarfimmut tamatigoortutut suliffeqarfik imatut paasineqassaaq suliffeqarfimmi naleqartuutunik ataasiakkaanik tamakkuninnga inuk ataaseq imaluunniit amerlanerit peqatigiillutik piginnittuuffigisaat. Inuit marluk peqatigiillutik suliffeqarfimmik piginnittuullutik soqutigisaqatigiit ingerlatseqatigiiffii (I/S), siunnersuummi § 6, imm, 2-mi pineqartunut ilaanngillat. Soqutigisaqatigiit ingerlatseqatigiiffiat taamaalilluni siunnersuut malillugu suliffeqarfittut innuttaasunik tapersersortarialinnik suliffissaqartitsisutut nalunaarsorsimasinnaavoq.

Suliffeqarfiit inummit ataatsimit pigineqartut aamma suliffeqarfiit piginneqatigiinnikkut pilersinneqarsimasut suliffeqarfiit ilusaanni kisiartaallutik siunnersuut malillugu nalunaarsorsimasinnaanngillat. Tamatumunnga pissutaavoq suliffeqarfiit ilusaanni taamatut ittuni nalinginnaasumik piginnittup pisuussutaasa aamma suliffeqarfiup pisuussutaasa akornanni nalinginnaasumik immikkoortitsisoqarsinnaannginnera.

#### *§ 7-imut*

Imm. 1-imut

Suliffeqarfiup siunnersuut malillugu suliffeqarfittut innuttaasunik tapersersortarialinnik suliffissaqartitsisutut nalunaarsorneqarnissaanut piumasaqaatit arlallit aalajangersakkami allanneqarput.

Aalajangersagaq siunnersuummi §§ 6-imut aamma 8-9-imut peqatigitillugu nassuiarneqarlunilu atorneqassaaq. Suliffeqarfik siunnersuummi §§ 6-8-mi piumasaqaatinik naammassinnippat, suliffeqarfik suliffeqarfittut innuttaasunik tapersersortarialinnik suliffissaqartitsisutut nalunaarsorneqarsinnaavoq nalunaarsorsimasinnaallunilu. Siunnersuummi ersarissumik allamik allasimasooqanngippat, piffissami nalunaarsorsimaffiusumi tamarmi piumasaqaatit naammassineqarsimassapput.

Nr. 1-imut

Siunnersuut malillugu suliffeqarfittut innuttaasunik tapersersortarialinnik suliffissaqartitsisut nalunaarsorneqarnissamut piumasaqaat tassaavoq, suliffeqarfik innuttaasunik ikiuiniarnermik siunertaqassasoq, takuuk siunnersuummi § 7, imm. 1, nr. 1. Innuttaasunik ikiuiniarnermik siunertaqarnissaq pillugu piumasaqaat nalinginnaasumik nassuiarneqassaaq atituumillu atorneqassalluni. Suliffeqarfik taamaalilluni innuttaasunik ikiuiniarnermik, suliffissaqartitsiniarnermik, peqqissutsikkut, avatangiisitigut imaluunniit piorsarsimassutsikkut siunnerfeqartumik inuiaqatigiinnut iluaqutaasumik pingaarnertut siunertaqassaaq imaluunniit pingaarnertut siunertaqassalluni.

Danmarkimi nunanilu allani suliffeqarfiit innuttaasunik tapersersortarialinnik suliffissaqartitsisut siunnerfigineqartunut aalajangersimasunut imaluunniit suliamut aalajangersimasumut suliaqartut aamma suliffeqarfiit innuttaasunik tapersersortarialinnik suliffissaqartitsisut siunnerfigineqartunik aalajangersimasunik suliaqartut, nalinginnaasumik immikkoortinneqartarput. Tassa imaappoq suliffeqarfiit innuttaasunik tapersersortarialinnik suliffissaqartitsisut siunnerfigineqartut aalajangersimasut atugaannik imaluunniit suliami aalajangersimasumi pitsanngorsaannissamik suliaqartut aamma suliffeqarfiit innuttaasunik tapersersortarialinnik suliffissaqartitsisut, assersuutigalugu suliffeqarnermi suliffissaqarnissamut periarfissaqarnerulersitsillutik siunnerfigineqartunik aalajangersimasunik suliaqartut, nalinginnaasumik immikkoortinneqartarput. Taamaattoq suliffeqarfiit innuttaasunik tapersersortarialinnik suliffissaqartitsisut taakku immikkoortut marluk akornanni killiliussassaq aalajangersimasuunngilaq.

Suliffeqarfik innuttaasunik tapersersortarialinnik suliffissaqartitsisoq siunnerfigineqartunut aalajangersimasunut imaluunniit suliamut aalajangersimasumut suliaqarpat, immikkut siunnerfigineqartunut pissutsinik inuunerissaarnissamullu pitsaanerulersitsiniarluni imaluunniit suliaq immikkut inuiaqatigiinnut iluaqutaasusaaq siuarsarniarlugu suliffeqarfik nalinginnaasumik siunertaqassaaq. Tamanna assersuutigalugu suliffeqarfiup ingerlataasigut, nioqqaasigut, kiffartuussineratigut imaluunniit akileraaruteqareernermini sinneqartoorutit innuttaasunik ikiuiniarnermik siunertanut atorneqarnerisigut pisinnaavoq. Assersuutigalugu suliffeqarfik innuttaasunik tapersersortarialinnik suliffissaqartitsisoq qaammarsaanermik ingerlataqarsinnaavoq, ikiuutunik tunisassiorluni, inuit atugarliortut pillugit tapersersuiniarluni aaqqissuussinernik aaqqissuussinnaavoq imaluunniit suliffeqarfiup akileraarutit akilereerlugit sinneqartoorutai innuttaasunik ikiuiniarnermik immikkut siunertat tapersersorniarlugit tunniussinnaallugit.

Suliffeqarfik innuttaasunik tapersersortarialinnik suliffissaqartitsisoq siunnerfigineqartunik suliaqarpat, suliffeqarfik amerlanertigut suliffissaqartitsiniarnikkut siunertaqarsimassaaq. Suliffeqarfiup taamaalilluni suliffissaqartitsinikkut sulinermini inuit atugarliortut toqqaannartumik akuutittarpai, ilanngullugu immikkut piukkunnarsaanermik ingerlataqarneq.

Taamatut aallaaveqarneq taaneqartoq aamma "Work Integration Social Enterprise"-mik imaluunniit "WISE"-imik taaneqartarpoq aammalu suliffeqarfinnut innuttaasunik tapersersortarialinnik suliffissaqartitsisunut, piukkunnarsaanikkut, sulilersitsinikkut suliffissaqartitsinikkullu inuit atugarliortut suliffeqarfinni akuutinnerisigut suliffeqarfimmut inissaqartitsisumut iluaqusiiniartuullutik.

Siunnersuummi suliffeqarfiit innuttaasunik tapersersortarialinnik suliffissaqartitsisut taakku assigiinngitsut taaneqartut marluk pineqartunut ilaapput.

Siunnersuummi § 7, imm. 1, nr. 1 malillugu innuttaasunik ikiuniarnermik siunertaqarneq taamaalilluni assersuutigalugu siunertat makku arlarisinnaavaat:

- 1) Innuttaasunik ikiuniarnermik siunertaqarneq, ilanngullugu assersuutigalugu inunnut atonerluinermik ajornartorsiuteqartunut imaluunniit meeqqanut atugarliortunut tapersersuineq, akuutitsineq, pinerluttuliornaveersaartitsineq aamma nunani tamalaani ineriartortitsineq.
- 2) Peqqissutsikkut siunertat, ilanngullugu assersuutigalugu inunnut timikkut tarnikkulluunniit anniaateqartunik paaqqutarinninneq tapersersuinerlu, napparsimasut kattuffii aamma tamanut peqqissuseq pillugu qaammarsaaneq.
- 3) Avatangiisitigut siunertat, ilanngullugu assersuutigalugu pinngortitaq, avatangiisit silallu pissusaa pillugu isiginninniarnaq qaammarsaanerlu, ilanngullugu pinngortitami pissuseqatigiinneq atoqqiisarnerlu.
- 4) Piorsarsimassutsikkut siunertat, ilanngullugit assersuutigalugu eqqumiitsulianik piorsarsimassutsikkullu aamma nunat inoqqaavisa pisinnaatitaaffiinik ilisimasaqarnermik tapersersuineq.
- 5) Suliffissaqartitsiniarnikkut siunertat, ilanngullugit assersuutigalugu inunnik atugarliortunik piginnaasanik piukkunnarsaanerit, ilinniartitaanikkut suliniutit, atorfimmi sungiusarneq, atorfinnik pilersitsineq suliffissaqartitsinerlu.

Assersuutit taaneqartut siunnersuummi pineqartunut ilaasunut innuttaasunik ikiuniarnermik siunertanut taamaallaat assersuutaapput. Taagorneqartut tamakkiisuunngillat. Siunertat siunertanit taaneqartunit allaanerusut allat taamaalillutik aamma siunnersuummi pineqartunut ilaallutik innuttaasunik ikiuniarnermik siunertaqarsinnaapput.

Nr. 2-mut

Siunnersuut malillugu suliffeqarfittut innuttaasunik tapersersortarialinnik suliffissaqartitsisutut nalunaarsorneqarnissamut piumasaqaat alla tassaavoq, suliffeqarfik inuussutissarsiummik ingerlataqartuussasoq, takuuk siunnersuummi § 7, imm. 1, nr. 2. Tamanna nalinginnaasumik isumaqarpoq, nioqutissanik imaluunniit kiffartuussinernik tunisineq suliffeqarfiup ingerlataannut annertuumik ilaatinneqassasoq. Nioqutissanik



kiffartuussinernillu tunisineq inuinnarnut, inuussutissarsiornermik ingerlataqartunut imaluunniit pisortani oqartussanut taakkuluunniit ataqatigiissinerinut, pisinnaavoq.

Suliffeqarfiit innuttaasunik tapersersortarialinnik suliffissaqartitsisut assigiinngitsorujussuarnik isertitassanut tunngaveqarsinnaapput. Inuussutissarsiummik ingerlatsinermiit isertitat saniatigut isertitaqarfinit allarpassuarniit ingerlatsinermi aningaasaatinik suliffeqarfiit pissarsisinnaapput, ilanngullugu assersuutigalugu tunissutinit, namminersortut imaluunniit pisortat aningaasaateqarfinit, pisortat ikiorsiinermik aaqqissuussinerinit aamma aningaasanoorutinit immikkoortitani aningaasat ilaalu ilanngullugit.

Suliffeqarfiup inuussutissarsiummik ingerlataqartuunissaa pillugu piumasaqaat taamaalilluni paasineqassanngilaq, suliffeqarfiup isertitaasa annersaat nioqqutissanik kiffartuussinermilluunniit tunisisnermiit pissasut. Inuussutissarsiummilli ingerlataqarneq suliffeqarfiup ingerlataani kaaviiartitaanillu annertuujussalluni. Taamaalilluni pisortanit namminersortunillu tapiissutinik tunissutinillu ilaalu ilanngullugit suliffeqarfik pissarsiuarsinnaavoq suliffeqarfik eqqartukkatut isertitaqarfittut najoqqutarisat saniatigut suliffeqarfiup suliarisaasa kaaviiartitaasalu annertuumik ilaasuuffigisaanik nioqqutinik aamma/imaluunniit kiffartuussissutinik peqassappat.

Suliffeqarfik nioqqutissaminik imaluunniit kiffartuussinernik sullitamut ataatsimut arlalinnilluunniit tunisisinnaanersoq tunisisarnersorlu, ilanngullugu suliffeqarfiup sullitatuua pisortanit oqartussaaneernersoq, suliffeqarfiup inuussutissarsiornermik ingerlataqartuuneranik naliliiniarnermut pingaaruteqanngilaq.

Nr. 3-mut

Siunnersuut malillugu suliffeqarfittut innuttaasunik tapersersortarialinnik suliffissaqartitsisutut nalunaarsorsimanissamut piumasaqaatit pingajuat tassaavoq, suliffeqarfik pisortanut attuumassuteqassanngitsoq, takuuk siunnersuummi § 7, imm. 1, nr. 3. Tassa imaappoq suliffeqarfiup aqunneqarneranut ingerlanneqarneranullu pisortat annertuumik sunniuteqartinneqaratik, suliffeqarfik ingerlanneqassasoq.

Siunnersuut malillugu pisortat nalinginnaasumik paasineqassapput tassaasut Naalakkersuisut, naalakkersuisoqarfiit, aqutsisoqarfiit aamma Naalakkersuisuni immikkoortut allat, kommunit aamma suliffeqarfiit peqataasunit taaneqartunit ataatsimit arlalinnilluunniit pigineqartut akisussaaffigineqartullu.

Suliffeqarfiup aqutsisui ingerlatsineraluunniit pisortanit annertuumik sunniuteqarfigineqartussaaneersoq, imaluunniit suliffeqarfik pisortanut attuumassuteqannginnersoq, pillugu pisuni ataasiakkaani attuumassuteqartunut tunngasunik tamaginnik ataasiakkaatigut naliliineq tunngavigalugu tamanna aalajangiiffigineqassaaq.

Ilaatigut pisortat nakkutilliinerat imaluunniit nakkutilliineq aamma pisortani oqartussaniit aningaasaqarnikkut nakkutigineqarneq pissutigalugu Kalaallit Nunaanni aningaasaateqarfiit pillugit inatsimmi pineqartunut ilaanginneq, siunnersuut malillugu pisortat annertuumik sunniuteqarnerat namminermi naammangilaq. Suliffeqarfiup pisortanut pilersuisuunera taamaallaat pissutigalugu, siunnersuut malillugu pisortat annertuumik aamma sunniuteqanngillat. Tamanna aamma atuuppoq, suliffeqarfiup nioqqutissani tamaasa imaluunniit kiffartuussinini pisortani oqartussanut atatsimut arlalinnuunniit tunisaraluarpagit.

Kisiannili suliffeqarfiup annertunersaa pisortanit pigineqarpat, imaluunniit suliffeqarfiup aqutsisuisa amerlanersaat pisortanit toqqarneqarsimappata, pisortat annertuumik sunniuteqarsimassapput. Annertunersaa paasineqassaaq 50 procentinit annertunerusoq.

Aamma aktiatigut piginneqataaffiusullu ingerlatseqatigiiffiit pillugit inatsisip Kalaallit Nunaanni atortuulersinnera pillugu peqqussummi (ingerlatseqatigiiffinnut inatsit) § 7-imi nassuiarneqartut, pisortat suliffeqarfimmi aalajangiisumik oqartussaappata pisortat annertuumik sunniuteqarsimassapput. Ingerlatseqatigiiffiit pillugit inatsimmi § 7 malillugu suliffeqarfimmi taasisinnaatitaasut affai sinnerlugit (50 procent) suliffeqarfimmi pigisami pisortat toqqaannartumik imaluunniit toqqaannangitsumik pigisaqarpata, aalajangiisumik sunniuteqarneq aallaaviatigut pisarpoq.

Tamatuma saniatigut ingerlatseqatigiiffiit pillugit inatsimmi § 7 malillugu pisuni ukunani aalajangiisumik sunniuteqartoqassaaq:

- 1) Aningaasaliisunik allanik isumaqatigiissuteqarneq pissutigalugu taasisinnaatitaasut affai sinnerlugit (50 procent) pisortat aalajangiisinnaatitaappata.
- 2) Malittarisassat imaluunniit isumaqatigiissut naapertorlugu suliffeqarfimmi aningaasatigut ingerlatsinikkullu pissutsinik aqutsinissamut pisortat pisinnaatitaappata.
- 3) Qitiusumik aqutsinermi oqartussani ilaasortat amerlanersaannik toqqaanissamut imaluunniit soraarsitsinissamut pisortat pisinnaatitaappata, oqartussallu taakku suliffeqarfimmi aalajangiisuullutik oqartussaallutik.
- 4) Ataatsimeersuarnermi imaluunniit taamaaqataanik oqartussani taasinerit amerlanersaannut pisortat oqartussaappata taamaalillutillu suliffeqarfik pillugu aalajangiisumik sunniuteqarlutik.

Nr. 4-mut

Siunnersuut malillugu suliffeqarfittut innuttaasunik tapersersortarialinnik suliffissaqartitsisutut nalunaarsorneqarnissamut piumasaqaatit sisamaat tassaavoq, suliffeqarfik sulinermini akuutitsisuussasoq akisussaaffeqassasorlu, takuuk siunnersuummi § 7, imm. 1, nr. 4.

Sulinermini akuutitsisuussasoq akisussaaffeqassasorlu, siunnersuut malillugu nalinginnaasumik paasineqassaaq, suliffeqarfimmi sulisunik, sullitanik, suleqatigisartakkanik soqutigisaqartunillu suliffeqarfiup aqutsisui ilanngutsitsiniartartut aammalu tassunga imaluunniit suliffeqarfiup niuernermini periusissiaanut niuernermilu ingerlataannut tunngatillugu innuttaasunik ikiuiniarnermik siunertaqarnermut naleqqiullugu akisussaassuseqarnermik takutitsilluni. Qitiusumik aqutsinermini oqartussat, suliffeqarfiup pingaarnertigut periusissiatigullu aqutsinermik isumaginnittussaapput aamma suliffeqarfiup isumannaatsumik aqqissugaanissaanik qulakkeerissallutik.

Suliffeqarfimmi ataatsimik pisortaqarfilinni aamma siulersuisulinni, qitiusumik aqutsinermini oqartussaapput siulersuisut. Suliffeqarfimmi ataatsimik pisortaqarfilinni, qitiusumik aqutsinermini oqartussaavoq suliffeqarfiup pisortaqarfia. Suliffeqarfimmi pisortaqarfeqartuni nakkutilliisutullu siunnersuisoqatigeeqartuni, qitiusumik aqutsinermini oqartussaavoq suliffeqarfiup pisortaqarfia.

Suliffeqarfik sulinermini akuutitsisuunersorlu akisussaasuunersorlu pisuni ataasiakkaani pissutsinik attuumassuteqartunik tamanik aalajangersimasumik naliliisoqarneratigut tamanna aalajangiiffigineqartariaqarpoq. Nalilersuinermini ilaatigut, suliffeqarfiup malittarisassai imaluunniit pilersitsinermit uppersarsaat, suliffiup iluani najoqqutassiat, anguniakkat, periusissiat allallu uppersarsaatit suliffeqarfiup qanoq sulineranik nassuiaavusut, pingaartinneqarsinnaapput.

Suliffeqarfiup sulinermini akuutitsineranut akisussaananerannullu uppersarsaaneq siunnersuummi § 13, imm. 3, nr. 4 malillugu ukiumut nalunaarusiamik nassiussinermit atatillugu ukiukkaartumik nalunaarutigineqartassaaq.

Nr. 5-imut

Siunnersuut malillugu suliffeqarfittut innuttaasunik tapersersortarialinnik suliffissaqartitsisutut nalunaarsorsimanissamut piumasaqaatit tallimaat tassaavoq, suliffeqarfik akileraaruteqareernermini sinneqartoorutiminit innuttaasunik tapersersortarialinnik iliuuseqarfiginninnermik suliaqassasoq, takuuk siunnersuummi § 7, imm. 1, nr. 5. Suliffeqarfiup taamaalilluni siunnersuummi § 7, imm. 1, nr. 5, litra a-d-mut naapertuuttumik akileraaruteqareernermini angusaminik atuissaaq. Tassunga ilaapput nammineq suliffeqarfigisami aningaasaleeqqinneq, suliffeqarfimmut innuttaasunik tapersersortarialinnik suliffissaqartitsisunut allanut aningaasaliinerit imaluunniit tunissuteqarnerit, nalinginnarmik iluaqutaasumik imaluunniit nalinginnarmik ajunngitsuliormik siunertaqartumut suliniaqatigiiffimmut tunisinerit aamma suliffeqarfimmik piginnittunut killeqartumik annertussuseqartunik iluanaarutininik tunniussineq imaluunniit allatigut piginnittut akornanni sinneqartoorutininik avitseqatiginneq.

Illuartitat taamaalillutik nammineq suliffeqarfimmi aningaasaleeqqinnermut atorneqarsinnaapput, takuuk siunnersuummi § 7, imm. 1, nr. 5, litra a, imaluunniit siunnersuummi § 7, imm. 1, nr. 5, litra b-d-mut ilaasunut siunertamut ataatsimut arlalinnulluunniit. Taaguineq tamakkiisuunngilaq. Taamaattumik suliffeqarfik siunertanut allanut, siunertanit siunnersuummi § 7, imm. 1, nr. 5, litra a-d-mi allanneqartunit allaanerusunut, akileraaruteqareernermi sinneqartoorutininik atueqqussaannngilaq.

Suliffeqarfittut innuttaasunik tapersersortarialinnik suliffissaqartitsisutut suliffeqarfiup nalunaarsorsimanerata akuerineqarnera pillugu suliffeqarfik nalunaarfigineqarsimappat, suliffeqarfik iluanaarutininik akiliinera allatigulluunniit piginnittut akornanni sinneqartoorutininik avitseqatigiinnerit tamaasa suliffeqarfik Atuisartoqarnermut Unammilleqatigiinnermullu Aqutsisoqarfimmut nalunaaruteqartassaaq, takuuk siunnersuummi § 13, imm. 4.

Siunnersuummi § 10 malillugu suliffeqarfiup suliffeqarfittut innuttaasunik tapersersortarialinnik suliffissaqartitsisutut nalunaarsugaajunnaarnerani, suliffeqarfiup suliffeqarfittut innuttaasunik tapersersortarialinnik suliffissaqartitsisutut nalunaarsorsimanerata nalaani suliffeqarfiup isertitarisimasaanik sinneqartoorutit ilaannik siunnersuummi § 7, imm. 1, nr. 5 malillugu suliffeqarfik innuttaasunik ikiuiniarnikkut isumaginninnissamat pisussaaffeqarpoq, takuuk siunnersuummi § 16, imm. 3.

Siunnersuummi § 7, imm. 1, nr. 5, litra b malillugu suliffeqarfimmut innuttaasunik tapersersortarialinnik suliffissaqartitsisunut allanut aningaasaliinerit taamaallaat siunnersuut malillugu suliffeqarfimmut innuttaasunik tapersersortarialinnik suliffissaqartitsisunut allanut pisinnaavoq. Suliffeqarfik aningaasaliiffigineqartoq siunnersuummi § 4, imm. 1 malillugu akuerineqarsimassaaq, aamma kingusinnerpaamik aningaasaliinerup peqatigisaanik siunnersuummi kapitali 4 malillugu immikkut nalunaarsuiffimmi nalunaarsorsimassalluni.

§ 7, imm. 1, nr. 5, litra c-mi aalajangersakkap kingunerisaanik suliffeqarfittut innuttaasunik tapersersortarialinnik suliffissaqartitsisutut nalunaarsorsimasooq inuiaqatigiinnut iluaqutaasunik siunertanik suliaqartunut suliniaqatigiiffimmut allanut aningaasanik taamaallaat tunniussisinnaavoq. Suliniaqatigiiffimmut taaguummi, siunnersuut malillugu pineqartunut ilaapput peqatigiiffiit nalinginnaasut, aningaasaateqarfiit, sullissiviit imminut pigisut allat pilersitsiffiusimasullu ilaalu ilanngullugit, inatsisitigut pisinnaatitaallutik pisussaaffeqarlutillu namminersortinneqartut. Aamma takukkit qulaani siunnersuummi § 6 imm. 1-imut nassuiaatit.

Siunertaq nalinginnarmik ajunngitsuliortutut imaluunniit nalinginnarmik iluaqutaasutut isigineqarsinnaanersoq, pisuni ataasiakkaani pissutsinik attuumassuteqartuninik tamaginnik ataasiakkaatigut naliliinikkut aalajangiiffigineqartariaqarpoq.

Suliffeqarfittut innuttaasunik tapersersortarialinnik suliffissaqartitsisut nalunaarsugaasimasup siunertaa, siunnersuummi § 7, imm. 1, nr. 1-imi killissaliussat iluanniittut aamma suliniaqatigiiffinni suliffeqarfiup innuttaasunik tapersersortarialinnik suliffissaqartitsisup siunnersuut malillugu sinneqartoorutiminik tunisiffissaata siunertaata akornanni immikkoortitsisoqassaaq. Nalinginnarmik ajunngitsuliornermik siunertaqarnermut aamma nalinginnarmik iluaqutaasussamik siunertaqarnermut taaguutit, siunnersuummi § 7, imm. 1, nr. 1 malillugu innuttaasunik ikiuiniarnermik siunertamit nalinginnaasumik annertunerutillugit, siunnersuummi § 7, imm. 1, nr. 5 malillugu nassuiarneqassapput. Taamaattumik siunnersuummi § 7, imm. 1, nr. 5, litra c-mi innuttaasunik ikiuiniarnermik siunertaqartunit allaanerusunik suliniaqatigiiffiit amerlanerusut aamma pineqartunut ilaapput aamma siunnersuummi § 7, imm. 1, nr. 1 malillugu suliffeqarfittut innuttaasunik tapersersortarialinnik suliffissaqartitsisut nalunaarsugaasimasinnaallutik.

Nalinginnarmik iluaqutaasussat siunertaq assersuutigalugu tassaavoq innuttaasunik ikiuiniarnermik siunertaq, eqqumiitsuliornermik allatigullu piorsarsimassutsikkut siunertaq, avatangiisitigut siunertaq, ilisimatuussutsikkut siunertaq, ilanngullugu ilisimatusarnermi imaluunniit nappaatinik akiuiniarnermik siunertaq, inunnik ikiuiniarnermik siunertaq, atuartitsinermik siunertaq, upperisarsiornikkut siunertaq imaluunniit inuiaqatigiinni siunertaq. Timersoqatigiiffiit uumasunillu illersuiniaqatigiiffiit nalinginnaasumik aamma nalinginnarmik iluaqutaasussanik siunertaqartutut isigineqarsinnaapput.

Kisiannili suliniaqatigiiffiit, politikikkut, aningaasarsiornikkut inuussutissarsiornikkulluunniit soqutigisanik isumaginnittut, siunnersuut malillugu nalinginnarmik iluaqutaasussaasutut isigineqarsinnaanngillat.

Suliniaqatigiiffiup ingerlatai inunnut arlalissuarnut imaluunniit suliffeqarfinnut arlaatigut iluaqutaasussaasut, suliniaqatigiiffimmi aningaasanik tunniussiffiusumi siunertaq nalinginnarmik ajunngitsuliornermut allatigulluunniit nalinginnarmik iluaqutaasussatut isigineqarsinnaassappat, piumasarineqarpoq. Inuit amerlanerusut siunnersuut malillugu paasineqassaaq, aningaasanik tunniussineq najukkami sumiiffiup iluani inuinnarnut allatigulluunniit sumiiffimmut annertuumik killeqartumut tunngasuunngitsut, kisiannili suliffeqarfinnut inunnulluunniit amerlanerujussuarnut iluaqutaalluni, ilanngullugu assersuutigalugu Kalaallit Nunaat tamaat imaluunniit Kalaallit Nunaata annertunersaa. Nalilersuinermi ilaatigut sumiiffimmi pineqartumi innuttaasut amerlassusaat ilanngunneqassaaq, ilanngullugu assersuutigalugu illoqarfimmi nunaqarfimmiluunniit.

Suliniaqatigiiffik malittarisassai malillugit assersuutigalugu suliffeqarfimmut aalajangersimasumut attuumassuteqartunut inunnut aningaasanik taamaallaat agguaassisinnaasoq imaluunniit ingerlataqarsinnaasoq, inunnut amerlanerusunut aningaasanik agguaassisannilaq imaluunniit ingerlatanik isumagisaqarani. Kisiannili suliniaqatigiiffiup

inuk ataaseq suliffeqarfilluunnit ataaseq taamaallaat isumagisussaagaluaraa, inuk imaluunniit sullissivik pineqartoq inuppassuit imaluunniit suliffeqarfippassuit akornanni toqqarneqaannartussaappat, suliniaqatigiiffik assersuutigalugu nalinginnarmik iluaqutaasussanik siunertaqarsimasinnaavoq.

Siunnersuut malillugu aningaasanik tunniussineq aamma nunami sumiiffinni killilersugaasoq tunngavigalugu pisinnaavoq, suliniaqatigiiffik aningaasanik pissarsisussa, piumasaqaatit kinaassusersiunngitsut malillugit nunami killeqartumi siunertaqarpat naammalluni. Suliffeqarfik innuttaasunik tapersersortarialinnik suliffissaqartitsisutut nalunaarsorsimasoq assersuutigalugu illoqarfinni minnerusuni nunaqarfinnilu imaluunniit allami sumiiffimmi killeqartumi inoqarfiuinnarnissaanik tapersiisussatut, aningaasanik tunniussisinnaavoq, ilanngullugu assersuutigalugu najukkami timersoqatigiiffimmut, najukkami katersugaasivimmut assigisaanulluunniit tapiissuteqarnikkut. Tamanna Kalaallit Nunaanni nunaniluunniit allani ingerlanneqarnersoq, siunertaq nalinginnarmik ajunngitsuliernerunersoq allatigulluunniit nalinginnarmik iluaqutaasussaansoq nalilersuinermit pingaaruteqanngilaq.

Suliffeqarfiup innuttaasunik tapersersortarialinnik suliffissaqartitsisutut nalunaarsorsimasup akileraaruteqareernermini angusani siunnersuummi § 7, imm. 1, nr. 5, litra d malillugu suliffeqarfimmi piginnittut akornanni iluanaarutininik tunniussinermut allatigulluunniit sinneqartoorutininik agguassinermit atorpagit, aningaasanik tunniussineq suliffeqarfimmut innuttaasunik tapersersortarialinnik suliffissaqartitsisutut nalunaarsugaasumut allamut pissanngippat, siunnersuummi § 8 malillugu killilersuineq malinneqassaaq.

Taamaalilluni siunnersuut malillugu suliffeqarfiit nalunaarsorsimasut akornanni suliffeqarfissuarnik pilersitsinissamut periarfissanik killiliinissaq, siunnersuummi §§ 7, imm. 1, nr. 5, litra d-mi aamma 8-mi siunertarineqanngilaq. Ingerlatseqatigiiffik aningaasaateqartoq, suliffeqarfittut innuttaasunik tapersersortarialinnik suliffissaqartitsisutut nalunaarsorsimasoq aamma ingerlatseqatigiiffimmi aningaasaateqartumik allamik siunnersuut malillugu nalunaarsorsimasumik pigisaqartoq, taamaalilluni siunnersuummi § 8-mi killiliineq malittussaannikkaluarlugu assersuutigalugu siullertut taaneqartumit ingerlatseqatigiiffimmit aningaasaateqartumit iluanaarutininik tigusaqarsinnaavoq. Tamanna aamma siunnersuummi § 7, imm. 1, nr. 5, litra b-mik malillugu pisussaavoq. Nalinginnaasumik siunnersuummi § 8 tassungalu nassuiaatit takukkit.

#### *§ 8-mut*

Imm. 1-imut

Inatsisit suliffeqarfiup pineqartup malitassai sukkuluunniit atuuttut malillugit suliffeqarfimmut sinneqartoorutininik piginnittunut nuussisinnaasunut tamanut aalajangersagaq atuuppoq.

Aalajangersakkami allassimavoq suliffeqarfimmik innuttaasunik tapersersortarialinnik suliffissaqartitsisutut nalunaarsorsimasumik piginnittut, aningaasaliissutaaqqaartut annertoqataannik aningaasaliissutaaqqaartut ukiumut naammaginartumik erniaqartinneranut naapertuuttunik, suliffeqarfimmi piffissami pigisimasaminni ataatsimut ajunngitsorsiassanik taamaallaat tiguisinnaatitaasut.

Suliffeqarfiup innuttaasunik tapersersortarialinnik suliffissaqartitsisutut nalunaarsorsimasup iluanaarutitik qanoq annertutigisunik suliffeqarfiup piginnittuinut tunniussisinaaneranik killeqartitsinissaq, aalajangersakkami siunertaavoq. Taamaalilluni aalajangersagaq siunnersuummi § 7, imm. 1, nr. 5-imut atatillugu nassuiarneqarlunilu atorneqassaaq.

Aalajangersakkami siunertaavoq, suliffeqarfiit iluanaarutitik tunniussisarnikkut aningaasaliisartunik pilerilersitsinissamut suli periarfissaqassasut, kisianni innuttaasunik ikiuiniarnermik siunertaq pilliutigalugu piginnittunut aningaasaliisunullu sapinngisamik annertunerpaamik iluanaaruteqartitsiniarlutik suliffeqarfiit ingerlanneqannginnissaat, killiliinermi qulakkeerneqassalluni.

Siunnersuummi § 8 malillugu agguagarsisitsineq nalinginnaasumik paasineqassaaq, suliffeqarfimmik piginnittut akornanni sinneqartoorutitik qanoq iliornikkulluunniit agguaassisarneq. Ingerlatseqatigiiffinnut aningaasaatilinnut, ilanngullugit aktiaatileqatigiiffiit (A/S) aamma piginneqatigiilluni ingerlatseqatigiiffiit (ApS), pingaartumik tassaassapput agguagarsiasat imaluunniit iluanaarutitik tunniussineq. Taamaattoq aalajangersakkami pineqarput suliffeqarfimmiit suliffeqarfiup piginnittuinut imaluunniit aningaasaliisuinut agguagarsititsinerit imaluunniit aningaasanik tunniussinerit suulluunniit, taaguut sunaluunniit atorneqartoq apeqqutaatinnagu. Tamanna assersuutigalugu taamaalilluni aamma suliffeqarfimmiit piginnittumut ataatsimut arlalinnuunniit taarsigassarsianik tunniussinerit atuuppoq.

Suliffeqarfimmik piginnittoq, piginnittup pineqartup aningaasaliissutigisimasaanut (aallaqqaammut aningaasaliissutigineqarsimasut) piffissami piginnittuuffiusimasumi ukiumut naammaginartumik ernialersuinermik tapeqartillugu annertussuseqartunik suliffeqarfimmiit agguagarsianik imaluunniit iluanaarutinit annertunerpaamik tigusaqarsinnaavoq. Agguagarsinissaq imaluunniit tunniussinerup pinissaa sioqqullugu piffissaq, iluanaarutitik naatsorsuinermi ilaatinneqanngilaq, aammalu piffissaq agguagarsiffiusoq imaluunniit piffissaq aningaasanik tunniussiffiusoq tikillugu piffissaq piginnittuuffiusoq kisimi naatsorsuinermi ilanngunneqassalluni. Agguagarsineq imaluunniit iluanaarutitik tunniussineq taamaalilluni piffissami tassani assingusumik aningaasaliinernut assersuunneqarsinnaavoq.

Ernialersuineq naammaginaruunersoq, pisuni ataasiakkani pissutsinik attuumassuteqartunik tamanik aalajangersimasumik nalilersuineq, tassani apeqqutaassaaq. Nalilersuinermi ilaatigut

taamaaqataanik aningaasalersuineri nalinginnaasumik ernialersuineq, piffissami iluanaarutini naatsorsuineri aningaasatigut niuerfinni nalinginnaasumik ineriartorneq aamma suliffeqarfimmi aningaasaliinermut atasut annaasaqarsinnaanerit pingaartinneqassapput. Suliffeqarfiup innuttaasunik ikiuiniarnermi siunertaa pilliutigalugu aqutsisut iluanaarutini killiliinermik avaaqussinnginnissaat allatigulluunniit imminnut atorfeqartulluunniit allat pisuunngorsarnissaat qulakkeerniarlugu aalajangersagaq iluaqutaasussaavoq. Siunnersuut malillugu ernialersuineq qaqugu naammaginartuussanersoq, qaffasinnerpaaffissamik siunnersuummi § 8, imm. 2-mi aalajangersaasoqarpoq. Aalajangersagaq taanna aamma tassunga nassuiaatit innersuussutigineqarput.

#### Imm. 2-mut

Aalajangersakkami siunnersuut malillugu ernialersuineq qaqugu naammaginartuussanersoq qaffasinnerpaaffissaliinermik aalajangersaasoqarpoq. Aalajangersagaq siunnersuummi § 8, imm. 1-imut naapertuuttumik nassuiarneqarlunilu atorfeqassaaq, tassani allassimalluni suliffeqarfimmi innuttaasunik tapersortarialinnik suliffissaqartitsisut nalunaarsorsimasumik piginnittut, aallaqqaammut aningaasaliissutaasimasut annertoqataannik aallaqqaammut aningaasaliissutaasimasut ukiumut naammaginartumik erniaqartinneranut naapertuuttunik suliffeqarfimmi piffissami pigisimasaminni ataatsimut ajunngitsorsiassanik taamaallaat tigusinnaatitaasut. Allatigut aalajangersagaq taanna tassungalu nassuiaatit innersuussutigineqarput.

Siunnersuut malillugu piunasaqaatit makku marluk arlaat ataasiinnaq naammassineqarsimappat, ernialersuineq naammaginarsimassanngilaq:

- 1) Ukiumut ernialersuineq, pisortatigoortumik erniamut kisitsisiliusaaq sukkulluunniit aalajangersagaasoq 15 procentimik tapeqartillugu, annertussuseqarpat.
- 2) Iluanaarutini tunniussineq akileraaruteqareernermi suliffeqarfiup angusaanit 35 procentit sinnerlugit annertussuseqarpat.

Aningaasaatinik piginnittunut ataasiakkaanut ukiumut ernialersuinerup ernianut kisitsisiliusaaq 15 procentinik tapeqartillugu killeqartinnera, ukiumut ataatsimut aningaasalersuiffiusimasumut, piginnittumut iluanaarutini tunniussiffiusimanngitsumut naatsorsorneqarpoq. Naammaginartumik ernialersuinerup naatsorsorneqarnerani aningaasaliinerit ataasiakkaat malinneqarput, taamaalilluni piffissani assigiinngitsuni piginnittoq taanna suliffeqarfimmit ataatsimi arlaleriarluni aningaasaliisarsimappat, aningaasaliinernut ataasiakkaanut naammaginartumik ernialersuineq assigiinngissinnaalluni. Siunissami piffissatut aningaasaliiffiusussatut naatsorsuutigisaaq imaluunniit piffissamut aningaasaliiffiusumut iluanaarutini akiliiffioreersimasooq ilanngullugit naatsorsorneqarsinnaanngillat. Aningaasaliisimanerup ukiuata aappaata naanerata kingorna aningaasaliinermut ataatsimut piginnittoq iluanaarutini akilerneqarsimappat kingumullu



anigaasaliinerup ukiuata tallimaata naanerata kingorna anigaasaliiffiusumik ukioq 0-2-mi iluanaarutininik akiliineq siulleq naammaginartumik ernialersorneqassaaq, ukiulli 5-t kingorna akiliineq ukiumi 3-5-imi anigaasaliineq naammaginartumik ernialersorneqassalluni. Ukiunut arlalinnut anigaasaliinernut iluanaarutininik akiliinernut tunngatillugu ukiuni attuumassuteqartuni ulloq 31. decembarimi erniat kisitsisaattut pisortat aalajangigaat aallaavigalugu ernialersuineq ukiumut naatsorsorneqassaaq.

Akilerateqareernermit suliffeqarfiup angusaasa 35 procentiinut killiliineq, anigaasaliisimasunut tamanut suliffeqarfiup innuttaasunik tapersersortarialinnik suliffissaqartitsisutut nalunaarsorsimasup ukiumoortumut ataatsimut katillugu iluanaarutininik tunniussinerinut atuuppoq. Procentip kisitsisita ukiumi iluanaarutit tunniunneqarnerini atuuppoq, anigaasaliisimasunut ataasiakkaanut iluanaarutininik tunniussinerit ukiunut arlalinnut tunngasuuneri apeqqutaatinnagu.

Siunnersuummi § 8, imm. 2 malillugu killiliineq aamma toqqaannangitsumik iluanaarutininut atuuppoq, ilanngullugu assersuutigalugu suliffeqarfik innuttaasunik tapersersortarialinnik suliffissaqartitsisutut nalunaarsorsimasooq anigaasaatinik piginnittuniit anigaasaatini piginneqataassutiminik pisippat.

Naleqquttumik erniaqartitsinissamut tunngavissarititaasutut siunnersuutigineqartoq danskit inatsisaanni, aamma Tului Nunaannit isumassarsiorfeqarnermik tunngaveqartumi, tunngavissarititaasunut naapertuuppoq.

Imm. 3-mut

Aalajangersagaq malillugu iluanaarutininik tunniussisoqassappat, inatsisit allat suliffeqarfiup malitassai, malittarisassai imaluunniit pilersitsinermut uppersarsaatai, immaqalu tamanna pillugu isumaqatigiissut malillugit iluanaarutininut aalajangersakkanut naapertuuttumik tamanna pissaaq.

Taamaalilluni siunnersuut ingerlatseqatigiiffinnut anigaasaliiffiusunut agguagassarsiat imaluunniit iluanaarutininik akiliisarneq pillugu ingerlatseqatigiiffiit pillugit inatsimmi malittarisassanik imaluunniit ingerlatseqatigiiffiit allat pillugit malittarisassanik atuuttunik allannguinissamik siunertaqanngilaq, ilanngullugit ingerlatseqatigiiffiit inatsisini imaluunniit isumaqatigiissutini malitassani malittarisassaliornernut naleqqiullugu sinneqartoorutiminnik piginnittunut nuussequsaanngitsut. Assersuutigalugu tassaasinnaapput peqatigiiffiit, tassani malittarisassa at malillugit ilaasortat akornanni sinneqartoorutit agguarneqarsinnaanatik. Aamma ingerlatseqatigiiffiusinnaavoq killeqartumik akisussaaffeqartoq (SMB), tassani malittarisassat malillugit sinneqartoorutit piginnittunut nuunneqarsinnaanatik. Aalajangersagaq anigaasaateqarfinnut attuumassuteqanngilaq, tassami anigaasaateqarfiit piginnittoqanngimmata.

## § 9-mut

### Imm. 1-imut

Aalajangersakkami aalajangersarneqarpoq, suliffeqarfik suliffeqarfittut innuttaasunik tapersersortarialinnik suliffissaqartitsisutut nalunaarsorsimasutut aatsaat akuersissuteqarfigineqarsimappat, takuuk § 4, suliffeqarfik suliffeqarfittut innuttaasunik tapersersortarialinnik suliffissaqartitsisutut nalunaarsorneqarsinnaasoq.

Suliffeqarfiup §§ 6-8-mi piumasaqaatit naammassisimappagit, suliffeqarfik suliffeqarfittut innuttaasunik tapersersortarialinnik suliffissaqartitsisutut nalunaarsorneqarnissaa akuerineqartoq suliffeqarfik nalunaarfigineqassasoq, Atuisartoqarnermut Unammilleqatigiinnermullu Aqutsisoqarfik aalajangiissaaq.

Suliffeqarfiup nalunaarsorneqarnissaa akuerineqartoq Atuisartoqarnermut Unammilleqatigiinnermullu Aqutsisoqarfiup suliffeqarfik nalunaarfigippagu, suliffeqarfik aatsaat suliffeqarfittut innuttaasunik tapersersortarialinnik suliffissaqartitsisutut nalunaarsortissinnaasoq, siunnersuummi § 9, imm. 1-imi aalajangersakkami aalajangersarneqarpoq. Suliffeqarfik suliffeqarfiup suliffeqarfittut innuttaasunik tapersersortarialinnik suliffissaqartitsisutut nalunaarsorneqarnissaanik akuerineqarsimasoq, takuuk siunnersuummi § 4, siunnersuummi kapitali 4 malillugu suliffeqarfinnut innuttaasunik tapersersortarialinnik suliffissaqartitsisutut nalunaarsuiffimi suliffeqarfittut innuttaasunik tapersersortarialinnik suliffissaqartitsisutut nalunaarsortissaaq, takuuk siunnersuummi § 9, imm. 2.

### Imm. 2-mut

Aalajangersagaq suliffeqarfiup suliffeqarfittut innuttaasunik tapersersortarialinnik suliffissaqartitsisutut nalunaarsorsimajunnaarnissaanut tunngasuvoq. Siunnersuummi Kapitali 4 malillugu innuttaasunik tapersersortarialinnik suliffissaqartitsisutut suliffeqarfinnut nalunaarsuisarfinnut suliffeqarfimmik innuttaasunik tapersersortarialinnik suliffissaqartitsisutut suliffeqarfittut Atuisartoqarnermut Unammilleqatigiinnermullu Aqutsisoqarfik aalajangersagaq malillugu nalunaarsuisassaaq.

Pisortanut eqqortunik naammattunillu paasissutissanik suliffeqarfiup tunniussisarnissaanut suliffeqarfiup qitiusumik aqutsisutut oqartussaasui akisussaasuupput. Akisussaaffimmiipput ilaatigut siunnersuummi § 12 malillugu nalunaarsuiffimmi innuttaasunik tapersersortarialinnik suliffissaqartitsisutut nalunaarsugaaneranut atugassanik paasissutissanik suliffeqarfiup tunniussaqaartarnera. Aalajangersagaq pineqartoq tassungalu nassuiaatit innersuussutigineqarput.

## § 10-mut

### Imm. 1-imut

Aalajangersagaq suliffeqarfiup suliffeqarfittut innuttaasunik tapersersortarialinnik suliffissaqartitsisutut nalunaarsorsimajunnaartinnissaanut tunngasuvoq. Aalajangersakkamit takuneqarsinnaavoq suliffeqarfik siunnersuummi §§ 6-8-mi nalunaarsorneqarnissamut piunasaqaatinik tamanik naammassinnikkunnaarpat, suliffeqarfiup suliffeqarfinnut innuttaasunik tapersersortarialinnik suliffissaqartitsisunut nalunaarsuiffimmi nalunaarsorsimanini allanngortissagaa nalunaarsugaajunnaarsillugulu. Aalajangersagaq taamaalilluni ilaatigut siunnersuummi §§ 6-8-mut atatillugu nassuiarneqarlunilu atorneqassaaq.

Siunnersuummi § 10, imm. 1-imi aalajangersagaq taamaalilluni suliffeqarfittut innuttaasunik tapersersortarialinnik suliffissaqartitsisutut nalunaarsorsimasoq siunnersuummi §§ 6-8-mi piunasaqaammik ataatsimik arlalinnilluunniit naammassinnikkunnaarpat, tassunga attuumassuteqarpoq, siunnersuummi § 5, imm. 2 malillugu akuersissuteqarneq Atuisartoqarnermut Unammilleqatigiinnermullu Aqutsisoqarfiup suli uterteqqusimannginneraa apeqqutaatinnagu.

Suliffeqarfik siunnersuummi §§ 6-8-mi piunasaqaammik ataatsimik arlalinnilluunniit naammassinnikkunnaarpat, suliffeqarfiup ingerlaannartumik tamanna siunnersuummi § 5, imm. 1 malillugu Atuisartoqarnermut Unammilleqatigiinnermullu Aqutsisoqarfimmut nalunaarutigissavaa.

Suliffeqarfik siunnersuummi §§ 6-8-mi nalunaarsorneqarnissamut piunasaqaatinik tamanik naammassinninngippat, § 10, imm. 1-imi aalajangersakkap tamatuma saniatigut malitsigisaanik, suliffeqarfiup innuttaasunik tapersersortarialinnik suliffissaqartitsisutut nalunaarsorsimasup, suliffeqarfinnut innuttaasunik tapersersortarialinnik suliffissaqartitsisunut nalunaarsuiffimmi nammineerluni nalunaarsugaajunnaarnissamut pisussaaffeqarpoq. Siunnersuummi § 5, imm. 2 malillugu suliffeqarfiup suliffeqarfittut innuttaasunik tapersersortarialinnik suliffissaqartitsisutut nalunaarsorneqarnissamik akuerineqarsimanerata utertinneqarnissaa pillugu Atuisartoqarnermut Unammilleqatigiinnermullu Aqutsisoqarfiup suli aalajangiisimannginnera apeqqutaatinnagu, aalajangersagaq atorneqassaaq.

Suliffeqarfik innuttaasunik tapersersortarialinnik suliffissaqartitsisoq siunnersuummi §§ 6-8-mi piunasaqaammik ataatsimik arlalinnilluunniit naammassinnikkunnaarpat, suliffeqarfittut innuttaasunik tapersersortarialinnik suliffissaqartitsisutut nalunaarsorsimaannarsinnaanngitsoq tassungalu atasunik iluaqutissartaasut atuinnaarsinnaanngikkai, qulakkeeriniarnermut aalajangersagaq iluaqutaassaaq.

Aalajangersagaq malillugu suliffeqarfiup siunnersuummi §§ 6-8-mi piumasaqaammik ataatsimik arlalinnilluunniit naammassinnikkunnaarnerata kingorna sapinngisamik piaarnerpaamik nalunaarsorsimajunnaarnissaq pissaaq.

Suliffeqarfimmi innuttaasunik tapersersortarialinnik suliffissaqartitsisutut nalunaarsorsimasumi qitiusumik aqutsinermi oqartussat nalunaarsorsimajunnaarnerup isumaginissaanut akisussaapput, takuuk § 12, imm. 2. Siunnersuummi § 12, imm. 2 tassungalu nassuiaatit takukkit.

Imm. 2-mut

Aalajangersagaq siunnersuummi § 10, imm. 1-imut atatillugu nassuiarneqarlunilu atorneqassaaq, tassani takuneqarsinnaalluni suliffeqarfik siunnersuummi §§ 6-8-mi nalunaarsorneqarnissamut piumasaqaatinik tamanik naammassinnikkunnaarpat, suliffeqarfiup suliffeqarfinnut innuttaasunik tapersersortarialinnik suliffissaqartitsisunut nalunaarsuiffimmi nalunaarsorsimanini suliffittut innuttaasunik tapersersortarialinnik suliffissaqartitsisutut nalunaarsorsimasup, nalunaarsorsimanini allanngortissagaa.

Aalajangersagaq malillugu siunnersuummi §§ 6-8-mi nalunaarsorneqarnissamut piumasaqaatit naammassineqarnissaanut amigaataasut piffissap naammaginartup, Atuisartoqarnermut Unammilleqatigiinnermullu Aqutsisoqarfiup aalajangersarneqartup, iluani suliffeqarfimmit iluarsineqarsinnaappata aamma iluarsiniarniarpagit, taamatut nalunaarsorsimajunnaarnerup isumaginissaanut taamaattoq suliffeqarfik pisussaaffeqanngilaq. Taamatut pisoqartillugu siunnersuummi § 5, imm. 1 malillugu tamanna pillugu Atuisartoqarnermut Unammilleqatigiinnermullu Aqutsisoqarfimmit suliffeqarfik taamaalilluni nalunaarfigineqassaaq, aamma siunnersuummi §§ 6-8-mi piumasaqaatinik naammassineqanngitsunik iluarsinissamut suliffeqarfik nalunaarsorsimasoq piffissamik naammaginartumik periarfissinneqarnissamut Atuisartoqarnermut Unammilleqatigiinnermullu Aqutsisoqarfimmut qinnuteqarluni.

Akuersinerup utertinneqarneranik kinguneqarsinnaasunik pissutsinik iluarsinissamut suliffeqarfik innuttaasunik tapersersortarialinnik suliffissaqartitsisutut nalunaarsorsimasoq piffissamik naammaginartumik qulakkeerunneqarnissaanut siunnersuut taamaalilluni iluaqutaassaaq.

Suliffeqarfiup piffissaliussamut killissaliussap aalajangersarneqartup iluani §§ 6-8-mi piumasaqaatit naammassineqanngitsut iluarsinngippagit, siunnersuummi § 5, imm. 2 malillugu akuersissuteqarnerup utertinneqarnissaa pillugu Atuisartoqarnermut Unammilleqatigiinnermullu Aqutsisoqarfik aalajangiissaaq. Nalinginnaasumik siunnersuummi § 5, imm. 2 tassungalu nassuiaatit innersuussutigineqarput.

Pisoqarsimasinnaavoq siunnersuummi §§ 6-8-mi piumasaqaammik ataatsimik arlalinnilluunniit naammassinnginneq pingaaruteqarluni imaluunniit annertuujulluni, taamatut piffissaliinissamik suliffeqarfik qinnuiginnikkaluartoq, pissutsit iluarsineqarnissaannut suliffeqarfimmut piffissamik aalajangiinissaq tulluanngitsoq Atuisartoqarnermut Unammilleqatigiinnermullu Aqutsisoqarfik naliliisariaqarluni.

Suliffeqarfiup suliffeqarfittut innuttaasunik tapersersortarialinnik suliffissaqartitsisutut nalunaarsorneqarnissamik akuerineqarsimaneranut atatiinnarnissaanullu piumasaqaatit naammassinngippagit, tamanna pillugu ingerlaannartumik Atuisartoqarnermut Unammilleqatigiinnermullu Aqutsisoqarfimmut ilisimatitsinissamut, takuuk siunnersuummi § 5, imm. 1, ingerlaannarlu pissutsit iluarsinissaannut, suliffeqarfik pisussaaffeqarpoq. Suliffeqarfiup ingerlaannartumik imaluunniit Atuisartoqarnermut Unammilleqatigiinnermullu Aqutsisoqarfimmit piffissaliunneqartup iluani pissutsit iluarsisimanngippagit aamma siunnersuummi §§ 6-8-mi piumasaqaatinik tamaginnik naammassinninngippat, suliffeqarfiup tamatuma kingorna namminerisaminik sapinngisamillu piaarnerpaamik suliffeqarfiit innuttaasunik tapersersortarialinnik suliffissaqartitsisut nalunaarsuiffianni nalunaarsorsimanini allanngortissavaa, taamaalilluni tamatuma kingorna suliffeqarfik suliffeqarfittut innuttaasunik tapersersortarialinnik suliffissaqartitsisutut nalunaarsorsimajunnaarluni.

#### *§ 11-mut*

##### *Imm. 1-imut*

Aalajangersakkami aalajangersarneqarpoq, suliffeqarfiit siunnersuut malillugu nalunaarsorsimasut atiminni nittarsaanominnilu suliffeqarfittut innuttaasunik tapersersortarialinnik suliffissaqartitsisutut nalunaarsorsimasutut taaguutip atornissaanut kisermaassisussaataitasut. CVR-nut nalunaarsuiffimmi Danmarkimi suliffittut innuttaasunik tapersersortarialinnik suliffissaqartitsisutut nalunaarsorsimasut "SITS"-mik nalunaaqutserneqartarput.

Taamaalilluni suliffeqarfiit suliffeqarfiup suliffeqarfittut innuttaasunik tapersersortarialinnik suliffissaqartitsisutut nalunaarsorneqarnissaata akuerineqarnissaanik qinnuteqarsimasut akuerineqarsimasullu kisimik taaguut "suliffeqarfittut innuttaasunik tapersersortarialinnik suliffissaqartitsisutut nalunaarsorsimasoq" suliffeqarfiup atiani nittarsaanneranilu "suliffeqarfittut innuttaasunik tapersersortarialinnik suliffissaqartitsisutut nalunaarsorsimasut" atorsinnaavaat.

Suliffeqarfik nalunaarsorsimasoq suliffeqarfimmut innuttaasunik tapersersortarialinnik suliffissaqartitsisunut siunnersuummut pineqartunut ilaasunut immikkut piumasaqaatinik

suliffeqarfiup naammassinninneranut immikkut ilisarnaatitut uppersarsaatitullu taaguummik "suliffeqarfittut innuttaasunik tapersersortarialinnik suliffissaqartitsisutut nalunaarsorsimasoq" atuisinnaavoq.

"Suliffeqarfittut innuttaasunik tapersersortarialinnik suliffissaqartitsisutut nalunaarsorsimasutut" taaguutip atornissaanut pisinnaatitaaneq, kisermaassisussaatitaanermut ilaangilaq. Taaguut taaneqartoq taamaalilluni suliffeqarfinit nalunaarsorsimanngitsunit atorpeqarsinnaangilaq, tassami taamatut nalunaarsugaaneq eqqaaneqartoq innuttaasunik tapersersortarialinnik suliffissaqartitsinerup iluani suliffeqarfinnik aalajangersimasunik immikkoortiterinermut tunngasuummat.

Aalajangersagaq taanna malillugu nalunaarsuineramik aqqissuussinermut kisermaassisussaatitaanermullu nalinginnaasunik siunertaavoq, ilaatigut aningaaserivinni, suleqatigisinnaasani soqutigisaqartunilu allani innuttaasunik tapersersortarialinnik suliffissaqartitsisunut suliaasaqarfiup ilisimaneqarnerulersinnissaa. Tamatuma saniatigut "suliffeqarfittut innuttaasunik tapersersortarialinnik suliffissaqartitsisutut nalunaarsorsimasutut" taaguummik eqqunngitsumik atuinissamut illersuilluni, kisermaassisussaatitaanermi sullitat, aningaasaliisartut allallu soqutiginnittut suliaasaqarfimmuut tatiginninnissaat qulakkeerpeqarpoq. Tunisassiortut suliffeqarfiillu ilaatigut unammilleqatigiinnermi iluaquserneqarnissaaq anguniarlugu, allaniit suliffeqarfimmuut "suliffeqarfittut innuttaasunik tapersersortarialinnik suliffissaqartitsisutut nalunaarsorsimasutut" taaguummik eqqunngitsumik atuillutik akikinngitsumik unammillerneqarnissamut illersorneqassapput.

Akunermuliullutik niuertut, suleqatigisartakkat ilaalu ilanngullugit suliffeqarfiup "suliffeqarfittut innuttaasunik tapersersortarialinnik suliffissaqartitsisutut nalunaarsorsimanera" innersuussutigalugu suliffeqarfimmik imaluunniit taassuma nioqqutissiaanik kiffartuussineranilluunniit nittarsaassinerinut aalajangersagaq aamma atuuppoq.

Taaguutip "suliffeqarfittut innuttaasunik tapersersortarialinnik suliffissaqartitsisutut nalunaarsugaasoq" ingerlatseqatigiiffinnut inatsisitigut imaluunniit aningaasaateqarfinnut inatsisitigut suliffeqarfiup aqqa taarsinngilaa, aamma siunnersuummi inatsisit allat malitsigisaannik suliffeqarfinnut ataasiakkaanut piumasaqaataasinnaasunut sunnerneqanngillat. Siunnersuut taamaallaat taaguutip aalajangersimasup atorpeqarnissaanut pisinnaatitaanermut tunngassuteqarpoq, suliffeqarfik qanoq iluseqartoq pineqarnersoq tassungalu atasut pissutsit apeqqutaatinnagit.

Siunnersuut malillugu taaguutip "suliffeqarfittut innuttaasunik tapersersortarialinnik suliffissaqartitsisutut nalunaarsugaasoq" atorpeqarnissaanut kisermaassisussaatitaaneq pillugu

piumasaqaatinik suliffeqarfiit innuttaasunik tapersersortarialinnik suliffissaqartitsisut naammassinninnissaat, nalunaarsuisarnermut aaqqissuussinermit aamma suliffeqarfiit innuttaasunik tapersersortarialinnik suliffissaqartitsisutut nalunaarsorsimasut tusaamaneqarnerannut annertuumik pingaaruteqarpoq. Taamaattumik taaguummik "suliffeqarfittut innuttaasunik tapersersortarialinnik suliffissaqartitsisutut nalunaarsugaasoq" eqqunngitsumik atuisoq siunnersuummi § 26 malillugu akiliisitsinermit pineqaatissinneqarsinnaavoq. Tamanna suliffeqarfinnut nalunaarsorsimasunut, nalunaarsorneqarnissamut piumasaqaatinik naammassinnikkunnaartunut, suliffeqarfinnut nalunaarsorsimanngitsunut, taaguummik atuisunut, aamma akunnermuliullutik niuertunut, suleqatigisanut ilaalu ilanngullugit, suliffeqarfik "suliffeqarfittut innuttaasunik tapersersortarialinnik suliffissaqartitsisutut nalunaarsorsimasuusoq" innersuussutigalugu suliffeqarfimmik imaluunniit taassuma nioqqutissiaanik nittarsaasunut, atuuppoq.

#### Imm. 2-mut

Aalajangersakkami allassimavoq, suliffeqarfik siunnersuummi § 4 malillugu nalunaarsorneqarnissamut akuerineqarsimappat aamma siunnersuummi kapitali 4 malillugu suliffeqarfinnut innuttaasunik tapersersortarialinnik suliffissaqartitsisunut nalunaarsuiffimmi suli nalunaarsortissimappat, taaguutip "suliffeqarfittut innuttaasunik tapersersortarialinnik suliffissaqartitsisutut nalunaarsorsimasoq" atorineqarnissaanut suliffeqarfik taamaallaat pisinnaatitaasoq.

Taamaalilluni pineqartoq tassaavoq marloqiusatut aalajangiinermit tunngavik, tamatuma malitsigisaanik piffissami aalajangersimasumi taaguutip illersugaasup unioqqutitsisuunngitsumik atorineqalersinnaaneranut atuuttut akuersissut pigineqarlunilu eqqortumik nalunaarsuisoqarsimassalluni.

Paarlattuanik aalajangersagaq malillugu, suliffeqarfiup suliffeqarfittut innuttaasunik tapersersortarialinnik suliffissaqartitsisutut nalunaarsorneqarnissaanut akuersissuteqarneq Atuisartoqarnermut Unammilleqatigiinnermullu Aqutsisoqarfimmit utertinneqarpat, takuuk siunnersuummi § 5, imm. 2, suliffeqarfiup taaguummik "suliffeqarfittut innuttaasunik tapersersortarialinnik suliffissaqartitsisutut nalunaarsorsimasoq" atuisinnaatitaanera atorunnaassaaq.

#### § 12-mut

##### Imm. 1-imut

Suliffeqarfimmi innuttaasunik tapersersortarialinnik suliffissaqartitsisutut nalunaarsorsimasumi qitiusutut aqutsinermit oqartussat akisussaaffiitut pisussaaffiinullu aalajangersagaq tunngasuvoq. Aalajangersagaq malillugu qitiusumik aqutsinermit oqartussat oqartussanut paasissutissanik tunniussinermit paasissutissanik eqqortunik naammattunillu

aamma paasissutissanik siunnersuut malillugu pissutsinut tunngasunut nalunaarsuinnermut suliffeqarfiup tunniussinissaanut akisussaasuupput. Akisussaannermut ilaatigut ilaapput suliffeqarfiup suliffeqarfittut innuttaasunik tapersersortarialinnik suliffissaqartitsisutut nalunaarsorneqarnissamik qinnuteqarnerani, suliffeqarfiup suliffeqarfinnut innuttaasunik tapersersortarialinnik suliffissaqartitsisutut nalunaarsuiffimmi suliffeqarfittut innuttaasunik tapersersortarialinnik suliffissaqartitsisutut nalunaarsortinnerani, pissutsit siunnersuummi pineqartunut ilaasut pillugit oqartussanut nalunaaruteqarnermi suliffeqarfiup paasissutissanik tunniussinera aamma pisortat suliffeqarfimmik nakkutilliinerani aamma pissutsit ingerlatallu siunnersuummi pineqartunut ilaasut pilugit paasissutissanik tunniussineq.

Paasissutissat Atuisartoqarnermut Unammilleqatigiinnermullu Aqutsisoqarfiup suliamik suliarinninneranut siunnersuullu malillugu aalajangiinneranut atugassat eqqortuunissaannut iluaqusiinissaq aalajangersakkap qulakkiissavai. Aalajangersakkami aamma siunertaavoq, paasissutissat qinnuteqarnermi, nalunaarsuinnermi kingusinnerusukkullu nalunaarusiornermi nalunaarutigineqartut eqqortuunerisa qulakkeernissaannut qitiusumik aqutsinnermi oqartussat immikkut pisussaaffeqartut erseqqissaanissaq.

Taaguut "qitiusumik aqutsinnermi oqartussat" ingerlatseqatigiiffiit pillugit inatsisip Kalaallit Nunaannut atuutilersinneqarnera pillugu peqqussummi kingusinnerusukkut allanngortinneqartumi § 5, imm. 1, nr. 4-mut naapertuuttumik nalinginnaasumik paasineqassaaq. Qitiusumik aqutsinnermi oqartussat tassaapput suliffeqarfinni pisortaaneqartuni siulersuisoqartunilu siulersuisut. Suliffeqarfinni taamaallaat pisortaaneqarfeqartuni qitiusumik aqutsinnermi oqartussat tassaapput pisortaaneqarfik. Suliffeqarfinni pisortaaneqarfeqartuni nakkutilliisoqartunilu qitiusumik aqutsinnermi oqartussaq aamma tassaavoq pisortaaneqarfik.

Imm. 2-imut

Aalajangersakkami allassimavoq, suliffeqarfiup suliffeqarfittut innuttaasunik tapersersortarialinnik suliffissaqartitsisutut nalunaarsuiffimmi, tamanna pillugu § 12-imi aalajangersakkat malillugit suliffeqarfittut innuttaasunik tapersersortarialinnik suliffissaqartitsisutut nalunaarsorsimajunnaarsinnissaanut, takuuk kapitali 3, suliffeqarfiup nalunaarsorsimasup qitiusumik aqutsisuini oqartussat akisussaasuusut.

Aalajangersakkami siunertaavoq suliffeqarfiup suliffeqarfittut innuttaasunik tapersersortarialinnik suliffissaqartitsisutut nalunaarsuiffimmiinnissamut, siunnersuummi piumasaqaatinik suliffeqarfiup suliffeqarfittut innuttaasunik tapersersortarialinnik suliffissaqartitsisutut nalunaarsorsimasup eqqortitsinissaata, qulakkeerneqarnissaa. Aalajangersakkami aamma siunertaavoq, suliffeqarfiup suliffeqarfittut innuttaasunik tapersersortarialinnik suliffissaqartitsisup siunnersuummi piumasaqaatinik eqqortitsinissaanut suliffeqarfimmi qitiusumik aqutsinnermi oqartussat akisussaasuusut, erseqqissarneqarnissaa.



Nalunaarsorsimajunnaarsitsineq suliffeqarfiup piumasaqaatinik naammassinnikkunnaarnerata kingorna sapinngisamik piaartumik pissaaq. Takuuk siunnersuummi § 10 aammalu tassunga nassuiaatit.

Atuisartoqarnermut Unammilleqatigiinnermullu Aqutsisoqarfik siunnersuummi § 5, imm. 2 malillugu suliffeqarfiup suliffeqarfittut innuttaasunik tapersersortarialinnik suliffissaqartitsisutut nalunaarsorneqarnissaanut akuersissut uterteqquneqassasoq aalajangiisimappat, suliffeqarfimmi qitiusumi aqutsisut utertitsinissaq pillugu aalajangiinerup suliffeqarfimmut anngutereernerata kingorna, nammineerlutik suliffeqarfik nalunaarsorsimajunnaasissavaat. Aalajangiisuvoq nalunaarutiginninnerup suliffeqarfimmut anngunneranut piffissaq, ilanngullugu allakkatigoortumik suliffeqarfiup allakkanut nakkartitsisarfianut imaluunniit email-ikkut allakkat isertarfiannut imaluunniit elektroniskimik nalunaaruteqartarfimmi allami.

Suliffeqarfiup § 10 malillugu suliffeqarfinnut innuttaasunut ikiortarialinnut suliffissaqartitsisunut nalunaarsuiffimmi suliffeqarfittut innuttaasunut ikiortarialinnut suliffissaqartitsisutut nalunaarsorsimajunnaarsinnissaanut suliffeqarfiup pisussaaffini naammassisimangippagu, siunnersuummi § 24 malillugu akiliisitsinissamik pineqaatissiisoqarsinnaavoq.

### *§ 13-imut*

Suliffeqarfiup innuttaasunik tapersersortarialinnik suliffissaqartitsisutut nalunaarsorsimasup nalunaarsorneqarnermiit aammalu nalunaarsorsimasuunermt piffissaq tamaat nalunaarusiornissamut, paasissutissanik nalunaaruteqarnissamut uppersaatinillu nassiussinissamut pisussaaffiinut siunnersuummi § 13 tunngassuteqarpoq.

Imm. 1-imi aalajangersagaq malillugu suliffeqarfik innuttaasunik tapersersortarialinnik suliffissaqartitsisutut nalunaarsorsimasoq ukiumut naatsorsuutit pillugit inatsisip Kalaallit Nunaannut atuutilersinneqarnera pillugu peqqussut kingusinnerusukkut allannguuteqartoq naapertorlugu ukiut tamaasa ukiumut nalunaarusiamik saqqummiussisussaavoq, aammalu suliffeqarfiup minnerpaamik naatsorsuusiordermi immikkoortiterineq B pillugu malittarisassat malittussaallugit.

Ukiumut naatsorsuutit pillugit inatsit malillugu ukiumut nalunaarusiordermi maleruagassani, katitertakkatut ilusiliinermik taagorneqartoq aallaavigineqarpoq, tassani maleruagassanut suliffeqarfiup malissallugit pisussaaffigisaannut, aallaaviatigut suliffeqarfiup angissusaa apequtaalluni. Tassa imaappoq, suliffeqarfiit mikisut piumasaqaatit ikittut pingaarnerusunullu tunngasut malissavaat, suliffeqarfiit anginerusut piumasaqaatit amerlanernit sukumiinerusullu malissallugit.

Ukiumut naatsorsuutit pillugit inatsit malillugu aallaavisoq tassaavoq ingerlatseqatigiiffiit suulluunniit tamarmik killeqartumik akisussaaffeqartut ukiumut nalunaarusiamik tunniussissasut. Takukkit ukiumut naatsorsuutit pillugit peqqussummi § 3, imm. 1, nr. 1-5. Taamaattoq peqqussummi § 4, imm. 1-imi angissutsimut killiliinerit malitsigisaanik ukiumut nalunaarusiamik tunniussinissaq pillugu piumasaqaammut suliffeqarfiit innuttaasunik tapersortarialinnik suliffissaqartitsisut ilaatinneqanngissinnaapput.

Peqqussummi § 4, imm. 1 malillugu suliffeqarfiit inuussutissarsiummik ingerlataqartut aalajangersimasut pillugit inatsimmi § 3-mi (suliffeqarfiit peqatigiiffiillu killilimmik akisussaaffeqartut) aamma § 4-mi pineqartunut ilaasut (piginneqatigiinnikkut ingerlatseqatigiiffiit killilimmik akisussaaffeqartut), angissusissanut killiliussatut allassimasut ataaniikkunik, ukiumut nalunaarusiamik tunniussinissamut pisussaatinneqassanngillat.

Suliffeqarfiup piffissami oqimaaqatigiissitsinermi ukiuni naatsorsuuseriusuni tulleriinni marlunni angissutsinit makkunanga pingasuusunit marluk qaangersimanngippagit, ilaatitsinnginneq atuutissaq:

- 1) Aningaasat oqimaaqatigiissinnerisa inerneranni 7 mio. kr.-t
- 2) Ilanngaattissat ilanngaatigereerlugit 10 mio. kr.-t
- 3) Ukiumi naatsorsuuseriusumi agguaqatigiissillugu ulloq naallugu sulisut 10-t

Ilaatitsinnginnerli taamaallaat ukiumut naatsorsuutit pillugu peqqussummi § 4, imm. 1-imi erseqqissumik taaneqartunut atuuppoq.

Suliffeqarfiit allat, ilanngullugit aktiaatileqatigiiffiit aamma piginneqatigiinnikkut ingerlatseqatigiiffiit killilimmik akisussaaffeqartut aamma aningaasaateqarfiit inuussutissarsiummik ingerlataqartut, imm. 1-imi angissusissanut killiliussanik allatigut naammassinninersut apeqqutaatinnagu, ukiumut naatsorsuutit pillugit peqqussut malillugu ukiumut nalunaarusiamik saqqummiussisussaapput, tassami suliffeqarfiit taakkua minnerpaamik naatsorsuuserineq B pillugu malittarisassanik malinnittussaammata. Takuuk ukiumut naatsorsuutit pillugit peqqussummi § 7.

Taamaalilluni pisoqarsinnaavoq suliffeqarfik innuttaasunik tapersortarialinnik suliffissaqartitsisutut nalunaarsorsimasoq ukiumut naatsorsuutit pillugit peqqussut malillugu ukiumut naatsorsuutitik tunniussinissamut pisussaaffeqarnani. Taamaattoq siunnersuummi § 13, imm. 1 malillugu taanna apeqqutaatinnagu suliffeqarfik innuttaasunik tapersortarialinnik suliffissaqartitsisutut nalunaarsorsimasoq ukiumut naatsorsuutit pillugit inatsit naapertorlugu ukiumut naatsorsuutitik saqqummiussinissamut, minnerpaamillu naatsorsuuserinermi B-mi malittarisassanik malinninnissamut, pisussaaffeqarpoq.

Siunnersuummi imm. 1-imi taamaalilluni aalajangersarneqarpoq suliffeqarfiit innuttaasunik tapersersortarialinnik suliffissaqartitsisutut nalunaarsorsimasut, ukiumut naatsorsuutit pillugit inatsit malillugu naatsorsuutininik saqqummiussinissamik pisussaaffeqarnermut ilaatinneqanngitsut, minnerpaamik naatsorsuuserineri B malillugu naatsorsuutininik saqqummiussissasut.

Naatsorsuuserineq B taamaalilluni "suliffeqarfinnut mikisunut" piffissami oqimaaqatigiissitsineri ukiuni naatsorsuuseriorfiusuni tulleriinni marlunni angissutsinit makkunanga pingasuusunit marluk qaangersimannngikkaat suliffeqarfinnut nassuiaassutigineqarpoq:

- 1) oqimaaqatigiissitsinerup inenera 36 mio. kr.
- 2) ilanngaattissat ilanngaatigereerlugit kaaviaatitat 72 mio. kr.
- 3) ukiup naatsorsuuseriorfiusup ingerlanerani piffissaq tamaat atorfeqartut agguaqatigiissillugu 50-inik amerlassuseqartut, takuuk ukiumut naatsorsuuseriorneri inatsimmi §7, imm. 2, nr. 1.

Suliffeqarfik innuttaasunik tapersersortarialinnik suliffissaqartitsisutut nalunaarsorsimasoq killiliussanik taaneqartunik qaangiisimappat, ukiumut naatsorsuutit pillugit peqqussut malillugu ukiumut naatsorsuutininik naatsorsuusereriaatsini malillugu saqqummiussiinnassaaq.

Suliffeqarfik innuttaasunik tapersersortarialinnik suliffissaqartitsisutut nalunaarsorsimasoq aamma tamanit takuneqarsinnaasunik naatsorsuuteqassaaq. Tamatumani siunertaavoq suliffeqarfiit innuttaasunik tapersersortarialinnik suliffissaqartitsisutut nalunaarsorsimasut pillugit paasiuminartitsinissaat (ersarissuutinnissaat), ilanngullugu suliffeqarfiup aningaasaqarnera sinneqartoorutillu atorneqarneri. Tamanut saqqummiineq siunnersuummi imm. 2 malillugu ukiumut nalunaarusiat nassiunnerisigut pissaaq, tamatuma kingorna taakku tamanit pissarsiarineqarsinnaalissallutik. Nalinginnaasumik siunnersuummi § 13, imm. 2 tassungalu nassuiaatit innersuussutigineqarput.

#### Imm. 2-mut

Aalajangersakkami allassimavoq suliffeqarfittut innuttaasunik tapersersortarialinnik suliffissaqartitsisutut nalunaarsorsimasoq ukiumut nalunaarusiani kingusinnerpaamik, ukiumut naatsorsuutit pillugit inatsisip Kalaallit Nunaannut atulersinneqarnera pillugu peqqussummi kingusinnerusukkut allanngortinneqartumi, tamanna pillugu aalajangersakkat naapertorlugit suliffeqarfiup ukiumut nalunaarusiamik Inuussutissarsiornermut Aqutsisoqarfimmut nassiussinerata peqatigisaanik, Atuisartoqarnermut Unammilleqatigiinnermullu Aqutsisoqarfimmut nassiutissavaa.

Aalajangersagaq suliffeqarfik innuttaasunik tapersersortarialinnik suliffissaqartitsisutut nalunaarsorsimasoq tamanut ammasumik naatsorsuuteqassasoq, piunasaqaammut atatillugu

isigineqassaaq. Tamatumani siunertaavoq suliffeqarfiit innuttaasunik tapersersortarialinnik suliffissaqartitsisutut nalunaarsorsimasut pillugit ersarissuutitsinissaq. Tamanut saqqummiussineq siunnersuummi imm. 2 malillugu ukiumut nalunaarusiat nassiunnerisigut pissaaq, takuuk § 14.

Ukiumut nalunaarusiaq, kingusinnerpaamik suliffeqarfiup ukiumut nalunaarusiami Inuussutissarsiornermut Aqutsisoqarfimmut nassiunnerata peqatigisaanik, Atuisartoqarnermut Unammilleqatigiinnermullu Aqutsisoqarfimmut nassiunneqassaaq. Taamaattoq Atuisartoqarnermut Unammilleqatigiinnermullu Aqutsisoqarfimmut nassiussineq akuersissuteqarnerup kingorna tunngavissaqarani kinguarsaanertaqanngitsumik pissaaq. Ukiumut nalunaarusiaq ukiumut naatsorsuutit naammassineqarnerinit kingusinnerpaamik qaammatit 6-t qaangiutsinnagit tiguneqareersimassaaq. Ukiumut nalunaarusiaq, ilaatigut aamma § 7, imm. 1, nr. 5-imik aammalu paasissutissat § 1, imm. 2, nr. 6 malillugu nalunaarsuinermi suliffeqarfiup tunniussassaasa kingorna piumasaqaatinik suliffeqarfiit naammassinninnissaat qulakkeeriniarlugu, Atuisartoqarnermut Unammilleqatigiinnermullu Aqutsisoqarfiup misissugassanik tigusilluni misissuinerani, atorneqassaaq.

Suliffeqarfik siunnersuummi §§ 6-8-mi piumasaqaammik ataatsimik arlalinnilluunniit naammassinninngippat, ukiumut nalunaarusiamik Atuisartoqarnermut Unammilleqatigiinnermullu Aqutsisoqarfimmut nassiussinermi, siunnersuummi § 5, imm. 1 malillugu suliffeqarfik innuttaasunik tapersersortarialinnik suliffissaqartitsisutut nalunaarsorsimasooq Atuisartoqarnermut Unammilleqatigiinnermullu Aqutsisoqarfimmut ingerlaannartumik nalunaaruteqarnissamik pisussaaffeerutsinneqanngilaq. Suliffeqarfik siunnersuummi §§ 6-8-mi piumasaqaammik ataatsimik arlalinnilluunniit naammassinnikkunnaartoq ukiumut naatsorsuutinit takuneqarsinnaanersoq apeqqutaatinnagu, tamanna atuuppoq.

Imm. 3-mut

Suliffeqarfiit innuttaasunik tapersersortarialinnik suliffissaqartitsisutut nalunaarsorsimasut ersarissuutinnissaannik qulakkeerinissaq, aalajangersakkami siunertaavoq, ilanngullugu suliffeqarfiup aningaasaqarneranut sinneqartoorutinillu atuinerannut tunngasut.

Imm. 1-imi aamma 2-imi aalajangersakkat assigalugit, aalajangersakkami erseqqissarneqarpoq, suliffeqarfiup innuttaasunik tapersersortarialinnik suliffissaqartitsisutut nalunaarsorsimasup ukiumut naatsorsuutit pillugu peqqussut malillugu ukiumut nalunaarusiamut piumasaqaatit naammassisimassagai. Imm. 2-mut atatillugu eqqaaneqartutut, suliffeqarfik ukiumut naatsorsuutit pillugit inatsit malillugu ukiumut naatsorsuutininik saqqummiussinissaq pillugu malittarisassani pineqartunut ilaatinneqarnerisooq apeqqutaatinnagu, tamanna atuuppoq. Takukkit siunnersuummi § 13, imm. 1-imut nassuiaatit matuma siulianiittut.

Tamatuma saniatigut siunnersuummi imm. 3-mi allassimavoq, ilaatigut pissutsit suliffeqarfiup aningaasaataanik iliuseqarfiginninnermut tunngasut, ukiumut naatsorsuutinit takuneqarsinnaanngitsut, pillugit suliffeqarfiit innuttaasunik tapersersortarialinnik suliffissaqartitsisutut nalunaarsorsimasut ukiumut nalunaarusiortassasut. Siunnersuummi § 13, imm. 3 malillugu ukiumut nalunaarusiamik nassiussinnermut atatillugu suliffeqarfik innuttaasunik tapersersortarialinnik suliffissaqartitsisutut nalunaarsorsimasoq pissutsit makku pillugit nalunaarusiussaag:

Nr. 1-imut

Suliffeqarfiit innuttaasunik tapersersortarialinnik suliffissaqartitsisutut nalunaarsorsimasut aalajangersagaq malillugu ilaatigut maannakkut siusinnerusukkullu aqutsisuni ilaasut sulinnerminnut akissarsiaat tamarmiusut aqutsisuni oqartussanut tamaginnut immikkut agguarlugit immaqalu aamma suliffeqarfiup pilersitsisuinut piginnittuullu akissarsiat, ukiumoortumik nalunaarutigisassavaat.

Imm. 3, nr. 1-imi aqutsisunut taaguummi pineqartunut ilaapput suliffeqarfimmi oqartussani ilaasoq kinaluunniit, pingaarnertigut ulluinnarniluunniit aqutsisuusoq. Ilaatigut tassaapput pisortaaneqarfik, siulersuisut nakkutilliisullu. Pilersitsisut piginnittuulluunniit akissarsiaqartinneqarpata, tamanna aamma nalunaarusiornermi imm. 3, nr. 1-imi takuneqarsinnaassaaq.

Pilersitsisunut, piginnittunut aqutsisunulluunniit akissarsisitsinermi siunnersuummi § 8, imm. 1-imi iluanaarutitigut killiliinermik suliffeqarfiup innuttaasunik tapersersortarialinnik suliffissaqartitsisutut nalunaarsorsimasup avaqqussinnginnissaanik takunnissinnaanissamut paasissutissanik Atuisartoqarnermut Unammilleqatigiinnermullu Aqutsisoqarfiup toqqammavissaqartuarnissaanik qulakkeerinissaq aalajangersakkap siunertaraa. Taamaattorli qanigisanut aningaasarsiaqartitsinermik siunnersuisartuunermillu isumaqatigiissutit nr. 2 malillugu paasissutissiinissamut pisussaaffimmut ilaassaaq.

Suliffeqarfiup akissarsiat tamarmiusut ilaallu ilanngullugit paasissutissiissutigissavai, ilagalugit soraarnerussutisianut akiliutit soraarnermilu ajunngitsorsiassat, ukiumi naatsorsuusiorfiusumi nalunaarusiornermut tunngasumi, maannakkut siusinnerusukkulluunniit aqutsisuni ilaasortanut akiliutit imaluunniit akiliutaasimasut. Paasissutissat suliffeqarfimmi aqutsisoqarfinnut ataasiakkaanut agguarneqassapput. Inuk ataaseq aqutsisoqarnermi oqartussanut arlalinnut ilaappat, ilanngullugu assersuutigalugu pisortaaneqarfimmi siulersuisunilu, aammalu pineqartoq aqutsisuni inissisimaffiit marluk isumaginerinut akissarsiaqartinneqarluni, inuup pineqartup akissarsiai tamarmik aqutsisuni sulianut agguarneqassapput aammalu pineqartuni aqutsisutut sulinerni paasissutissiissutigineqarlutik. Inuk ataaseq aqutsisuni arlalinnik suliaqarpat, ilanngullugu

assersuutigalugu pisortaaneqarfimmi marlunnik inissisimaffeqarluni, pineqartup akissarsiffigisartagaannik, tamanna naatsorsuinermit takuneqarsinnaassaaq aammalu atorfinnut ataasiakkaanut piffissamut suliffiusumut agguarneri itisilerneqassallutik.

Nr. 2-mut

Imm. 3, nr. 2-mi aalajangersagaq malillugu ukioq naatsorsuusiorfiusoq tamaat suliffeqarfiup qanimullu suleqatigisap akornanni isumaqatigiissutaasimasut suulluunniit pillugit paasissutissat ukiumut nalunaarusiamit takuneqarsinnaassapput. Isumaqatigiissut paasineqassaaq, suliffeqarfiup aamma qanimut suleqatigisap akornanni kiffartuussinikkut paarlaasseqatiginerit suulluunniit, ilanngullugu ilaatigut aamma suliffeqarfiup pigisaanik nalilinnik tunisineq.

Nr. 3-mut

Aalajangersakkami pineqarput aningaasat tigoriaannaat imaluunniit pigisat nalillit allat suulluunniit, inummut imaluunniit inatsisitigut pisussaaffeqartumut pisinnaatitaasumullu agguagarstisinerit imaluunniit tunniunneqartut, ilanngullugu siunnersuummi § 7, imm. 1, nr. 5, litra a-b malillugu aningaasaliisunut aningaasaliinernullu iluanaarutitut agguagarasiat. Ukiumit naatsorsuusiorfiusumit tamarmit tamanna pillugu paasissutissat ukiumut nalunaarusiamit takuneqarsinnaassapput.

Nr. 4-mut

Imm. 3, nr. 4-mi nalunaarusiornissamut piunasaqaammi siunertaavoq, Inatsisartut inatsisaanni § 7, imm.1, nr. 1, nr. 3 aamma nr. 4-mik suliffeqarfiup naammassinniinnarnissaata, aamma § 1, imm. 2, nr. 2, nr. 4 aamma nr. 5 malillugit naleqquttumik annertussuseqartumik paasissutissat tunniunneqartut nutarterisarnissaata allanngortitsisarnissaatalu qulakkeerneqarnissaa. Aalajangersakkat taaneqartut taakkunungalugu nassuiaatit takukkit.

Aalajangersakkap atuunnerani, suliffeqarfik innuttaasunik tapersersortarialinnik suliffissaqartitsisutut nalunaarsorsimasoq, politikkinik suleriaatsinillu, suliffeqarfiup pisortanut attuumassuteqanngitsumik innuttaasunik ikiuinissamik siunertaqarnermik naammassinninneranik aammalu akuutitsisumik akisussaassusilimmillu aqunneqarneranik qulakkeerisussanik, nassuiaassasoq. Taaguut politikit nassuiarneqassaaq aamma atituumik atuutinneqassalluni, taamaalilluni ilaatigut suliffeqarfiup malittarisassai, suliffiup iluani najoqqutassat, anguniakkat, periusissiat allallu uppernarsaatit suliffeqarfiup qanoq sulineranik allaaserinnittut pineqartunut ilaatinneqarlutik. Suliffeqarfiup tamatuma saniatigut politikkit iliuuserisanut qanoq piviusunngortinnerlugit, nassuiaassaaq. Assersuutigalugu aqutsisut nalunaarsuiffianik atulersitsinikkut, ingerlatanik suliaqarnikkut, siunnerfigineqartunik akuutitsinikkut, sinneqartoorutit iliuuseqarfiginerisigut imaluunniit suliffeqarfiup niuernikkut periusissiaani aamma niuernikkut ingerlataanni suleriaatsit allat atorlugit, tamanna

pisinnaavoq. Suliffeqarfiup aamma siunissami sulinissamut pilersaarutit naatsorsuutigisallu paasissutissiissutigissavai.

Pisortanut attuumassuteqannginnissamut tunngatillugu, suliffeqarfiup nalunaarsuineri paasissutissat taamaallaat nutartertassavai, takuuk siunnersuummi § 1, imm. 2, nr. 4.

Imm. 4-mut

Suliffeqarfiup innuttaasunik tapersortarialinnik suliffissaqartitsisutut nalunaarsorsimasup iluanaarutit tunniunneqarnissaat toqqarpagu, taanna siunnersuummi imm. 4 malillugu Atuisartoqarnermut Unammilleqatigiinnermullu Aqutsisoqarfimmut naatsorsuineri nassiussissaaq, tassani aningaasaatit aningaasaliissutaasimasut qanoq ernialersugaallutik iluanaarutit akilerneqartut aningaasaliisimasunut ataasiakkaanut naapertuunneri takuneqarsinnaassalluni.

Aalajangersagaq siunnersuummi § 7, imm. 1, nr. 5-imut aamma § 8-mut atatillugu nassuiarneqassaaq atuutsinneqassallunilu. Aalajangersakkat malillugit suliffeqarfimmik innuttaasunik tapersortarialinnik suliffissaqartitsisutut nalunaarsorsimasumik piginnittut, aningaasaliissutigineqaqqaarsimasut ukiumut naammaginatsumik erniamik tapilerlugit aningaasaliissutaqqaarsimasunut naapertuuttunik, piffissami suliffeqarfimmik piginnittuunermi agguagarsianik ataatsimoortunik taamaallaat tiguisinnaatitaapput. Aalajangersakkat taaneqartut aamma taakkununga oqaaseqaatit takukkit.

Taamatut naatsorsuisinnaanissamut suliffeqarfiup aningaasaliissuteqarsimasunut ataasiakkaanut makku suussusersissavai:

- 1) Aningaasat qassit aningaasaliissutigineqarsimanersut.
- 2) Iluanaarutit tunniussineq ukiumut sorlermut tunngasuunersoq. Ukioq iluanaarutit akiliiffioreersoq naatsorsuineri ilaatinneqassanngilaq.
- 3) Piffissami pineqartumi aningaasaatit naammaginatsumik ernialersorneri. Ukiumut ernialersuineq ukiumut ataatsimut aningaasaliinerup atuuffigisaanut, aningaasaliisumik iluanaarutit akiliiffiusimannigsumut naatsorsorneqassaaq. Taamaalilluni siunissami piffissaq aningaasaliiffiusoq imaluunniit piffissaq iluanaarutit akiliiffioreersoq aningaasaliiffiusoq ilanngullugu naatsorsorneqassanngilaq.

Nassiussinerup kingorna ernialersuineq pineqartoq naammaginatsumersoq, suliffeqarfiup tamanna pillugu tunngavilersuutaa tunuliaqutaralugu, Atuisartoqarnermut Unammilleqatigiinnermullu Aqutsisoqarfik naliliissaaq.

Suliffeqarfiup siunnersuummi § 7, imm. 1, nr. 5-imi piunasaqaatinik naammassinninneranik, aamma paasissutissanik suliffeqarfiup nalunaarsuineri tunniussimasanik nutarterisarnissaanik, takuuk siunnersuummi § 1, imm. 2, nr. 6, takunnissinnaanissamut

Atuisartoqarnermut Unammilleqatigiinnermullu Aqutsisoqarfiup paasissutissanik toqqammavissaqartuarnissaanik qulakkeerinnissamik aalajangersagaq ilaatigut siunertaqarpoq.

*Imm. 5-imut*

Suliffeqarfiit innuttaasunik tapersersortarialinnik suliffissaqartitsisutut nalunaarsorsimasut paasissutissanik assigiinnik arlaleriarlutik nalunaaruteqartannginnissaat siunnersuummi imm. 5-ip qulakkeerneqassaaq. Paasissutissat siunnersuummi imm. 3-mi allassimasut suliffeqarfiup ukiumut nalunaarusiaanit takuneqarsinnaappata, suliffeqarfik paasissutissanut pineqartunut nalunaaruteqarnissaq pillugu piumasqaammik naammassinnittutut isigineqassaaq. Suliffeqarfik taamaalilluni ukiumut nalunaarusiap saniatigut paasissutissat taaneqartut pillugit immikkut nalunaarusiussanngilaq.

*Imm. 3 malillugu nalunaarusiorneq ukiumut nalunaarusiami aqutsisut* nalunaarutaanniitineqarpat, takuuk imm. 5, aamma suliffeqarfik ukiumut naatsorsuutit pillugit inatsimmi maleruagassat malillugit kukkunersiorneqarnissamut pisussaaffeqartinneqarpat, ukiumut naatsorsuutit pillugit inatsisip Kalaallit Nunaannut atuutilersinneqarnera pillugu peqqussummut nalunaarummi kingusinnerusukkut allanngortinneqartumi tamanna pillugu aalajangersakkat malillugit aqutsisut nalunaarutaannut tunngatillugu kukkunersiuisup oqaaseqaataanut nassuiaat ilaatinneqassaaq. Ukiumut naatsorsuutini immaqalu suliffeqarfissuup naatsorsuutaanik kukkunersiuinermut atatillugu aqutsisut nalunaarutaanni paasissutissat ukiumut naatsorsuutini immaqalu suliffeqarfissuup naatsorsuutaani paasissutissanut naapertuunnersut, kukkunersiuisup misissortussaavai. Kukkunersiuisoq tamanna pillugu oqaaseqaateqassaaq.

#### *§ 14-imut*

Aalajangersakkami allassimavoq suliffeqarfiup innuttaasunik tapersersortarialinnik suliffissaqartitsisutut nalunaarsorsimasup ukiumut nalunaarusiaa aamma aalajangersakkami imm. 1-5 malillugit allatigut nalunaarusiaa suliffeqarfittut innuttaasunik tapersersortarialinnik suliffissaqartitsisutut nalunaarsuiffimi, takuuk kapitali 4, nalunaarsorneqassasoq.

Aalajangersakkap malitsigisaanik suliffeqarfiit innuttaasunik tapersersortarialinnik suliffissaqartitsisutut nalunaarsorsimasut taakkunanilu qitiusumik aqutsisuni oqartussat, suliffeqarfiup ukiumut nalunaarusiaanik aamma aalajangersagaq malillugu allatigut nalunaarusiamik, suliffeqarfinnut innuttaasunik tapersersortarialinnik suliffissaqartitsisunut nalunaarsuiffimmi, takuuk siunnersuummi kapitali 4, nalunaarsuinissamut pisussaaffeqarput.

#### *§ 15-imut*

Aalajangersagaq, suliffeqarfimmi innuttaasunik tapersersortarialinnik suliffissaqartitsisutut



nalunaarsorsimasumi qitiusumik aqutsisutut oqartussat akissarsianik tunniussinermut tunngatillugu pisussaaffeqarnernut, tunngassuteqarpoq.

Taaguut “qitiusumik aqutsinermi oqartussat”, ingerlatseqatigiiffiit pillugit inatsisip Kalaallit Nunaannut atuutilersinneqarnera pillugu peqqussummi kingusinnerusukkut allanngortinneqartumi § 5, imm. 1, nr. 4-mut naapertuuttumik nalinginnaasumik paasineqassaaq. Qitiusumik aqutsinermi oqartussat tassaapput suliffeqarfinni pisortaaneqartuni siulersuisoqartunilu siulersuisut. Suliffeqarfiit taamaallaat pisortaaneqarfeqartut qitiusumik aqutsinermi oqartussat tassaapput pisortaaneqarfik. Suliffeqarfinni pisortaaneqarfeqartuni nakkutilliisoqartunilu qitiusumik aqutsinermi oqartussat aamma pisortaanerupput.

Isumannaatsumik aqutsinissamik aamma aqutsisunut sulisutullu atorfeqartunut allanut akissarsisitsinermi suliffeqarfiup aningaasaataanik aqutsinermik qulakkeerinissamik, qitiusumik aqutsinermi oqartussat pisussaaffeqarput. Siunnersuut malillugu akissarsiarititassanik tunniussinermi, atorfiup suunera suliallu annertussusaa malillugu nalinginnaasutut isigineqartut aningaasat qaangissanngilaat, aamma suliffeqarfiup innuttaasunik ikiuiniarnermik siunertaanut tunngatillugu illersorneqarsinnaasutut isigineqartut malillugit, aningaasartai nalinginnaasutut isigineqartunit annertuneroqqusaanngillat. Pisuni ataasiakkaani pissutsinik attuumassuteqartunik tamaginnik ataasiakkaatigut naliliineq malillugu allanneqartut aalajangiiffineqartariaqarput.

Akissarsiat atorfiup suunera annertussusaa lu malillugit nalinginnaanersut pillugu naliliinermi, suliffeqarfinni sanilliunneqarsinnaasuni suliaasanut taamaaqataannut akiliutitut aningaasat suut akilerneqartarnersut, ilaatigut pingaartinneqassaaq. Tamatuma saniatigut suliffeqarfiup innuttaasunik tapersersortarialinnik suliffissaqartitsisutut nalunaarsorsimasup innuttaasunik ikiuiniarnermik siunertaa, akissarsiat illersorneqarsinnaasutut isigineqarsinnaanersut naliliinermi, isiginiarneqassaaq. Tamatumunnga pissutaavoq, suliffeqarfiup innuttaasunik ikiuiniarnermik siunertaanut naapertuuttumik atorfinitsitsinermi politikkimik ingerlatsinissamik aqutsisut pisussaaffeqarnerat.

Qitiusumik aqutsinermi oqartussat akissarsititsinerit tamarmik siunnersuut naapertorlugu pinissaannut akisussaasuupput. Peqatigiiffinni aningaasaateqarfinnilu assersuutigalugu siulersuisut akissarsianut nalinginnaasumik akisussaasuusarput.

Siunnersuummi § 5, imm. 2 malillugu, suliffeqarfiup siunnersuummi §§ 6-8-mi piumasaqaatit naammassisimangippagit, suliffeqarfiup innuttaasunik tapersersortarialinnik suliffissaqartitsisutut nalunaarsorsimasutut akuersissuteqarnerup utertinneqarnissaa pillugu Atuisartoqarnermut Unammilleqatigiinnermullu Aqutsisoqarfik aalajangiisussaavoq.

Suliffeqarfiup siunnersuummi § 15 imaluunniit siunnersuummi piumasagaatit allat suliffeqarfiup naammassisimangikkai aqutsisoqarfimmit ilisimaneqalerpat, pissutsinik suliffeqarfik iluarsissasoq suliffeqarfimmi innuttaasunik tapersersortarialinnik suliffissaqartitsisutut nalunaarsugaasumi qitiusumik aqutsinermi oqartussanut, siunnersuummi § 19, imm. 1 malillugu Atuisartoqarnermut Unammilleqatigiinnermullu Aqutsisoqarfik peqqusisinnaavoq.

### *§ 16-imut*

#### *Imm. 1-imut*

Suliffeqarfiup atorunnaarsinnerani sinneqartoorutit atorneqarnissaannut suliffeqarfiup innuttaasunik tapersersortarialinnik suliffissaqartitsisutut nalunaarsorsimasup pisussaaffeqarneranut, aalajangersagaq tungassuteqarpoq. Suliffeqarfik taamaallaat nalunaarsugaajunnaaginnarsinnaanalu kingunitsiannigualu suliffeqarfiup piginnittuut iluanaarutininik akiliuteqassannginnerata qularnaarnissaanik aalajangersagaq siunertaqarpoq. Taamaalilluni sinneqartoorutininik ikiortarialinnut isumagisaqarnissat pillugit siunnersuutit malittarisassiaanik sanioqutitsisoqassannginnera aalajangersakkap qularnaassavaa.

Siunnersuummi § 16-imi siunertaavoq, siunnersuummi § 7, imm. 1, nr. 5-ip avaqquunissaanut periarfissat killeqartinnissat.

Siunnersuummi § 16, imm. 1-imi allassimavoq, suliffeqarfiup innuttaasunik tapersersortarialinnik suliffissaqartitsisutut nalunaarsorsimasup atorunnaarsitsinermi sinneqartoorutaasimasinnaasut siunnersuummi § 7, imm. 1, nr. 5-imut naapertuuttumik atussagai.

Sinneqartoorutaasimasinnaasut taamaalillutik suliffeqarfiup atorunnaarsinnerani makkua arlaat ataaseq arlallilluunniit periaaseralugit atorneqassapput:

- 1) Suliffeqarfimmi innuttaasunik tapersersortarialinnik suliffissaqartitsisutut nalunaarsorsimasuni allani aningaasaliineq imaluunniit tunissuteqarneq
- 2) Nalinginnarmik iluaqutaasussanik imaluunniit nalinginnarmik ajunngitsuliornermik siunertaqartunut suliniaqatigiiffinnut tunissutit
- 3) Suliffeqarfimmi piginnittut akornanni iluanaarutininik killeqartumik tunniussineq allatigulluunniit sinneqartoorutininik avitseqatigiinneq.

Aamma siunnersuummi § 7, imm. 1, nr. 5-imi tassungalu nassuiaatit takukkit.

#### *Imm. 2-mut*

Aalajangersagaq siunnersuummi § 7, imm. 1, nr. 5-imut aamma § 8-mut tassungalu nassuiaatinut atatillugu isigineqassaaq.

Siunnersuummi imm. 2-mi suliffeqarfiup innuttaasunik tapersortarialinnik suliffissaqartitsisutut nalunaarsorsimasup aningaasaataasa atorneqarnissaannut tunngatillugu aningaasaatit appartinnissaat ilaaterlugu, killiliineq annertusineqarpoq. Suliffeqarfiup innuttaasunik tapersortarialinnik suliffissaqartitsisutut nalunaarsorsimasup taamaalilluni, aningaasaatinik appartitsinermi agguagarsitsinerup killiliussat § 7, imm. 1, nr. 5-imi aalajangersarneqartut iluaniitsinnissaat, qulakkiissavaa.

Siunnersuummi § 24, imm. 1, nr. 5 malillugu § 16, imm. 1-imi aamma imm. 2-mik unioqutitsineq akiliisitsinermik pineqaatissiivigineqarsinnaavoq.

Imm. 3-mut

Suliffeqarfiup innuttaasunik tapersortarialinnik suliffissaqartitsisutut nalunaarsorsimajunnaarnerata kingorna siunnersuummi § 7, imm. 1, nr. 5 aamma § 8 naapertorlugu suliffeqarfiup nalunaarsorsimanerata nalaani isertitaasimasunik sinneqartoorutitik atuinissamut pisussaaffeqarneq, aalajangersakkami aalajangersarneqarpoq. Siunnersuummi § 16, imm. 3 suliffeqarfiup sinneqartoorutiminik innuttaasunik ikiuiniarnermik isumaginninnissamut pisussaaffeqarnera aamma § 10 malillugu suliffeqarfiup nalunaarsorsimajunnaarnerata kingorna atuuttussanngorlugu annertusitinneqarpoq.

Pisussaaffeqarneq suliffeqarfiup suli nalunaarsorsimanerata nalaani suliffeqarfiup isertitarisimasaanit sinneqartoorutit ilaannut atuuppoq. Suliffeqarfiup nalunaarsorsimajunnaarnerata kingorna isertitaanit suliffeqarfiup sinneqartoorutaannut, siunnersuummi § 7, imm. 1, nr. 5 malillugu suliffeqarfik pisussaaffeqanngilaq. Nalunaarsorsimajunnaarnek ukiup naasorsuiffiup qeqqani pissappat nalunaarsorsimajunnaarfik sioqqullugu kingornatigullu piffissamut naleqqiussilluni ukiumi sinneqartoorutit agguataarneqarsinnaapput, ukiup ingerlanerani isertitat il.il. qanoq agguataarsimani sianiginagit.”

Suliffeqarfiup § 16, imm. 3-mik unioqutitsinera akiliisitsinermik pineqaatissiivigineqarsinnaavoq, takuuk § 24, imm. 1, nr. 6.

#### *§ 17-imut*

Imm. 1-imut

Aalajangersakkamiippoq siunnersuut malillugu suliffeqarfiit suliffeqarfittut innuttaasunik tapersortarialinnik suliffissaqartitsisutut nalunaarsorneqartarnerannut atugassamik Naalakkersuisunut nammineerlutik nalunaarsuiffimmik pilersitsinissaannut ingerlatsinissaanullu inatsimmi tunngavissaq.

Aalajangersagaq ilaatigut § 18-imi aalajangersagaq peqatigitillugu nassuiarneqarlunilu atorpeqassaaq, tassaniilluni nalunaarsuiffimmik tassungalu atasunik pissutsinik attuumassuteqartunik tamanik pilersitsineq ingerlatsinerlu pillugu aalajangersakkanik erseqqinnerusunik Naalakkersuisut aalajangersaanissaannut tunngavissaq.

Siunnersuut malillugu suliffeqarfiit nalunaarsorneqarnerannut atugassamik nalunaarsuinermi nalunaarsuiffimmik Naalakkersuisut nammineq pilersitsiniarlutik ingerlatsiniarlutillu toqqarpassuk, tamanna assersuutigalugu taamatut nalunaarsuinermi nalunaarsuiffimmik pilersitsineq ingerlatsinerlu naalakkersuisoqarfimmut imaluunniit Naalakkersuisuni oqartussatut immikkoortortamut allanut Naalakkersuisunit isumagisassanngortinneqarluni, tamanna suliaqarnermi pisinnaavoq.

Imm. 2-mut

Aalajangersagaq malillugu, imm. 1-imi taaneqartutut Naalakkersuisut sullillugit oqartussap imaluunniit suliffeqarfiup nalunaarsuiffimmik pilersitsinissaa ingerlatsinissaa pillugu Kalaallit Nunaanni imaluunniit Danmarkimi pisortani oqartussat imaluunniit pisortat suliffeqarfiutaata isumaqatigiissuteqarnissaannut Naalakkersuisunut inatsimmi tunngavissaliisoqarpoq. Aamma isumaqatigiissut malillugu Naalakkersuisut sullillugit nalunaarsuiffimmik taamaattumik oqartussat suliffeqarfilluunniit taamaallaat pilersitsisinnaallunilu imaluunniit ingerlatsisinnaavoq.

Imm. 1-imi taaneqartutut nalunaarsuiffimmik Atuisartoqarnermut Unammilleqatigiinnermullu Aqutsisoqarfik pilersitsissasoq ingerlatsissasorlu imaluunniit Naalakkersuisunit pilersinneqartumik nalunaarsuiffimmik taamaattumik Atuisartoqarnermut Unammilleqatigiinnermullu Aqutsisoqarfik ingerlatsissasoq, Naalakkersuisut assersuutigalugu Atuisartoqarnermut Unammilleqatigiinnermullu Aqutsisoqarfimmut isumaqatigiissuteqarsinnaapput.

Aalajangersagaq ilaatigut § 18-imi aalajangersakkamut peqatigitillugu paasineqarlunilu atorpeqassaaq, taanna tamatumunnga atatillugu nalunaarsuiffimmik pissutsinilla tamanit attuumassuteqartunik pilersitsinissaq ingerlatsinissarlu pillugit ersarinnerusunik aalajangersaanissamut Naalakkersuisunut piginnaatitsinermik imaqarpoq.

Imm. 3-mut

Siunnersuut malillugu suliffeqarfiit innuttaasunik tapersersortarialinnik suliffissaqartitsisutut suliffeqarfiit nalunaarsornerinut atugassamik oqartussat suliffeqarfiullu nalunaarsuiffiata atorpeqarnissaa pillugu Kalaallit Nunaanni Danmarkimiluunniit pisortani oqartussanik imaluunniit pisortat suliffeqarfiutaannik isumaqatigiissuteqarnissamut Naalakkersuisut inatsimmi tunngavissinneqarput.

Aalajangersagaq ilaatigut imm.1-imut aamma 2-mut ataqatigiissillugu isigineqassaaq. Periarfissaq alla taamaalilluni tassaavoq, siunnersuut malillugu suliffeqarfiit innuttaasunik tapersersortarialinnik suliffissaqartitsisutut nalunaarsorneqarnerannut atugassamik oqartussat suliffeqarfiullu nalunaarsuiffiannik pioreersumik atuinissaat pillugu Kalaallit Nunaanni Danmarkimiluunniit pisortani oqartussanik imaluunniit pisortat suliffeqarfiutaannik Naalakkersuisut isumaqatigiissuteqarsinnaanerat. Taamaattoq taanna aamma nalunaarsuiffiusinnaavoq nutaaq.

Piginnaatitsissut aamma IT atorlugu nalunaarsuiffimmik toqqaanissamut tunngatillugu eqaatsumik periarfissiivoq, aammalu assersuutigalugu taanna tulluartut isigineqarpat, Inuussutissarsiornermut Aqutsisoqarfiup IT atorlugu nalunaarsuiffiata atorneqarnissaa periarfissaalluni. Siunnersuut malillugu suliffeqarfiit innuttaasunik tapersersortarialinnik suliffissaqartitsisutut nalunaarsorneqarnerinut atatillugu assersuutigalugu Danmarkimi CVR-nut nalunaarsuiffiup imaluunniit nalunaarsuiffiup allap atorneqarnissaa pillugu, aalajangersagaq malillugu Danmarkimi Inuussutissarsiornermut Aqutsisoqarfimmik Naalakkersuisut isumaqatigiissuteqarsinnaapput. Taamaaliornikkut suliffeqarfiup innuttaasunik tapersersortarialinnik suliffissaqartitsisutut nalunaarsorneqarnera, CVR normutaarniarluni nalunaarsuiffimmi tassani pinnaassaaq. Suliffeqarfik taamaalilluni sumiiffimmi ataasiinnarmi nalunaarsorneqassaaq, suliassaqarfimmilu Inuussutissarsiornermut Aqutsisoqarfiup ilisimasai misilittagaalu atorluarneqassallutik.

Aalajangersagaq ilaatigut § 18-imi aalajangersakkamut peqatigitillugu paasineqarlunilu atorneqassaaq, taanna tamatumunnga atatillugu nalunaarsuiffimmik pissutsinillu tamanit attuumassuteqartunik pilersitsinissaq ingerlatsinissarlu pillugit ersarinnerusumik aalajangersaanissamut Naalakkersuisunut piginnaatitsinermik imaqarpoq.

#### *§ 18-imut*

Aalajangersagaq siunnersuummi § 17, imm.1-3 malillugu nalunaarsuiffimmik tassungalu atasunik pissutsinik attuumassuteqartunik tamanik pilersitsinissaq ingerlatsinissarlu pillugit aalajangersakkanik erseqqinnerusunik Naalakkersuisut aalajangersaanissaannut nalinginnaasumik piginnaatitsissummik imaqarpoq. Naalakkersuisut ilaatigut siunnersuummi § 18, nr. 1-8-mi pissutsit eqqaaneqartut pillugit aalajangersakkanik erseqqinnerusunik aalajangersaasinnaapput. Taagorneqartut tamakkiisuunngillat. Naalakkersuisut taamaalillutik siunnersuummi § 17, imm. 1-3 malillugit nalunaarsuiffimmik pilersitsinermut ingerlatsinermullu tunngasunik aalajangersakkanik allanik aamma aalajangersaasinnaapput.

Nalunaarsuinermit aqqissuussinermik allaffissornikkut aqutsineq pillugu aalajangersakkanik Naalakkersuisut aalajangersaasinnaatinnissaannut aalajangersagaq siunertaqarpoq. Aalajangersakkat taamaattut nalunaarutini aalajangersarneqarsinnaapput. Tamanna

assersuutigalugu tassaasinnaavoq inatsit taanna malillugu sumi nalunaarsuisoqassanersoq, pissutsit suut suliffeqarfiup nammineq nalunaarsussanera, kiisalu paasissutissat uppersaatillu suut tamanut saqqummiunneqassanersut pillugit aalajangersakkat.

#### Nr. 1-imut

Nalunaarsuiffimmik pilersitsineq ingerlatsinerlu pillugu aalajangersakkanik erseqqinnerusunik Naalackersuisut ilaatigut aalajangersaasinnaapput. Aalajangersagaq ilaatigut siunnersuummi § 17, imm. 1-3-mut, nalunaarsuiffimmik pilersitsinissamut ingerlatsinissamullu periarfissanut assigiinngitsunut tunngasumut, ilanngullugit Kalaallit Nunaanni imaluunniit Danmarkimi nalunaarsuiffimmik pioreersumik atuisinnaaneq, ataqatigiissillugu isigineqassaaq.

#### Nr. 2-mut

Nalunaarsuiffimmut periarfissaqarneq atuissarlu pillugu Naalackersuisut aalajangersakkanik aalajangersaasinnaapput, ilanngullugu suliffeqarfiit inuillu siunnersuummi pineqartunut ilaasut qanoq nalunaarsuiffimmut isersinnaanersut atuisanersullu. Pisortat attaveqarnissaannut tunngatillugu malittarisassianik aalajangersaasarneq pillugu nr. 6 innersuussutaavoq.

Naalackersuisut assersuutigalugu Naalackersuisuni oqartussatut immikkoortumiit imaluunniit Atuisartoqarnermut Unammilleqatigiinnermullu Aqutsisoqarfimmiit tamanna pillugu emailkkut paasissutissanut uppersaatinullu assigiinngitsunut suliffeqarfiit inuillu siunnersuummi pineqartunut ilaasut taamaalillutik isersinnaassapput.

Suliffeqarfiit inuillu siunnersuummi pineqartunut ilaasut taamaalillutik Naalackersuisuni oqartussatut immikkoortumiit imaluunniit Atuisartoqarnermut Unammilleqatigiinnermullu Aqutsisoqarfimmiit tamanna pillugu emailkkut qinnuiginnillutik paasissutissanut uppersaatinullu assigiinngitsunut isersinnaalissapput. Taakku assersuutigalugu tassaasinnaapput suliffeqarfittut innuttaasunik tapersersortarialinnik suliffissaqartitsisutut nalunaarsorsimasutut akuerineqarneq pillugu paasissutissat, suliffeqarfittut innuttaasunik tapersersortarialinnik suliffissaqartitsisutut nalunaarsorsimajunnaarneq, ukiumut nalunaarusiamik nalunaarsuineq aamma nalunaarusianik paasissutissanillu allanik nalunaarsuineq, tamanna pillugu Naalackersuisut aalajangersakkanik aalajangersaasimappata.

Nittartakkami atuisunngortinneqarnikkut aamma nittartakkami atuisutut ateq atorlugu isernikkut siunnersuummi pineqartunut ilaasut suliffeqarfiit inuillu nalunaarsuiffimmut periarfissaqarnerat atuissaallu pillugit Naalackersuisut aamma aalajangersakkanik aalajangersaasinnaapput. Suliffeqarfiit inuillu siunnersuummi pineqartunut ilaasut nittartakkami isernerinut atatillugu isumannaallisaanikkut suleriaatsit pillugit ilaatigut aalajangersakkanik Naalackersuisut aalajangersaasinnaapput. Tamanna assersuutigalugu

pisinnaavoq NemID-ip assigisaaluunniit atsiornermik elektroniskimik ilisarinissaannut aaqqissuussinerup atorneratigut.

Suliffeqarfiit inuillu siunnersuummi pineqartunut ilaasut nittartakkami aaqqissuussineq paasissutissanut uppernarsaatinullu assigiinngitsunut qanoq atuisinnaanerit pillugu Naalackersuisut aamma aalajangersaasinnaapput. Taakku assersuutigalugu tassaasinnaapput suliffeqarfittut innuttaasunik tapersersortarialinnik suliffissaqartitsisutut nalunaarsorsimasutut akuerineqarneq pillugu paasissutissat, suliffeqarfittut innuttaasunik tapersersortarialinnik suliffissaqartitsisutut nalunaarsorsimajunnaarneq, ukiumut nalunaarusiamik nalunaarsuineq aamma nalunaarusianik paasissutissanillu allanik nalunaarsuineq, tamanna pillugu Naalackersuisut aalajangersakkanik aalajangersaasimappata.

Imm. 3-mut

Siunnersuummi § 18, imm. 3-mi siunertaavoq, siunnersuummi §§ 10 aamma 12, imm. 2 malillugit suliffeqarfik qaqugu qanorlu nalunaarsussanersoq nalunaarsorsimajunnaassanersorlu pillugu malittarisassanik aalajangersaanissamut Naalackersuisut piginnaatinneqarnissaat. Tamanna aamma siunnersuummi § 13 malillugu nalunaarusiornernut, suliffeqarfinnut innuttaasunik tapersersortarialinnik suliffissaqartitsisunut nalunaarsuiffimmi nalunaarsorneqartussanut, takuuk siunnersuummi § 14, atuuppoq. Siunertaavoq suliffeqarfiit paasissutissanik pisariaqartunik sapinngisamik nammagassiinngitsumik piniarsinnaalersillugit, nalunaarsuiffimmik aaqqissuussisoqarnissaa. Nalunaarutiginninnermi nalunaarusiorfissanik assigiissaakkanik imaluunniit immersugassanik maligassiiviusunik suliaqarnikkut tamanna assersuutigalugu pisinnaavoq, taakkunani marluusuni suliffeqarfiup paasissutissanik pisariaqartunik tunniussinissaa qulakkeerneqassalluni.

Nr. 4-mut

Siunnersuut malillugu nalunaarusiortarneq pillugu aalajangersakkanik Naalackersuisut aalajangersaasinnaapput. Aalajangersagaq ilaatigut siunnersuummi § 13-imut, § 19, imm. 3-mut aamma § 21-mut ataqatigiissillugu isigineqassaaq.

Siunnersuummi § 13, imm. 2 malillugu suliffeqarfiit innuttaasunik tapersersortarialinnik suliffissaqartitsisutut nalunaarsorsimasut ukiut tamaasa ukiumut nalunaarusiamik Atuisartoqarnermut Unammilleqatigiinnermullu Aqutsisoqarfimmut nassiussisassapput, takuuk siunnersuummi § 13, imm. 1. Siunnersuummi § 13, imm. 3 malillugu suliffeqarfiit innuttaasunik tapersersortarialinnik suliffissaqartitsisut ukiumut nalunaarusiamik nassiussinermut atatillugu, tamanna Atuisartoqarnermut Unammilleqatigiinnermullu Aqutsisoqarfimmit pisariaqartutut isigineqarpat, pissutsit siunnersuummi § 13, imm. 3, nr. 1-4-mi taaneqartut pillugit Atuisartoqarnermut Unammilleqatigiinnermullu Aqutsisoqarfimmut nalunaaruteqassapput. Takukkit siunnersuummi § 13 tassungalu nassuiaatit.

Siunnersuummi § 21 malillugu Atuisartoqarnermut Unammilleqatigiinnermullu Aqutsisoqarfik ukiut tamaasa aammalu kingusinnerpaamik ulloq 1. februaari ingerlatat pissutsillu siunnersuummi pineqartunut ilaasut pillugit aammalu Atuisartoqarnermut Unammilleqatigiinnermullu Aqutsisoqarfiup nakkutilliinera aamma ukiup sialiani siunnersuut malillugu aalajangiinerit pillugit ukiumoortumik nalunaarusiamik Naalackersuisunut nassiussisassaaq. Aalajangersakkanik aalajangersaanissamut aammalu Atuisartoqarnermut Unammilleqatigiinnermullu Aqutsisoqarfik nalunaarusianik allanik aamma ingerlatat pissutsillu siunnersuummi pineqartunut ilaasut pillugit aamma Atuisartoqarnermut Unammilleqatigiinnermullu Aqutsisoqarfiup nakkutilliinera aamma siunnersuut pillugu aalajangiineri pillugit paasissutissanik Naalackersuisunut nassiussisasoq aalajangiinissamut, siunnersuummi § 21, imm. 2-mi aalajangersakkami Naalackersuisut inatsimmi tunngavissinneqarput.

§ 18, nr. 4-mi aalajangersagaq, nalunaarusiorneq pillugu aalajangersakkanik erseqqinnerusunik Naalackersuisut aalajangersaanissaannut nalinginnaasumik inatsimmi tunngavissamik imaqarpoq. Assersuutigalugu ilusai, akulikissusissai imarisaalu pillugit malittarisassanik erseqqinnerusunik aalajangersaasoqarsinnaavoq. Tamatuma saniatigut assersuutigalugu nalunaarusiornermut angusallu pillugit isertuussinissaq pillugu malittarisassanik erseqqinnerusunik aalajangersaasoqarsinnaavoq. Taamatut aalajangersaanerit nalunaarutini Naalackersuisunit aalajangersarneqarsinnaapput.

Nr. 5-imut

Aalajangersagaq IT atorlugu periaatsinik aalajangersimasunik, immikkut digitalikkut angissutsinik, digitalikkut atsiornernik atuineq aamma siunnersuut malillugu nalunaarsuineri, nalunaarsugaajunnaarnermi nalunaaruteqarnermilu ilutsinik imarisaanullu piunasaqaatit allat pillugit aalajangersakkanik Naalackersuisut aalajangersakkanik aalajangersaanissaannut inatsimmi tunngavissiivoq.

Aalajangersakkami siunertaavoq eqaatsumik maleruagassiinissamik qulakkeerinnissaq, ilanngullugu ilaatigut IT atorlugu periaatsimik toqqaanissamut tunngatillugu, aammalu assersuutigalugu taanna tulluurtutut isigineqarpat, Inuussutissarsiornermut Aqutsisoqarfiup IT atorlugu periaasiata atorneqarnissaa periarfissiissutigineqarsinnaalluni.

Nr. 6-imut

Paasissutissat nalunaarsuiffimmiittut pillugit aamma paasissutissat qanoq annertutigisumik tamanut saqqummiunneqartarnissaat pillugu aalajangersakkanik Naalackersuisut aalajangersaasinnaapput. Uppernarsaatinik tamanut saqqummiussineq pillugu siunnersuummi nr. 6-imi piginnaatitsissut siunnersuutigineqartoq assersuutigalugu innuttaasunik ikiuiniarnermik siunertanut tunngasunik malittarisassani allannguinerit suliffeqarfimmit namminermik tamanut saqqummiunneqarnissai imaluunniit nammineq nalunaarsuiffinni,



nalunaarsuiffiit taakkununnga ineriartortinneqarsimappata, siunnersuummi § 13 malillugu nalunaaruteqarnissaq pillugu malitarisassanik aalajangersaanermut atorneqarsinnaavoq.

Nr. 6-imi siunertat ilaat tassaavoq, suliffeqarfinni innuttaasunik tapersersortarialinnik suliffissaqartitsisutut nalunaarsorsimasuni ersarissuutitsisinnaanissamut iluaqusiinissaq. Paasissutissat suliffeqarfiup tunniussai aamma nalunaarsorneqartut tamanut saqqummiunneqartarneri pillugu aalajangersakkanik aalajangersaasoqarneratigut, tamanna pisinnaavoq. Suliffeqarfiup innuttaasunik ikiuiniarnermik siunertaata kiisalu paasissutissat § 13 malillugu suliffeqarfiup nalunaarutigisassaasa tamanit pissarsiarineqarsinnaasuunissaat siunertaavoq.

Nr. 7-imut

Siunnersuut malillugu nalunaarsuinerumut, nalunaarsorsimajunnaarnerumut nalunaaruteqarnermullu akisussaasuuneq pillugu aalajangersakkanik Naalackersuisut aalajangersaasinnaapput, ilanngullugit ilaatigut nalunaarsuinerup, nalunaarsorsimajunnaarnerup isumaginissaanut peqqissaartumik piginnaatitsinerumut aamma tassunga atatillugu uppernarsaatit nassiuunneqartut atuuttuunissai eqqarsaatigalugit.

§ 12-imi aalajangersagaq malillugu oqartussanut paasissutissanik tunniussisoqarnerani aamma siunnersuut malillugu pissutsinut tunngasunik paasissutissat nalunaarsornerini paasissutissanik eqqortunik naammattunillu suliffeqarfiup tunniussineranut qitiusumik aqutsinerumut oqartussat akisussaasuupput. Akisussaannerumut ilaatigut ilaatinneqarput suliffeqarfittut innuttaasunik tapersersortarialinnik suliffissaqartitsisutut nalunaarsorneqarnissamut akuerineqarnissamik qinnuteqarnermi, suliffeqarfinnut innuttaasunik tapersersortarialinnik suliffissaqartitsisunut nalunaarsuiffimmi suliffeqarfittut innuttaasunik tapersersortarialinnik suliffissaqartitsisutut nammineq nalunaarsortinnermi, pissutsit siunnersuummut ilaasut pillugit oqartussanut nalunaaruteqarnermi aamma pisortat suliffeqarfimmik nakkutilliinerani aamma siunnersuummut ilaasunik pissutsit ingerlatallu pilugit paasissutissanik tunniussinermi suliffeqarfiup paasissutissanik tunniussinera. Takukkit siunnersuummi § 12 tassungalu nassuiaatit.

Siunnersuummi § 18, nr. 7-imi ilaatigut qinnuteqarnermi, nalunaarsuinermi kingusinnerusukkullu nalunaarusiornermi paasissutissat nalunaarutigineqartut eqqortuunerisa qulakkeerneqarnissaannut qitiusumik aqutsinerumut oqartussat immikkut pisussaaffeqarnerat, aamma siunnersuut malillugu nalunaarsuinermik, nalunaarsugaajunnaarnermik imaluunniit paasissutissanik nalunaaruteqarnermik tunniussinermillu qitiusumik aqutsinermi oqartussanit taakku isumaginissaannut inummik piginnaatitaasutut akisussaasumut tamanna pingaaruteqanngitsoq pillugu maleruagassanik aalajangersaanissamut Naalackersuisut piginnaatinneqarput.

Siunnersuummi § 18, nr. 7-mi piginnaatitsissummut siunertaasoq ilaatigut tassaavoq, paasissutissat siunnersuut malillugu Atuisartoqarnermut Unammilleqatigiinnermullu Aqutsisoqarfiup sulianik suliarinninneranut aalajangiineranullu atugassat eqqortuunerinut iluaqusiinissamik periarfissiinissaq.

Nr. 8-mut

Suliffeqarfiit inuillu nalunaarsuiffimmut isersinnaanermut atuisinnaanermullu atatillugu aningaasartuutininik akiliinissaq pillugu aalajangersakkanik aalajangersaanissamut aalajangersagaq Naalakkersuisunut tunngavissiivoq.

Assersuutigalugu, ilaatigut nalunaarsuinermit aamma IT atorlugu periaatsimik atuinermit aningaasartuutininik imaluunniit akiliutininik akiliinernik utertitsisoqarnissaa pillugu aalajangersakkanik Naalakkersuisut aalajangersaasinnaapput. Utertitsilluni akiliinerit akiliutillu nalunaarsuinermit ilaalu ilanngullugit aningaasartuutininut nalinginnaasunik annerpaamik matussusiinnaassapput.

Assersuutigalugu, kingusinaartumik akiliinermi aamma kingusinaartumik akiliinermut atatillugu ernianik akiliinermi allakkanik akileeqqusissutininik nassiussineq pillugu Naalakkersuisut aalajangersakkanik aalajangersaasinnaapput. Ernianik akiliineq kingusinaarluni akiliinermi erniat pillugit Kalaallit Nunaanni inatsisinut sukkulluunniit atuuttunut naapertuutissapput.

### *§ 19-imut*

Imm. 1-imut

Aalajangersagaq malillugu siunnersuummi pineqartunut ilaasunik pissutsininik Atuisartoqarnermut Unammilleqatigiinnermullu Aqutsisoqarfik nakkutilliisuvoq.

Siunnersuut malillugu aalajangersakkat aalajangersarneqartut akuersinermilu piumasaqaatit eqqortinneqarnissaat pillugu aalajangersagaq malillugu Atuisartoqarnermut Unammilleqatigiinnermullu Aqutsisoqarfik peqqussuteqarsinnaavoq. Peqqussuteqarneq suliffeqarfinnut inunnullu siunnersuummi pineqartunut ilaasunut nalunaarutigineqarsinnaavoq.

Imm. 2-mut

Aalajangersakkap malitsigisaanik, paasissutissanik tamaginnik aamma allakkianik tamaginnik, taakkuninnga aamma taakkua suliaqarnerannik aammalu ingerlatanik siunnersuummi pineqartunut ilaasunik oqartussatut suliarinninnissamut pisariaqartuninik Atuisartoqarnermut Unammilleqatigiinnermullu Aqutsisoqarfimmut nalunaaruteqarnissamut aamma nassiussinissamut suliffeqarfiit inuillu siunnersuummi pineqartunut ilaasut pisussaaffeqarput.

Aalajangersakkami suliffeqarfiit aamma inuit siunnersuummi pineqartunut ilaasut paasissutissiisussaataitanermik pisussaaffilerneqarput.

Aalajangersakkami paasissutissat suulluunniit, assersuutigalugu siunnersuut manna malillugu akuersissuteqarnissamik qinnuteqaatinik suliarinninnernut atatillugu, oqartussatut suliarinninnermut pisariaqartinneqartut, imaluunniit siunnersuut manna malillugu paasissutissat ingerlatanik tamakkiisumik nakkutilliinermi atorineqartussat, pineqartunut ilaatinneqarput.

Aalajangersagaq naapertorlugu, paasissutissat uppersaatillu Atuisartoqarnermut Unammilleqatigiinnermullu Aqutsisoqarfiup siunnersuut malillugu oqartussatut suliarinninnerup naammassineqarnissaanut pisariaqartitaannik nassiusseqqullugit, suliffeqarfiit aamma inuit siunnersuummi pineqartunut ilaasut, Atuisartoqarnermut Unammilleqatigiinnermullu Aqutsisoqarfiup peqqusinissaa periarfissinneqarpoq. Nassiussineq Atuisartoqarnermut Unammilleqatigiinnermullu Aqutsisoqarfiup pisariaqartitaatut pinissaata iluseqartinnissaatalu aalajangernissaanut, Atuisartoqarnermut Unammilleqatigiinnermullu Aqutsisoqarfik periarfissaqarpoq. Assersuutigalugu tamanna tassaasinnaavoq paasissutissat pappialanngorlugit aamma elektroniskimik nassiunneqassasut.

Imm. 3-mut

aalajangersagaq Atuisartoqarnermut Unammilleqatigiinnermullu Aqutsisoqarfimmut nalunaarusiornissamut tunngasuvoq.

Aalajangersagaq malillugu suliffeqarfiit aamma inuit siunnersuummi pineqartunut ilaasut pissutsit aamma ingerlatat siunnersuummi pineqartunut ilaasunik aamma akuersissuteqarnerit pillugit Atuisartoqarnermut Unammilleqatigiinnermullu Aqutsisoqarfimmut nalunaaruteqarnissamut pisussaaffeqarput.

Imm. 4-mut

Tamatuma saniatigut suliffeqarfiit innuttaasunik tapersersortarialinnik suliffissaqartitsisutut nalunaarsorsimasut, tamanna Atuisartoqarnermut Unammilleqatigiinnermullu Aqutsisoqarfimmit pisariaqartutut isigineqarpat, § 13 malillugu ukiut tamaasa ukiumut nalunaarusiamik Atuisartoqarnermut Unammilleqatigiinnermullu Aqutsisoqarfimmut nassiussisussaapput.

Imm. 5-imut

Naalackersuisut nalunaarusiortarneq pillugu aalajangersakkanik erseqqinnerusunik aalajangersaanissaanut inatsimmi tunngavissamik, aalajangersagaq imaqarpoq. Naalackersuisut aalajangersakkanik taamaattunik nalunaarummi aalajangersaasinnaapput.

#### Imm. 6-imut

Atuisartoqarnermut Unammilleqatigiinnermullu Aqutsisoqarfiup siunnersuut malillugu akuersissuteqarnerni aalajangiinernilu nalunaarusiortarneq pillugu atugassarititaasunik aalajangersaanissaanut inatsimmi tunngavissamik aalajangersagaq imaqarpoq. Assersuutigalugu ilusissaa, akulikissusissaa imarisaalu pillugit atugassarititaasut erseqqinnerusut aalajangersarneqarsinnaapput. Tamatuma saniatigut assersuutigalugu nalunaarusiornermut angusanullu isertuussinissaq pillugu atugassarititaasut erseqqinnerusut aalajangersarneqarsinnaapput.

#### § 20-mut

#### Imm. 1-imut

Aalajangersagaq, siunnersuut malillugu sulianik suliarinninnermut allatullu oqartussatut suliarinninnermut atatillugu aningaasartuutunik akiliinissamut suliffeqarfiit aamma inuit siunnersuummi pineqartunut ilaasut akileeqquneqartarnerannut, tunngasuvoq.

Aningaasartuutitut siunnersuut malillugu sulianik oqartussatullu suliarinninnermut atatillugu Atuisartoqarnermut Unammilleqatigiinnermullu Aqutsisoqarfiimmit aamma Naalakkersuisunit akilerneqartunik akileqqusinissamut aalajangersagaq inatsimmi tunngavissiiivoq. Assersuutigalugu akuersissuteqarnermut atatillugu suliamik suliarinnerinnermut, nalunaarsuinnermut nalunaarsorsimajunnaarsitsinnermullu, ingerlaavartumik nalunaarusiornermut, nakkutilliinnermut allatullu pisortat suliarinninnerannut atatillugu aningaasartuutit, aalajangersakkami pineqartunut ilaapput.

Aningaasartuut sunaluunniit, akiliineq Atuisartoqarnermut Unammilleqatigiinnermullu Aqutsisoqarfiup aningaasartuutaanut imaluunniit Atuisartoqarnermut Unammilleqatigiinnermullu Aqutsisoqarfiup sullissineranut nalinginnaasumik naapertuuppat, akiliutitut imaluunniit aningaasartuutit utertitsinertut akileeqquneqarsinnaavoq. Taamaalilluni suliami pineqartumi suliamik oqartussatullu suliarinninnermut Atuisartoqarnermut Unammilleqatigiinnermullu Aqutsisoqarfiup akilersimasai imaluunniit akiligassaattut naatsorsuutigineqartut sinnerlugit, aalajangersagaq manna tunngavigalugu akiliutit, akitsuutit akileeqqusisoqarnissaa imaluunniit aningaasartuutit utertitsisoqarnissaa, siunertarinqanngilaq. Atuisartoqarnermut Unammilleqatigiinnermullu Aqutsisoqarfiup siunnersuut, ilanngullugu ilaatigut akuersissuteqarneq, nakkutilliineq aamma aalajangiinerit, malillugu oqartussatut suliarinninnerani piffissamik atuinermut nalunaaquttap akunneranut akeqartitsineq tunngavigalugu, suliamik oqartussatullu suliarinninnermut akiliineq pisinnaavoq.

#### Imm. 2-mut

Imm. 1 malillugu suliffeqarfiit aamma inuit oqartussat aningaasartuutaannik akiliisarnerat

pillugu aalajangersakkanik erseqqinnerusunik aalajangersaanissamut Naalackersuisut inatsimmi tunngavissinneqarnerannik, aalajangersagaq imaqarpoq.

Imm. 3-mut

Siunnersuut malillugu akuersissuteqarnerni aalajangiinernilu imm. 1 malillugu oqartussat aningaasartuutaannut suliffeqarfiit aamma inuit akiliinissaat pillugu atugassarititaasunik aalajangersaanissamut Atuisartoqarnermut Unammilleqatigiinnermullu Aqutsisoqarfimmut inatsimmi tunngavissineramik, aalajangersagaq imaqarpoq.

### § 21-mut

Imm. 1-imut

Aalajangersakkami allassimavoq, ingerlatat aamma pissutsit siunnersuummi pineqartunut ilaasut pillugit aamma ukiup siuliani siunnersuut malillugu Atuisartoqarnermut Unammilleqatigiinnermullu Aqutsisoqarfiup nakkutilliinera aalajangiinernilu pillugit ukiumut nalunaarusiamik Atuisartoqarnermut Unammilleqatigiinnermullu Aqutsisoqarfik Naalackersuisunut nassiussissasoq.

Atuisartoqarnermut Unammilleqatigiinnermullu Aqutsisoqarfiup nakkutilliinerata aalajangiisarnerisalu eqikkaalluni allaaserineqarnerinik aamma taakkununga atatillugu pissutsit pingaarutillit aamma tunngaviusunut tunngasut erseqqinnerusumik allaaserineqarnerinik, ukiumut nalunaarusiaq imaqassaaq. Ukiumut nalunaarusiaq aamma suliffeqarfiit innuttaasunik tapersersortarialinnik suliffissaqartitsisut nalunaarsorsimasut aamma ingerlatat siunnersuummi pineqartunut ilaasut pillugit paasissutissanik aamma imaqassaaq. Tassunga atatillugu suliffeqarfiit taakkulu ingerlataat innuttaasunik tapersersortarialinnik suliffissaqartitsinermik siunertaqarnermik qanoq siuarsaanersut, allaaserineqassaaq. Suliffeqarfimmik innuttaasunik tapersersortarialinnik suliffissaqartitsisumik ingerlatsinermik qanoq Kalaallit Nunaanni siuarsaasoqarsinnaanersoq naliliinermik, aamma nalunaarusiaq imaqassaaq.

Ilaatigut siunnersuummi suliassaqarfiup iluani ineriartornerup malinnaaffiginissaanut aamma Naalackersuisut imaluunniit Kalaallit Nunaanni oqartussat allat Kalaallit Nunaanni suliffeqarfinnik innuttaasunik tapersersortarialinnik suliffissaqartitsisunik ingerlatsineq siuarsarniarlugu ingerlataqartariaqaraluarnersut naliliinermut, Naalackersuisut nalunaarusiaq atorsinnaavaat.

Imm. 2-mut

Aalajangersagaq malillugu, ingerlatat aamma pissutsit Inatsisartut inatsisaanni pineqartunut ilaasut aamma siunnersuut malillugu Atuisartoqarnermut Unammilleqatigiinnermullu Aqutsisoqarfiup nakkutilliinera aalajangiisarnerilu pillugit nalunaarusianik allanik aamma

paasissutissanillu allanik Atuisartoqarnermut Unammilleqatigiinnermullu Aqutsisoqarfiup Naalackersuisunut nassiussisarnissaa pillugu aalajangersakkanik erseqqinnerusunik Naalackersuisut aalajangersaasinnaapput aalajangiisinnaallutillu.

Ukiumut nalunaarusiamut ilaatinneqanngitsut pissutsit immikkut ittut pillugit nalunaarusianik paasissutissanillu Atuisartoqarnermut Unammilleqatigiinnermullu Aqutsisoqarfik nassiussissasoq pillugu aalajangersakkanik Naalackersuisut ilaatigut aalajangersaasinnaapput. Assersuutigalugu imaassinnaavoq suliffeqarnermi inuit immikkut pisariaqartitsisut ilanngutitinnissaannut tunngasunik suliffeqarfiit innuttaasunik tapersersortarialinnik suliffissaqartitsisut ingerlataqarnerat imaluunniit nalinginnaasumik ilinniartitaanermi atorfimmiluunniit nalinginnaasumi atorfeqarnermini piginnaasanik piukkunnarsarsinnaanngitsut, inuit immikkut ilinniartitaanermi atorfinni piukkunnarsarfiusunilu atorfinitsinneqarnerinut tunngasunik ingerlatanik ingerlataqarnerat pillugu, paasissutissanik erseqqinnerusunik Naalackersuisut kissaateqartut.

#### § 22-mut

##### Imm. 1-imut

Aalajangersakkami allanneqarpoq, siunnersuut imaluunniit aalajangersakkat siunnersuut malillugu aalajangersakkat naapertorlugit Atuisartoqarnermut Unammilleqatigiinnermullu Aqutsisoqarfiup aalajangiineri naammagittaalliutigissagaanni Naalackersuisut naammagittaalliorfigineqassasut.

Naatsorsuutigineqarpoq naammagittaalliuutit suliarineqartarnerat suliaqarfikkut oqartussaasumit sukkulluunniit attuumassuteqartumit isumagineqartassasut.

##### Imm. 2-mut

Aalajangersakkami allanneqarpoq, Atuisartoqarnermut Unammilleqatigiinnermullu Aqutsisoqarfiup aalajangiinera pillugu naammagittaalliuuteqarnissamut piffissaq pineqartup aalajangiinermik nalunaarfigineqarneraniit sapaatit akunnerinut 4-nut killilerneqartuq.

##### Imm. 3-mut

Aalajangersakkami aalajangersarneqarpoq, § 5, imm. 2 imaluunniit § 10, imm. 2 malillugit iluarsiiinissamut piffissamut killissaliussap aalajangersarneqarnera pillugu Atuisartoqarnermut Unammilleqatigiinnermullu Aqutsisoqarfiup aalajangiinera Naalackersuisunut suliassanngortinneqarsinnaanngitsuq.

##### Imm. 4-mut

Aalajangersakkami erseqqissarneqarpoq, naammagittaalliuuteqartup naammagittaalliummi taperserneqarnissaa Naalackersuisunit ilimagineqanngippat, naammagittaalliuut imm. 1-imi pineqartunut ilaasoq Naalackersuisunit suliariumannginneqarsinnaasoq.

### § 23-mut

#### Imm. 1-imut

Aalajangersakkami erseqqissarneqarpoq, suliap inuit akornanni eqqartuussivinnut suliaassanngortinneqarsinnaalinnginnerani Naalakkersuisut kingullertut oqartussaasut. Naammagittaalliummi suliaassami Naalakkersuisut aalajangiinerat eqqartuussivinnut suliaassanngortinneqarsinnaavoq.

### § 24-mut

#### Imm. 1-imut

Aalajangersagaq malillugu, pisuni nr. 1-9-imi eqqaaneqartuni, siunnersuut malillugu akiliisitsinissaq aalajangersarneqarsinnaavoq.

#### Imm. 2-mut

Siunnersuummi aalajangersakkanik unioqqutitsinernut Kalaallit Nunaanni pinerluttulerinermi inatsit malillugu akiliisitsinissaq aalajangersarneqarsinnaasoq, pillugu aalajangersakkanik Naalakkersuisut aalajangersaasinnaanannut inatsimmi tunngavissamik, aalajangersagaq imaqarpoq.

#### Imm. 3-mut

Aalajangersakkami erseqqissarneqarpoq, siunnersuummi § 24, imm. 1 imaluunniit 2 imaluunniit aalajangersakkat siunnersuut naapertorlugu aalajangersarneqartut malillugit akiliisitsinissaq, Kalaallit Nunaanni pinerluttulerinermi inatsimmi maleruagassat malillugit inatsisitigut pisinnaatitaasunut pisussaataasunullu peqqussutaasinnaasoq.

#### Imm. 4-mut

Aalajangersakkami allassimavoq, siunnersuut imaluunniit aalajangersakkat siunnersuut malillugu aalajangersarneqartut naapertorlugit akiliisitsinerit nunatta karsianut tutsinneqassasut.

### § 25-mut

Siunnersuut ulloq 1. januar 2020-mi atuutilissasoq aalajangersakkap nalunaarpaa.